

## LAGYO Laiká (Acts)

*Yesuq, Mauhkûng Má Shuî Yù Huî É Hkyô*

<sup>1</sup> Htohpilûq ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuî yu é buinyì jé shoq, <sup>2</sup> Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê. <sup>3</sup> Yesuq gi, shî hkâm é htâng má, Yhang dui toq bê hkyô lé, lungíng é saksé myo myô èq yhangmoq lé tân shit mù, buinyì myi xê nyí gyoro má yhangmoq chyáng lé htoq shit shit kut luî, Garai Gasâng é mingdán hkyô lé hko kyô ri. <sup>4</sup> Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byî tô é chyunghuq lé lánng nyî keq. <sup>5</sup> Hkâsu mù gâ le, Yohan gi, wui èq wui-myhup hkám byî é nghut lhê; nghut kôlhang, nungmoq kúm gi, buinyì hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê." gâ ri.

<sup>6</sup> Lagyô pé gi, Yhang eq rahá chôm zup míng tô é hkûn, Yhang lé, "Yhumsîng ê, nàng, haû Israelaq byu pé lé mingdán dum xuq byi râ gi, ahkuî yhang nghut bê lhú?" ga myî akô.

<sup>7</sup> Yesuq gi, "Áwa gi, Yhâng é ahkáng ayá èq kut to bê é ahkýing yam-yoq pé lé, nungmoq sé nó a ra. <sup>8</sup> Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yû mù luî, Yerusalem wà mó eq Yuda mau banshoq, Samariq mau eq maumyî

htáng shoq, ngá é saksê pé dut kó râ nghut lhê." ga luî, yhangmoq lé taî ri.

<sup>9</sup> Dang haû ban taî é htâng má, yhangmoq wú nyi le, Yhang gi, mauhkûng shut shuî yu é hui mù, yhangmoq hí mai Yhang lé a myàng loşhoq, mhut eq htup ló byuq bê nghut ri.

<sup>10</sup> Yesuq doq ló nyi é u lé, yhangmoq mauhkûng shut ru wú tsuq nyi bum ashî le, hpyu é mebu wut é byù í yuq gi, radá dâm yhangmoq nàm má htoq yap lò mù, <sup>11</sup> "Galile byu pé ê, haî mù luî mauhkûng shut wú tsuq nyi akô lú? Nungmoq é hí mai mauhkûng shut shuî yù huî é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taî akô.

*Yudaq É Jowò Má, Mahtiaq Lé Hkyin Kat É Hkyô*

<sup>12</sup> Hau htâng má, yhangmoq gi, Tsanlun Bùm mai, Yerusalem wà mó shut taû ló bekô.\* Haú gyoro gi, Bánno buinyì má ge sô é í za wê ri. <sup>13</sup> Yhangmoq jé ló kôjáng, yhangmoq nyi nyi kô é yhûm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. <sup>14</sup> Yhangmoq lhunglhâng bang gi, myiwe wuî le, Yesuq é yhângnu Mariq le, yhanggu pé le kut mù, i-myt rahkat za kyû chôm dung dung kut nyi akô.

<sup>15</sup> Buinyì haú yoq má, Petruq gi, lumjínq é gumang gu-nhá† wuî rasho í xê yuq kô zup zîng tô é gung gûng má, toq yap mù, <sup>16</sup> "Gumang gu-nhá wuî ê, Yesuq lé chyup é bang lé hkyô shuî hí é sù Yudaq eq séng luî, hí hpyang Dawiq é nhut mai Chyoiyúng Woi-nyí taî tô é Chyúmdang gi, dik

\* 1:12 Tsanlun bùm eq Yerusalem gyoro gi, déng rawú hkup kô we ri.

† 1:15 Gumang gu-nhá gâ é lé, Grik má gi, gumang za gâ to lhê.

byuq bê nghut ri. <sup>17</sup> Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhang shí hkyô dut bê nghut ri." ga taí ri.

<sup>18</sup> (Yudaq gi, yhang kut é agè ashop é muzó mai wó é ahpau èq myigùng ratóng wui yu é htâng, haú má yhang, a-nghop dông byit gyó mù wam buq goq luî, û banshoq buq myín byuq bê nghut ri. <sup>19</sup> Haú hkyô lé Yerusalem wà mó má nyi é lhunglhâng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

<sup>20</sup> Petruq xoq taí é gi, "Hkâsu mù gâ le, Hkya-on Kungtôn Laiká má, 'Yhâng é jowò chamchuyiyuì dut byuq sháng gaq; haú má ó le a nyì kó sháng gaq.'<sup>☆</sup>

ga luî le, dum

'Yhang wó é ayá lé byù góyuq wó yu pyám byi sháng gaq.'<sup>☆</sup>

ga luî le, bo tô ri. <sup>21-22</sup> Haú mù luî, Yohan baptisma byí hi é hkûn mai, Yesuq lé nga-nhûng chyáng mai shuí yu é buinyì jé shoq, Yhumsîng Yesuq nga-nhúng eq rahá htoq htoq wàng wàng kut nyi é buinyì banshoq pé má, nga-nhúng eq yhang zum nyì sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

<sup>23</sup> Haú hkûn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô. <sup>24-25</sup> Haú mù, yhangmoq kyûdung kô é gi, "Byù banshoq é i-myt lé sê é Yhumsîng ê, Yudaq Iskarut gi, yhang ló gíng é jowò shut ló râ ga, tô pyâm tô é yhâng é lagyo ayá é matú shí nhik mâ é nàng hkyin tô é sù lé tân shit laq ò." ga akô. <sup>26</sup> Hau htâng, yhangmoq, byù hkyîn shosé she le,

☆ 1:20 Hkya-on 69:25 ☆ 1:20 Hkya-on 109:8

Mahtiaq chyáng ang bê. Haû mai, Mahtiaq lé gi, haû lagyo raxe rayuq má jat kat bê nghut ri.

## 2

### *Chyoiyúng Woi-nyí Jé Gyó Lo É Hkyô*

<sup>1</sup> Penteko-ti\* buinyi jé jáng, lumjínq bang banshoq gi, jowò ralhú má za, chòm zup míng nyi tô akô. <sup>2</sup> Haú hkûn, laidun mó lo é su gâ é htê gi, byodàn ratung, mauhkûng mai mying htoq lô mù luî, yhangmoq zing tô é yhûm byíng shoq dut to bê nghut ri. <sup>3</sup> Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. <sup>4</sup> Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí eq taí nhang é eq rajung za, laklaí dang dông nyo lo bum akô.

<sup>5</sup> Haú u lé, mauhkûng ô má joq é mingdán hkangmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akô. <sup>6</sup> Haú mying é htê lé wó gyo kôjáng, byù rajùm rayò zîng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluî, <sup>7</sup> maú bùm uchyang taí kô é gi, "Wú keq, ahkuî dang taí nyi é byù shí bang lhunglháng gi, Galile byu pé chyat a nghut kó lú? <sup>8</sup> Haú nghut é wa, hkâsu mù nga-nhúng ó le ô é yhumsing mau mâ é myíng dông sê gyô yu lhê lú? <sup>9</sup> Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, <sup>10</sup> Hprugi eq Pamhpuli, Egotuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noqkuq htûng má lhing wang lò bang, <sup>11</sup> Kreti zinlóng eq Arabiq mau mâ é bang, nga-nhúng gi, yhangmoq hko kyô é Garai Gasâng é mauhpo muzó hkyô lé, yhumsing mau mâ é myíng dông yhang wó

---

\* 2:1 Penteko-ti gâ é gi, Lhoqlhai Póí laí é htâng ngo xê nyí jé é buinyi má, kut é póí lé gâ lhê.

sê gyô yu ri-nhung." gâ ri. <sup>12</sup>Yhangmoq banshoq bang gi, maú úng-âng byuq kômù, "Shí gi, haí wá nghut lhê lhu?" ga le, rayuq eq rayuq myî lhûm bum akô.

<sup>13</sup>Nghut kôlhâng, byù ra-am gi, "Shí bang gi, î shuq wut é bang nghut akô." ga luí, taí jihpoi bum akô nghut ri.

*Petruq Hko Kyô É Mungdang*

<sup>14</sup>Haú hkûn, Petruq gi, lagyo góbang raxe rayuq eq toq yap mù, htê mó eq byù háu bang lé taí é gi, "Yudaq byu pé eq Yerusalem wà mó má nyì nyi é lhunglhâng bang ê, rago gyô wú keq! Ngò, nungmoq lé, shí hkyô taí kyo kôlé.

<sup>15</sup>Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashî. <sup>16</sup>Shí hkyô kúm gi, myiqhtoi Yoelaq taí tô é eq rajung za dut é nghut ri. <sup>17</sup>Yhang taí tô é gi,

'Garai Gasang îsu gâ ri: Ló htâng é buinyì pé má, Ngò Ngá é Woi-nyí lé byù lhunglhâng bâng é ahtoq má hut gyun râ nghut lhê.

Haú mù, nungmoq é yuqzo byizô pé gi, myiqhtoi htoi kó râ; nungmoq é zorâm wuì gi, myoqwup shing-rán myàng kó râ; nungmoq é hpaû mâng pé gi, yhupmoq myàng kó râ nghut lhê.

<sup>18</sup>Buinyì háu pé má, Ngá é dui-nhâng zoshâng hpô pé eq dui-nhâng zoshâng myhî pê é ahtoq má lháng, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó râ nghut lhê.

<sup>19</sup>Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pê eq kut mù tân shit râ.

<sup>20</sup>Haú Yhumsing é kô hkikhkam é buinyì a jé shimá, buì gi, mauchut byuq, lhamó gi, sui dut byuq é hí dut râ nghut lhê.

<sup>21</sup> Haú hkûn, Yhumsing é myìng lé lâng é bang yuq  
hkanmó gi, hkyi yu é hui kó râ nghut lhê.<sup>✠</sup>  
gâ ri.

<sup>22</sup> Israelaq byu pé ê, dang shî lé gyô yù keq, nungmoq  
sê é eq rajung za, Nazaret wà byù Yesuq nungmoq é hí  
má tûn shit é, laklaí kumlhá, mauhpo muzó eq kumlhá pé  
gi, Yhang lé Garai Gasang nhang kat é saksé dut bê nghut  
ri. <sup>23</sup> Shí yuq gi, Garai Gasang myit hpyit tô é hkyô eq,  
hí te sê é hpaqchyî dông, nungmoq chyáng ap pyâm é  
hui mù, nungmoq gi, agè ashop byu pê é loq èq, Yhang  
lé tapzîng htoq má jén sat pyám nhâng bekô nghut ri.

<sup>24</sup> Nghut kôlhang, haú shî-nò hkyô gi, Yhang lé wó hkûm  
zing jung a nghut é yanmai, Garai Gasang gi, Yhang lé shî-  
nò jamjau mó mai, lhut pyám byi luí lhoq dui toq yû bê  
nghut ri. <sup>25</sup> Dawiq gi, shî yuq eq séng luí taí é má,  
'Haú Yhumsîng gi, ngá é myoq hí má hkâ-nhám le nyi nyi  
é lé ngò myàng bê.

Yhang ngá é loqyo hkyam má nyi nyi é yanmai, ngo lé wó  
lhoq nhún râ a nghut lo.

<sup>26</sup> Haú mù, ngá i-myt gi, nguínón nyî luí, ngá nhut shô  
gabú hkya-ôn nyi ri;  
ngá é gungdu le myit myoqbyù jowò má nyi nyi râ nghut  
lhê.

<sup>27</sup> Hkâsu mù gâ le, nàng, ngá é woi-nyí lé mosumhkung má  
tô pyâm to râ a nghut.  
Nàng, náng é Chyoiyúng Sû lé bup byuq é hui nhâng râ a  
nghut.

<sup>28</sup> Nàng, ngo lé asak dui é hkyô sé nhâng bê.  
Náng é myoq hí má, nàng, ngo lé gabú hkyô lhoq pyíng  
byi râ nghut lhê.<sup>✠</sup>  
gâ ri.

<sup>29</sup> Gumang wuì ê, nga-nhông é îchýí íkê Dawiq kâng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhông chyáng joq tô é lé le, ngò, nungmoq lé a gyuq a kyum wám taí lhê. <sup>30</sup> Dawiq gi, myiqhtoi rayuq nghut é yanmai, yhâng é awut ashín mâ é rayuq lé, yhâng é hkohkâm tanghkuq má zùng nhâng râ ga Garai Gasang byi tô é danggidiq lé sê to mù, <sup>31</sup> 'Hkrisduq† gi, mosumhkung má pyâm to a hui râ eq, Yhâng é gungsho a bup byuq é za, dum dui toq ló râ nghut lhê.', gâ é hkyô lé te sê to luí taí tô ri. <sup>32</sup> Garai Gasang gi, haû Yesuq lé lhoq dui toq yù bê. Ngamoq banshoq bang gi, haú hkyô é saksê pé nghut nyi ri. <sup>33</sup> Haû mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri. <sup>34-35</sup> Hkâsu mù gâ le, Dawiq gi, mauhkúng htoq tsáng myhâng má a doq ló wú kôlhang, yhang gi,

'Haû Yhumsîng Garai gi, ngá é Yhumsîng lé,

"Ngò, náng é gye pé lé, náng é hkyî nang tanghkuq kut pyám byî é hkyíng jé shoq,

Ngá é loqyo hkyam shut zung nyi shi aq." gâ ri.<sup>☆</sup>  
ga luí, taí ri.

<sup>36</sup> Hau é yanmai, Garai Gasang gi, nungmoq èq tapzîng má jén sat pyâm é haû Yesuq lé, Yhumsîng eq Hkrisduq dut nhang é hkyô, Israelaq byu pé lhunglhang bang hkyak sê nyi kó sháng gaq ô." gâ ri.

### *Sâng-hi Lumjîng É Bang*

† 2:31 Grik dong Hkrisduq gâ é gi, xû but hui Sû gâ é lichyúm nghut mù, Hebre dong Mesaia gâ é eq rajung za nghut lhê. ☆ 2:34-35 Hkya-on 110:1

<sup>37</sup> Yhangmoq gi, haû lé wó gyô bùm kôjáng, yhangmoq é i-myyit má záng kô é nghut mù luí, "Gumang wui ê, ngamoq hkâsu kut lo râ lhú?" ga luí, Petruq eq lagyo góbang lé myî akô.

<sup>38</sup> Petruq gi, "Nungmoq yuq hkanmó myit lhîng mù, Yesuq Hkrisduq é myîng mai wui-myhup hkâm yù keq; Haû jáng, nungmoq é yubak hkyut pyám byî é hui kó râ nghut lhê. Haú hkûn, Chyoiyúng Woi-nyí gâ é chyunghuq lé, nungmoq wó yû kó râ nghut lhê. <sup>39</sup> Hkâsu mù gâ le, danggidiq haû gi, nga-nhûng é Yhumsîng Garai Gasang ji yù râ bang banshoq nghut é, nungmoq eq nungmoq é yhangzo yhangshû pé eq le, mau we má nyi é lhunglhâng bang eq le, sêng lhê." ga luí, yhangmoq lé taí kyô ri.

<sup>40</sup> Yhang gi, dang gotû myo myô èq le saksé hkâm mù, "Shî agè ashop é amyû mai wó lut htoq lo keq ô!" ga luí, yhangmoq lé lhoq pun lhoq kyîng ri. <sup>41</sup> Dang haû lé guq yu é bang gi, wui-myhup hkâm yu bùm kôluí, haû nyí má byù sum hkyîng kô jat wàng lo bum bekô nghut ri.

### *Lumjîng Bang Zùm Yap É Hkyô*

<sup>42</sup> Haú bang gi, lagyô pé mhoqshit é hkyô, zùm yap é hkyô, muk hpê gam é hkyô<sup>‡</sup> eq akyû dúng é hkyô má, i-myyit rahkat za chôm châng nyi akô. <sup>43</sup> Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyi bum akô nghut ri. <sup>44</sup> Lumjîng é lhunglhâng bang gi, rawò má za zup zîng to mù, azîng zè banshoq lé chôm chung nyi akô.

<sup>45</sup> Yhangmoq gi, yhumsing é sutzè pé lé, ûng pyám mù, yuq hkanmó lé, yhang râ tô é eq rajung za gàm byî akô.

<sup>46</sup> Yhangmoq gi, nyí wuî myit rahkat zâ èq noqkuq yhûm wàng má nyi nyi akô. Yhumsing é yhûm pé má le muk hpê

<sup>‡</sup> 2:42 Muk hpê gam hkyô gâ é lé lichyúm í dòng wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.



gam é hkûn, <sup>47</sup> Garai Gasang lé hkya-on kungtôn uchyang, gabú é eq myit huí é èq chôm zo chôm shuq nyi bum akô; byù banshoq bâng é hí má le myoqdong wó bum akô. Haú Yhumsíng gi, nyí wuî yhangmoq chyáng hkyi yù hui bang jat lò nhang ri.

### 3

#### *Hkyî Hten Sû Rayuq Lé, Petruq Lhoq Gê Byî É Hkyô*

<sup>1</sup> Ahkuî, Petruq eq Yohan gi, myinhtâng zó sum hkyíng lhê é kyûdung nám má, noqkuq yhûm shut doq e ló akô. <sup>2</sup> Haú hkûn, înú unghkaû mai hkyî hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúngl hó hkum ga myhîng é hkúmdong má nyí hkang nyí mó waq lé lô mù, lé nyhi to to kut akô. <sup>3</sup> Yhang gi, Petruq eq Yohan, noqkuq yhûm haú má wang e ló é lé, myàng luî, lhom dúng nyi ri. <sup>4</sup> Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô. <sup>5</sup> Haú mù, yhang, yhangnhik chyáng mai rajung jung wó yû râ lé myit myoqbyù luî, yhangnhik lé rago za saî wú tô ri.

<sup>6</sup> Petruq kúm gi, "Ngùn, hîng gi, ngò a wó; nghut kôlhang, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq." ga taí uchyang, <sup>7</sup> yhâng é loqyo loq má zui mù lâng toq kat ri; haú hkûn jáng, yhâng é hkyî kochang-chap pé wúm bo lò bê nghut ri. <sup>8</sup> Haú mù, yhang gi, radá dâm toq yap mù sô kat luî, so uchyang, byàm uchyang Garai Gasang lé hkya-on mù, yhangnhik eq rahá noqkuq yhûm má wang ló ri. <sup>9</sup> Yhang sô e ló nyi é eq Garai Gasang lé hkya-on kungton nyi é lé, lhungl hâng bang chôm myang akô. <sup>10</sup> Haú yuq gi, noqkuq yhum é Yúngl hó hkum gâ é hkúmdong má zung to mù, dung zo sù nghut é lé yhangmoq matsíng kô é nghut mù

luí, yhang chyáng dut lò bê hkyo é yanmai, maú hong byuq bum akô nghut ri.

*Petruq Hkô Kyô É Mungdang*

<sup>11</sup> Petruq eq Yohan chyáng haú dung zo sù byìn châng tô é hkûn, shiwa byu pé gi, wú maú uchyang, Sholumon jirop shut, yhangmoq chyáng din yán wang lé lo bum akô. <sup>12</sup> Petruq haú lé myàng jáng, shiwa byu pé lé taí é gi, "Israelaq byu pé ê, shí yuq é hkyô lé haí mù luí maú nyi akô lúhú? Nga-nhik é dingmán hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô lúhú? Haú dông a nghut. <sup>13</sup> Abraham, Isak eq Yakup pê é Garai Gasang, nga-nhông é íchýí íwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byí é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri. <sup>14</sup> Haú chyoiyúng dingmán é Sù lé nungmoq he-ngik pyám kômù, byù sat sù lé sheq dúng htoq yú kôluí, <sup>15</sup> Asak Yhumsîng lé gi, sat pyám bekô. Garai Gasang kúm gi, haú yuq lé shi é mai lhoq dui toq yú bê nghut ri; ngá-nhik gi, haú hkyo é saksé nghut nyi lhê. <sup>16</sup> Yesuq é myèng lé lumjîng é yanmai, haú lumjîng myit mai za, shí nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjîng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

<sup>17</sup> Ahkuí, gumang wuè ê, nungmoq é uphkâng bang kut é su, nungmoq le haú hkyô lé a sé mù kut pyám é hkyô lé ngò sê nyi lhê. <sup>18</sup> Nghut kôlhang, haú hkyô gi, Garaí é Hkrisduq shî-nò jamjau hui râ nghut lhê ga luí, myiqhtoi banshoq bang lé hí hí mai taí nhang tô é Garai Gasang

yhang, lhoq dik é nghut ri. <sup>19</sup>Hau é yanmai, haû Yhumsing chyáng mâ é nguingón é ahkyíng yàm yoq jé lô râ matú le, <sup>20</sup>nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byî é hui râ matú le, nungmoq gi, myit lhîng mù Garai Gasâng chyáng lhing lò keq. <sup>21</sup>Garai Gasang gi, a-nham pyat mai, Yhâng é chyoiyúng myiqhtôî pê é nhut mai, táí nhang to bê eq rajung za, nyì mi-nyì, joq mijoq lé asik dum saí é pyat jé shoq, Yesuq lé mauhkûng htoq má nyì nhang to râ nghut lhê. <sup>22</sup>Hkâsu mù gâ le, Mosheq táí tô é le, 'Haû Yhumsîng Garai Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haú yuq táí mitaí nungmoq gyo ra râ nghut lhê. <sup>23</sup>Myiqhtoi hau é dang lé a gyo sù ó yuq nghut kôlhâng, yhumsing é byù myû mai chyung hpyit pyâm é hui râ nghut lhê. <sup>✠</sup> gâ ri.

<sup>24</sup>Gè gè yhang, Samuelaq mai, yhâng é htâng má châng pô htoq lo é myiqhtôî pé banshoq bang hko kyô lo é má le, buinyì shí pé eq séng mù táí to bekô nghut ri. <sup>25</sup>Nungmoq gi, haû myiqhtôî pê é dang silí wunlí eq, Garai Gasang mai, Abraham lé, 'Náng é awut ashîn é yanmai, mingkan htoq mâ é byù myû chângjup hkungsô wó kó râ nghut lhê! <sup>✠</sup> gâ é eq rajung za, nungmoq é îchyí îwâ pé eq tô tô é danggidiq lé wó hkam yù râ bang nghut akô. <sup>26</sup>Garai Gasang gi, nungmoq yuq hkangmó lé yhumsîng agè ashop é hkyô mai wó lhing taû lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luî, nungmoq chyáng hí nhang kat byi bê nghut ri." gâ ri.

## 4

*Petruq Eq Yohan Nhik Chyup Huî É Hkyô*

✠ 3:23 Tarâ Pun 18:15, 18-19 ✠ 3:25 Apûn 22:18; 26:4

<sup>1</sup> Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkûn, htoq lé lô kômù, <sup>2</sup> yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taî nyi kô é yanmai, yhangmoq gyai yhang myit myô nyi bum akô. <sup>3</sup> Haû mù, yhangmoq gi, yhangnhik lé chyup yû luî, myinhâng mauchut lô bê nghut é yanmai, htang napkyó jé shoq htóng má lhûng tô akô. <sup>4</sup> Nghut kôlhâng, mungdang lé wó gyô yu é bang myo myo gi, lumjîng kômù luî, yuqgè ngo hkyîng kô jé shoq myô jat lò bekô nghut ri.

*Yudaq Byìn Tú Wapdoq Má, Yhangnhik Lé Myî Jep Wú É Hkyô*

<sup>5</sup> Htang nyí, yhangmoq é zau wuî, suwún wuî eq tarâ sará pé gi, Yerusalem wà mó má chôm huî zup akô. <sup>6</sup> Hkyangjong mó Anna, Kayahpaq, Yohan, Alesander pé eq hkyangjong mó é amyû pé banshoq le, haû má bo tô akô. <sup>7</sup> Haû mù, yhangmoq gi, Petruq eq Yohan lé gung gûng má nyhi to luî, "Nungnhik gi, haî a-tsam, ó yuq é myîng mai mû shî lé kut akô lhú?" ga myî akô.

<sup>8</sup> Haû hkûn, Petruq gi, Chyoiyúng Woi-nyí byíng tô é nghut mù luî, yhangmoq lé taî é gi, "Mingbyû wuî é zaugun suwún wuî ê, <sup>9</sup> hkyî hten sù shí yuq lé lhoq gè byî é jeju yanmai, yhang hkâsu kut lhoq ge yû huî é hkyô lé, hkû-nyí nungmoq ngá-nhik lé myî gôn wú naû kô é nghut le gi, <sup>10</sup> nungmoq lhunglhâng bang eq Israelaq byu pé banshoq lé sé nhâng kôlé, nungmoq èq tapzîng má jén sat pyám mù, Garai Gasâng èq shi é mai lhoq dui toq yu é, Nazaret wà byû Yesuq Hkrisduq é myîng mai, shî yuq gi, nungmoq é hí má îsu wáng wáng zán zán yap tô é nghut ri.

<sup>11</sup> 'Yhûm saí bang nungmoq hkyin htoq pyâm é luqgok gi, htungchyûn mâ é ahkyak dik é luqgok dut bê.<sup>✧</sup> gâ é gi, Yesuq lé taí é dông nghut ri. <sup>12</sup> Hkyi yù hkyô gi, Yhang mai lai luí gotû a nyì lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myìng mai lai luí, xângzo byu pé lé byî tô é myìng gotû a joq lo é yanmai nghut ri." gâ ri.

<sup>13</sup> Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayû byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. <sup>14</sup> Hau htoq agó, lhoq gê byî é hui sù le, yhangnhik eq rahá yap tô é lé, yhangmoq myàng kô é nghut mù luí, taí râ hkyô haí le a joq lo kó nghut ri. <sup>15</sup> Haû mù, yhangnhik lé, haû Yudaq byìn tú wapdoq\* mai lhoq htoq to mù, yhangmoq rayuq eq rayuq hpyê lhum kô é gi, <sup>16</sup> "Shî nhik lé hkâsu kut lé gè râ lhú? Yhangnhik kut shit e laklaí kumlhá gi, Yerusalem wà mó má nyi é lhunglhâng bâng é hí má de za dut bê nghut é yanmai, nga-nhúng haû lé a wó hê lo nghut ri. <sup>17</sup> Nghut kôlhang, mingbyû wui má shí hkyô je riyhang a byo myín ló sháng gaq, ahkuî mai myìng haû lé lang mù ó lé le a taí kyo lo râ matú, yhangnhik lé kyuq hkúm pyám sháng." gâ bum akô.

<sup>18</sup> Haû mù, yhangnhik lé dum wut hâng yù luí, Yesuq é myìng lé lang mù, haí le hkâtaí, hkâ-mhoqshit kó ga chôm hkûm akô. <sup>19</sup> Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqdân yù keq. <sup>20</sup> Nga-nhik kúm gi, myàng yù, wó gyô

✧ 4:11 Hkyi-on 118:22 \* 4:15 Yudaq byìn tú wapdoq lé Grik dông gi, San-hedrin gâ lhê.

yù bê é hkyô pé lé, a taí é, a wó nyí nghut lhê." ga luí, yhangmoq lé dum tû taí akô.

<sup>21</sup> Haú hkûn, yhangmoq gi, dut laí lò bê hkyo é yanmai, shiwa byu pé Garai Gasang lé hkyá-on kungton nyi bùm kôluí, yhangnhik lé dàm byi râ hkyô a myàng kó ê nghut mù luí, yhangnhik lé dum tân kyúq luí nhang pyám bekô nghut ri. <sup>22</sup> Hkâsu mù gâ le, haú laklaí kumlhá đông lhoq gê byi huí é sũ gi, asak myi xê zàn chyân bê sũ nghut é yanmai nghut ri.

### *Lumjúng Bàng É Kyûdung Dang*

<sup>23</sup> Yhangnhik gi, nhang kat pyâm é hui kôjáng, yhangnhik é luzúm wui chyáng taú ló kômù, hkyangjong agyi pé eq suwún wui eq yhangnhik lé hkyâm é dang banshoq lé, ló taí kyo akô nghut ri. <sup>24</sup> Haú hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyûdung kô é gi, "Mauhkûng eq myigùng, wuìshuq lung-aú eq, haú pé má, nyi mi-nyí lé hpan tô é, ahko ahkáng lhunglhang wó é Yhumsîng ê, <sup>25</sup> Nàng, náng é dui-nhang zoshâng, ngamoq é íchýí íkê Dawiq é nhut mai, Chyoiyúng Woi-nyí eq taí tô é gi, 'Haí mù luí, tûngbaù amyû pé gi, nhikjum yô akô? haí mù luí, byu pé gi, akôm dâ pyám akô l hú?

<sup>26</sup> Haú Yhumsîng eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wuì eq rahá zup zîng bum akô. <sup>✠</sup>

gâ ri. <sup>27</sup> Gè gè yhang, Herut eq Pontu Pilat nhik gi, tûngbaù pé eq Israelaq byu pé le mù, wà mó shî má chôm zîng to kôluí, nàng xũ but byi é sũ, † náng é Chyoiyúng dui-nhang zoshâng Yesuq lé gumlau toq râ dâ nyi akô. <sup>28</sup> Náng é

✠ 4:26 Hkyá-on 2:1-2 † 4:27 Xũ but é hkyô gi, Yudaq byu pé htûng đông xũ but byi jáng, rajung jung kut râ matú hkyin masat yu é hkyô nghut lhê. Xũ but byi é sũ gi, Grik đông Mesaia gâ é nghut lhê.

wum-o a-tsam eq nàng ô nau é đông dut râ matú, hí hkûn mai nàng myit hpyit doqdân tô é hkyô lé, yhangmoq gi, kut pyám bekô nghut ri. <sup>29</sup> Yhumsîng ê, ahkuí yhangmoq taí kyuq nyi é dang lé myàng byi laq ô! Náng é dui-nhâng zoshâng wuì, a gyuq a kyum é myit èq náng é dang lé taí râ matú wum-o byi laq! <sup>30</sup> Náng é wum-o bo é loq lhâm kat luí, noli nojàng lé lhoq gê byi mù, náng é Chyoiyúng dui-nhâng zoshâng Yesuq é mying mai, limik kumlhá eq mauhpo muzó pé lé kut shit laq ô!" gâ akô.

<sup>31</sup> Haû su, kyû ban dung kôjáng, yhangmoq zîng tô é jowò gi, dui nún lô mù, yhangmoq lhunglhâng bang gi, Chyoiyúng Woi-nyí byíng lô luí, Garai Gasâng é mungdang lé a gyuq a kyum é za taí bùm bekô nghut ri.

### *Azîng Zê Lé Chôm Gam Chûng Kô É Hkyô*

<sup>32</sup> Haû lumjîng é lhunglhâng bang gi, i-myt rahkat za nghut nyi akô; ó yuq le, yhumsîng wó é zè lé ngá é a gâ é za, banshoq eq chôm gam chung nyi akô. <sup>33</sup> Lagyô pé le, haû Yhumsîng Yesuq dum dui toq é hkyô lé a-tsam mó èq saksé hkâm nyi kô é nghut mù luí, yhangmoq banshoq bâng é ahtoq má jeju myo myo joq nyi ri. <sup>34</sup> Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhûm wó é bang ó yuq nghut kôlhang, haú pé lé adàm dàm ûng pyám luí wó yu é ngùn le gi, <sup>35</sup> lagyô pê é hkyî wang má lé to byî akô. Haû mù luí, a wó a lòm sù ó yuq lé le ra tô é eq rajung za gàm byî akô nghut ri.

<sup>36</sup> Haú hkûn, Barnaba ga luí lagyô pê èq myhíng byi é, Kupru ming mâ é Lewiq byù Yosep le, yhang wó é maumyî ratóng lé ung luí, wó yu é ngùn lé lagyô pê é hkyî wang má, lé to byî ri. <sup>37</sup> Barnaba gâ é dang lichyúm gi, myit wum byí su é yhangzo gâ é lichyúm nghut lhê.

## 5

*Anani Eq Sahpira Nhik É Hkyô*

<sup>1</sup> Nghut kôlhang, Anani ga sô gi, yhangmyi Sahpira eq rahá, yháng nhâm wó é maumyî ratóng lé ûng pyám luî, <sup>2</sup> yhangmyi le bo sê é dông, ngùn haû ra-am lé gi, haq myhit yu to mù, ra-am lé za lagyo pê é hkyî wang má lé to byî akô.

<sup>3</sup> Haû mù luî, Petruq gi, "Anani ê, Chyoiyúng Woi-nyí lé mhaû pyám râ matú eq, maumyî hpau mâ é ra-am lé haq yu to râ matú, haî mù luî, náng é myit má Tsadán le byíng nhang tô lhê lú? <sup>4</sup> Maumyî haû joq tô le, náng é zè nghut lhê a nghut lú? Wó ung é ngùn le náng é zè nghut ashî, a nghut lú? Haî mù luî, nàng haú dông dâ lhê lú? Byù lé mhaû é a nghut, Garai Gasang lé mhaû pyám bê nghut ri." ga taî ri.

<sup>5</sup> Anani gi, dang haû lé wó gyo jáng, lêng mù, shi byuq bê nghut ri. Haú hkyô lé wó gyô é bang banshoq le, gyai yhang gyuq bùm bekô nghut ri. <sup>6</sup> Haú hkûn, zorâm wuî gi, toq mù, yhâng é mâng lé htup luî, ê waq myhup pyâm akô. <sup>7</sup> Hau htâng, sum hkyíng kô myáng jáng, yhangmyi le, wang lé lo ri. Haû su dut é hkyô lé gi, yhang a sé nghut ri.

<sup>8</sup> Haú hkûn, Petruq gi, "Ngo lé taî kyô wú aq. Nungnhik ûng é maumyî hpau gi, shí gû za nghut lhê lú?" ga myi jáng, yhang gi, "Nghut lhê, haú gû za nghut bê." ga tû taî ri.

<sup>9</sup> Petruq gi, "Nungnhik gi, haû Yhumsing é Woi-nyí lé îsu kut chyam wú râ matú, hkâsu mù chôm myit huî akô lú? Wú aq, náng é yhumsíng hpó lé ê myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lhê." ga taî ri.

<sup>10</sup> Radá dâm, yhang le lagyo hpô é hkyî wang má lêng shi byuq bê. Zorâm wuî le wang lo wú le, myiwe haû shi



to lánq é lé myàng kôluî, waq ê mù, yhanglang é nàm má, ê myhup pyám bekô. <sup>11</sup> Hau é yanmai, haú hkun lhê é hpúng byù banshoq bang eq, haú su dut ê hkyô lé wó gyo má wó gyô é bang gi, gyai yhang gyuq bùm bekô nghut ri.

*Byù Myo Myo Lé, Lagyô Pé Lhoq Gê Byî É Hkyô*

<sup>12</sup> Ahkuî, lagyô pé gi, mingbyû wui é hí má limik kumlhá eq mauhpo muzó myo myo lé, kut shit nyi akô. Haú lumjínq bang gi, i-myt rahkat zâ eq, Sholumon jiroq má chôm hui hui kut bum akô. <sup>13</sup> Shiwa byu pé gi, yhangmoq lé hkunggâ nyi bùm kôlhang, yhangmoq lé a wám é zum bùm kó. <sup>14</sup> Nghut kôlhang, haú Yhumsínq lé lumjínq é myiwe yuqgè wui gi, myo sheq myô jat lò kômù, yhangmoq chyáng je myô jat lò bê nghut ri. <sup>15</sup> Haú mù luî, byu pé gi, Petruq laî lo é hkûn, yhâng é wupzo za lháng rayuq yuq é ahtoq má zang sháng gaq ga, nõhpyo huî é bang lé, wà mâ é hkyô yàm má waq htoq ê mù, yhuphpú pé eq taphkang pé má lheq tô akô. <sup>16</sup> Hau htoq agó, Yerusalem awui ayàm mâ é wà pé mai le, byù ajùm ayò gi, no é bang eq agè ashop é nat wang zing-ri huî é bang lé shuî jé lé bum akô; haú bang lhunglhang gi, lhoq gê lhoq yô byî é huî bum akô nghut ri.

*Lagyô Pé Zing-ri Huî É Hkyô*

<sup>17</sup> Hkyangjong mó eq yhâng é luzúm wui, Saduke hpúng mâ é byu pé kúm gi, gyai yhang wú manon bùm kôluî, toq mù, <sup>18</sup> lagyô pé lé chyup yû luî, wà mâ é htóng má lhung tô akô. <sup>19</sup> Nghut kôlhang, haú myín lé, Yhumsínq é maumang lagyo rayuq gi, htóng hkum pé lé hpông pyám mù, yhangmoq lé shuî htoq yû uchyang, <sup>20</sup> "Nungmoq htoq ló mù, noqkuq yhûm má ê yap to luî, dui é asak hkyô sik eq sêng é danglù banshoq, shiwa byu pé lé taî kyo keq." ga taî ri.

<sup>21</sup> Napsûn myoqmyàng zó lé, yhangmoq gi, noqkuq yhûm má wàng mù yhangmoq wó gyô yu é eq rajung za, shiwa byu pé lé, mhoqshit hi lô akô.

Haú u lé, hkyangjong mó eq yhâng é luzúm wuî gi, Israelaq byu pê é suwún wuî lhunglhâng bang lé ji yù mù, Yudaq byìn tú wapdoq chôm zung yù luî, lagyô pé lé ê shuí yù râ matú htóng shut byù nhang kat akô. <sup>22</sup> Haú bang kúm gi, htong má jé é hkûn, lagyô pé lé a myàng kôjáng, dum taù lò mù lo taì kyo kô é gi, <sup>23</sup> "Htóng hkum le ging ging myhî to lánq ri, htóng zúng bang le hkum yâm má yap tô akô. Nghut kôlhang, hpông wú le, ahkaû má ó le a nyi to lo nghut ri." gâ ri. <sup>24</sup> Noqkuq yhûm zúng é zau hpó eq hkyangjong agyì wuì gi, dang haù lé wó gyo kôjáng, "Shí hkyô haì dut lô râ lhú?" ga, gyai gyuq maú bum akô.

<sup>25</sup> Haú hkûn, byù rayuq wang lé lô mù, "Wú keq, nungmoq èq htóng má lhûng tô é bang gi, noqkuq yhûm má yap to mù byu pé lé mhoqshit nyi bum akô." ga luî, yhangmoq lé taì kyô ri. <sup>26</sup> Haù mù luî, zau hpó haù gi, yhâng é a-ô mâ é bang eq ê mù, lagyô pé lé ê shuí yu akô. Nghut kôlhang, shiwa byu pé luqgok èq dú lô kó râ lé gyuq kô é yanmai, htân htân a wám kut kó nghut ri.

<sup>27</sup> Lagyô pé lé shuí jé lô kôjáng, Yudaq byìn tú wapdoq hí má yhangmoq lé nyhi tô akô. Haù hkûn, hkyangjong mó gi, <sup>28</sup> "Yesuq é myìng lé lang luî a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luî, Yesuq é sui lé, ngamoq é ahtoq má ke byi râ dâ nyi akô." ga luî, yhangmoq lé taì akô.

<sup>29</sup> Haù hkûn, Petruq eq gotû lagyô pé tû taì kô é gi, "Ngamoq gi, byù dang lé gyo ra htoq má Garai Gasâng é mungdang lé je luî gyo râ dut lhê. <sup>30</sup> Nga-nhûng é îchyí îwâ pê é Garai Gasang gi, nungmoq èq tapzîng má lhâng

sat pyâm é Yesuq lé, shi e mai lhoq dui toq kat bê nghut ri. <sup>31</sup> Israelaq amyû lé, myit lêng hkyô eq mara hkyut byi hkyô hpóng byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq\* má waq toq to bê nghut ri. <sup>32</sup> Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byî tô é Chyoiyúng Woi-nyí le, shí pê é saksé nghut lhê." ga akô.

*Gamalelaq Hpaqchyî Byî É Hkyô*

<sup>33</sup> Yhangmoq gi, dang haû lé wó gyo kôjáng, lûm gyo nhik-yo naû kômù, lagyô pé lé sat pyâm râ lhang myit akô. <sup>34</sup> Nghut kôlhang, mingbyû banshoq bâng é hí má aróng wó é tarâ sará Gamalelaq gâ é Hparishe rayuq, haû Yudaq byin tú wapdoq má toq yap mù, lagyô pé lé razup zo lhoq htoq to nhâng luí, <sup>35</sup> yhang taí é gi, "Israelaq byu pé ê, shí bang lé hkâsu kut râ hkyô, rago za hí myit wú keq. <sup>36</sup> Hkâsu mù gâ le, hí hpyang Htudaq gâ é byû rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunglhang bang le byo myín byuq kômù, haî le a wó kut dut byuq akô nghut ri. <sup>37</sup> Hau htâng, mying jihpán guq yu é buinyí má, Yudaq gâ é Galile byù rayuq pô htoq mù, mingbyû wuì lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhang bang le, byo myín byuq bekô nghut ri. <sup>38</sup> Ahkuí le, shí bang lé haî le hkâgon ko, yhangmoq kâm é dông nghut nyí kó sháng gaq; yhangmoq kut nyi é hkyô eq dâ nyi é hkyô pé gi, byù myit dông kut é nghut jáng, htên byoq byuq râ za nghut lhê. <sup>39</sup> Nghut kôlhang, Garai Gasâng chyáng mâ é nghut le

\* 5:31 Garai é loqyo loq gâ é gi, hpautap hkungga gíng é jowò lé taí nau é nghut lhê.

gi, nungmoq wó lhoq hkyîng pyám kó râ a nghut. Garai Gasâng é gyè sheq dut lò kó râ nghut lhê." gâ ri.

<sup>40</sup> Dang haû lé yhangmoq gyô htuk bum akô. Haû mù, lagyô pé lé wut yù mù luî, nhuq bat yù kômù, Yesuq é myîng lé lang luî mhoqshit é hkyô a ge kut râ nghut lhê ga taí kômù, nhang pyâm akô nghut ri.

<sup>41</sup> Lagyô pé kúm gi, Yesuq é myîng é yanmai ru hpuzô é hkyô gi, gingdán nyi ri, ga myit yù kômù, Yudaq byìn tú wapdoq haû mai gabú myit eq htoq ló bekô. <sup>42</sup> Hau htâng, yhangmoq gi, nyí wuî làng noqkuq yhûm má le, rayhûm htâng rayhûm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

## 6

### *Garúm Râ Byù Nyhit Yuq Lé Hkyin Yu É Hkyô*

<sup>1</sup> Ahkuî, chángzô pé myô jat lo nyi é buinyì pé má, Grik dang nyo é Yudaq byu pé gi, yhangmoq é chuimó myhî pé lé, nyí wui lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hûn dang taí bum akô. <sup>2</sup> Haú hkûn, lagyo raxe í yuq gi, chángzô pé lhunglhâng bang lé wut yù mù, "Ngamoq, Îwa Garai Gasâng é mungdang hko kyô é muzó lé rap pyâm to mù, zangbó amù lé za lajang nyi é nghut le gi, a htuk râ nghut lhê. <sup>3</sup> Haû mù luî, gumang wuî ê, Chyoiyúng Woi-nyí byíng é eq hpaqchyî byéng-yá bo é nhik bo byù nyhit yuq lé nungmoq chyáng mâ é hkyin to keq. Haú bang lé muzó shí lhum hun to râ nghut lhê. <sup>4</sup> Ngamoq kúm gi, kyûdûng é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

<sup>5</sup> Dang haû lé shiwa byù lhunglhâng bang gyô htuk kômù luî, lumjîng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htûng má lhing wang lò bê sù

Antioku wà mó mâ é Nikolaq pé lé hkyin yù mù, <sup>6</sup> lagyô pé chyáng shuî ló akô; lagyô pé gi, kyûdung byi kômù, yhangmoq lé loq ke byî akô nghut ri.

<sup>7</sup> Garai Gasâng é mungdang gi, je myô jam lò luî, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haû lumjíng hkyô má châng nyi bum akô.

### *Stehpan Chyup Yû Huî É Hkyô*

<sup>8</sup> Ahkuî, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tân shit ri.

<sup>9</sup> Haû hkûn, luthkyô ga bâng é tarajong eq sêng é Kuruni, Alesander eq Kiliki, Asia mau mâ é bang ra-am gi, toq mù, Stehpan eq dang chyin chyin lhúm akô. <sup>10</sup> Nghut kôlhang, Stehpân é dang gi, Chyoiyúng Woi-nyí lom é hpaqchyî dang nghut é yanmai, yhangmoq a ûng kó nghut ri.

<sup>11</sup> Haû mù, yhangmoq gi, "Shí yuq, Mosheq eq Garai Gasang lé rhoî dang taî nyi é lé, ngamoq wó gyô ri." ga luî, mhaû taí nhâng râ byù haq lung tô akô.

<sup>12</sup> Haû mù, yhangmoq gi, mingbyû wuî eq nhik bô suwún wuî, tarâ sará pé lé, chun htau mù, Stehpan lé chyup yû nhâng luî, Yudaq byìn tú wapdoq má shuî nyhi tô akô. <sup>13</sup> Mhaû é saksé byu pé lé le lhoq hâng kat luî, haû bang gi, "Shí yuq, shî chyoyúng jowò\* eq jep é tarâ lé shut shai é dang ru taî nyi ri. <sup>14</sup> Nazaret wà byù Yesuq ga sù gi, jowò shî lé hpýoq pyám mù, nga-nhúng lé Mosheq eq byî tô é htunghking lé htaî pyám râ nghut lhê ga luî, yhang taî é dang lé ngamoq wó gyô é nghut lhê." ga taî akô.

<sup>15</sup> Haû Yudaq byìn tú wapdoq má zung to bang banshoq, yhang lé chôm wú tsuq nyî kô é hkûn, yhâng é myoqdong

\* 6:13 Shî chyoyúng jowò gi, Yerusalem noqkuq yhûm lé gâ lhê.

gi, maumang lagyô é myoqdong su dut é lé, yhangmoq myang akô nghut ri.

## 7

*Stehpan Tai É Dang*

<sup>1</sup> Haú hkûn, hkyangjong mó gi, "Dang haú pé têng lhê lú?" ga luí, yhang lé myi jáng,

<sup>2</sup> Stehpan tû tai é gi, "Gumang wui eq îwa wui ê, gyô wú keq, nga-nhúng lhunglhâng bâng é îchyí Abraham gi, Haran wà má a ló nyî shi lé, Mesopotamiaq mau má nyi tô ashî hkûn, hpungwup shingkang bo é Garai Gasang gi, yhâng chyáng lé htoq shit mù, <sup>3</sup> 'Náng é ming eq náng é amyû mai htoq ló luí, ngò tûn shit râ ming shut e ló aq. <sup>✧</sup> ga luí, yhang lé tai ri.

<sup>4</sup> Haú mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htot lô nhâng bê nghut ri. <sup>5</sup> Garai Gasang gi, shí ming má yhang lé silí wunlí nghû râ, hkyî rahkô nang î é myigùng lháng a byî é nghut kôlhâng, yhang, zodù lháng a wò shi mai, yhang lé le, yhâng é awut ashín pé lé le, maumyî shí byi râ ga danggidiq byî to bê nghut ri. <sup>6</sup> Hau htoq agó, shí hkyô lé Garai Gasang xoq tai é gi, 'Náng é awut ashín pé, tûngbaù ming má bíng nyî mù, haú ming bâng eq myi shô zàn jùn zô é eq zing-rî é lé hui kó râ. <sup>7</sup> Nghut kôlhâng, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haú hkûn, yhangmoq gi, haú ming mai htoq lô mù, jowò shí má ngo lé noqkuq kó râ nghut lhê. <sup>✧</sup> ga le, Garai Gasang tai ri. <sup>8</sup> Hau htâng, yhang lé ahpyo-kuq hpyit byi râ hkyô eq sêng é dangshikaq le, byî ri. Haú mù, Abraham gi, Isak lé hku é htâng shit nyí

✧ 7:3 Apûn 12:1 ✧ 7:7 Apûn 15:13-14

buinyì má ahpyo-kuq hpyit byî ri; Isak gi, Yakup lé hkû mù, Yakup gi, îchýí îwa achyûng raxe í yuq lé hku kat bê nghut ri.

<sup>9</sup> Haû îchýí îwâ pé gi, Yosep lé manôn kôluî, Egutuq ming shut jùn dông ûng kat akô. Nghut kôlhang, Garai Gasang gi, yhang eq rahá nghut nyì mù luî, <sup>10</sup> wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyî byéng-yá le bò nhang é yanmai, hkohkâm haû gi, Egutuq ming eq, yhang é hkohkâm-wâng banshoq lé up nhang ri.

<sup>11</sup> Haú u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhûng é îchýí îwâ pé le zoshuq a myang hô zo lo dut byuq bekô nghut ri. <sup>12</sup> Ahkuî, Yakup gi, Egutuq ming má guqzo joq é hkyô lé wó gyo jáng, nga-nhûng é îchýí îwâ pé lé sâng-hî dàm ê nhang ri. <sup>13</sup> Htang dàm dum ê é hkûn, Yosep gi, yhanggu yhangmâng pé lé yhang ó nghut é hkyô tái kyô ri. Hpara-uq le Yosep é yhumbyù ikun hkyô lé sê yù byi bê nghut ri. <sup>14</sup> Hau htâng, Yosep gi, yhang wa Yakup eq yhumbyù banshoq nyhit xe ngo yuq lé, yhang chyáng pying yù bê nghut ri. <sup>15</sup> Yakup le Egutuq ming má jé gyó lô luî, yhang eq nga-nhûng é îchýí îwâ pé gi, banshoq haú ming má shî lô byuq bekô nghut ri. <sup>16</sup> Yhangmoq é mâng lé gi, Shehkem wà má yu taû lô mù, Shehkem wà mâ é Hamora é yhangzo yhangshu pê chyáng mai, Abraham èq ngùn byi mù wui hpyit tô é lupdùng má lô myhup tô akô nghut ri.

<sup>17</sup> Abraham lé Garai Gasang byî tô é danggidiq dik râ ahkyíng jé lo nyi é u lé, <sup>18</sup> nga-nhûng é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri. <sup>19</sup> Hkohkâm hpó haû gi, nga-nhûng é amyû htoq má a ge é hpaqchyî da luî, nyheqnú

pé lé shi byuq sháng gaq ga, dú pyám nhang é dông mai nga-nhông é îchýí îwâ pé lé zing-ri bê nghut lhê.

<sup>20</sup> Haû u má, Mosheq lé hkû to bê. Yhang gi, Garai Gasâng é hí má gyai yúnglhô é sù nghut ri; yhang gi, yhângwâ é yhûm má lhamó sum hkyap baú tô é hui mù, <sup>21</sup> htot tô tô é hui jáng, yhang lé Hpara-uq é byizô èq xe yù mù, zosîng kut yû luî, hku kô ri. <sup>22</sup> Mosheq gi, Egutuq ming mâ é hpaqchyî byéng-yá banshoq lé mhoq yû luî, nhut shô a-tsam eq hkyî loq a-tsam gyai bò sù nghut ri.

<sup>23</sup> Yhang asak myi xê zàn jé lò jáng, yhâng é gumang Israelaq byu pê chyáng ê kûm wú râ matú wó myit htoq kat ri. <sup>24</sup> Ê jé jáng, zing-ri hui nyi é sù rayuq lé ê myâng luî, haú yuq lé búng mù, zing-rî nyi é Egutuq byù lé, loqchoq hpuq é dông sat pyâm ri. <sup>25</sup> Mosheq gi, yhâng é byu pé lé yhâng é loq dông Garai Gasang hkyi yù hkyô byi nyi é lé, yhâng é amyû pé sê gyo byi nhô ngàm kôlhang, yhangmoq a sê gyo byi kó nghut ri. <sup>26</sup> Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyîn naù luî, 'Ahkaû nhik ê, gumang yhangchang sheq ru nghut lhê nhîng, haî mù rayuq eq rayuq byoq lhum nyi akô lhú?' ga taî ngón wú ri.

<sup>27</sup> Luzúm hpó lé zing-rî nyi sù yuq gi, 'Ngamoq é ahtoq má zau eq tarâ agyî kut râ matú, nàng lé ó yuq hkyin tô é lhú? <sup>28</sup> A-nyí nap Egutuq byù lé sat pyâm é su, ngo lé le sat pyám nau ri lhú?'<sup>☆</sup> ga luî, tû taî uchyang yhang lé dîn chyûn pyâm ri. <sup>29</sup> Mosheq gi, dang hau é yanmai, hpâng luî Midian ming má ê nyi byuq ri. Haû má yuqzo í yuq é wó ri.

<sup>30</sup> Haû ming má myi xê zàn lai jáng, Sinaq Bùm yàm, yoso hkaû mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri. <sup>31</sup> Mosheq gi, haû lé myàng jáng, hau é yanmai maú luî, wú wú râ ga huî e ló le,

☆ 7:28 Htoq Ló 2:14



Yhumsîng é htê htoq lo é gi, <sup>32</sup> 'Ngò gi, náng îchýí îwâ pé é Garai Gasang, Abraham, Isak, Yakup é Garai Gasang nghut nyi lhê. <sup>✧</sup> gâ ri. Mosheq kúm gi, gyuq nán luî, a wám tu wú nghut ri.

<sup>33</sup> Haû Yhumsîng gi, 'Náng é hkyî-tsung hkyut pyám aq, nàng yap tô é jowò gi, chyoiyúng é myigùng nghut lhê. <sup>34</sup> Egotuq ming má ngá é amyû pé zik zo huî nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuî, lé aq, ngò, nang lé Egotuq ming shut nhang taû kat râ. <sup>✧</sup> ga luî, yhang lé dum taî ri.

<sup>35</sup> Yhangmoq eq, 'Nang lé zau eq tarâ agyì kut râ matú, ó yuq hkyin tô é lhú?' ga luî he-ngik pyâm é Mosheq lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luî, taû nhang kat é nghut ri. <sup>36</sup> Haû Mosheq yhang, Egotuq ming má le, Nhông Nè má le, yoso hkaû pé má le, myi xê zàn gyoro má mauhpo muzó pé eq limik kumlhá pé tûn shit uchyang, yhâng é byù myû pé lé Egotuq ming mai shuî htoq ló ri.

<sup>37</sup> Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pò htoq lô nhâng râ nghut lhê. <sup>✧</sup> ga luî, taî tô é sù le Mosheq yhang nghut ri. <sup>38</sup> Yoso hkaû má nghut nyi ashî hkûn lé, shiwa byù hpúng má, Sinaq Bùm má yhang lé dang taî é maumang lagyo eq le, nga-nhông é îchýí îwâ pé eq le rahá nghut sù gi, yhang yhang nghut nyi ri; nga-nhúng lé ap byi râ asak dui é mungdang lé lom yu é sù le, yhang nghut nyi ri.

<sup>39</sup> Nghut kôlhang, nga-nhông é îchýí îwâ pé kúm gi, yhâng é dang lé a kâm gyo kômù, yhang lé he pyám luî,

✧ 7:32 Htoq Ló 3:6 ✧ 7:34 Htoq Ló 3:5, 7-8,10 ✧ 7:37 Tarâ Pun 18:15

Egutuq ming shut taú nau é myit bo bum akô. <sup>40</sup> Haú mù, Arun lé, 'Egutuq ming mai nga-nhúng lé shuí htoq lo é Mosheq gi, haí dut byuq bê hkyô lé, ngamoq a sé lo; haú mù, nga-nhúng hí má so byi râ hparà lhô pé saí byi aq.<sup>✠</sup> ga taí akô. <sup>41</sup> Haú buinyì pé má, yhangmoq gi, nojûng zo lhô saí mù, alhô haú lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô. <sup>42</sup> Haú mù luí, myiqhtoí pé é laiká má kâ tô é gi, 'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byí é nghut akô lhú?

<sup>43</sup> Nungmoq gi, nungmoq noq râ matú saí yu é alhô, Molak é zúm eq Rehpan hpara é kyí lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyám râ nghut lhê.<sup>✠</sup>

ga luí, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkûng htoq mâ é bui, kyí, lhamó pé lé noqkuq râ matú ap pyám bê nghut ri.

<sup>44</sup> Mosheq lé, nàng myang é azòng eq rajung za saí aq ga, Garai Gasang taí é dông saí tô é saksé zúm lé, haú yoso má nga-nhúng é íchýí íwâ pé wó yû bekô nghut ri. <sup>45</sup> Haú mù, nga-nhúng é íchýí íwâ pé gi, yhangmoq é myoq hí mai Garai Gasang èq hkat htoq pyám byí é byù myú pé é mau má, Yoshuq eq rahá wang nyi ló kô é hkûn, saksé zúm haú lé yu wang ló akô. Haú gi, Dawiq é pyat jé shoq joq to bê nghut ri. <sup>46</sup> Dawiq kúm gi, Garai Gasâng hí má myoqdong wó sù nghut mù luí, Yakup é Garai Gasâng matú nyi jowò saí râ ahkáng dung kôlhang, <sup>47</sup> Sholumon èq sheq saí bê nghut ri.

✠ 7:40 Htoq Ló 32:1 ✠ 7:43 Amo 5:25-27

<sup>48</sup> Nghut kôlhang, Myhang htáng htum Sû gi, byu é loq èq za saí é yhûm má nyi é a nghut, haú hkyô eq séng luí myiqhtoi wá taí tô é gi,

<sup>49</sup> 'Mauhkûng gi, ngá é zùng tanghkuq, myigùng gi, ngá é hkyî nang jang nghut nyi lhê; ngá é matú hkasû é yhûm saí byi shi kó râ lúh? Ngò nô yù râ jang gi, hkâmá nghut kó râ lúh?

<sup>50</sup> Haú banshoq lé ngá é loq èq baú saí tô é a nghut kó lúh? ga luí, haú Yhumsîng taí ri. <sup>✠</sup>

gâ ri.

<sup>51</sup> I-myt htân mù, i-myt eq nohkyap má ahyo-kuq a hpyit é bang\* ê, nungmoq gi, nungmoq é îchyí îwâ pé su, Chyoiyúng Woi-nyí lé hkâ-nhám le lhom he-ngik pyâm nyi akô; <sup>52</sup> Nungmoq é îchyí îwa pê èq a zing-rî wú é myiqhtoi, ó yuq wá nyi lhê lúh? Haú Dingmán Sû pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuî, nungmoq le, haú Dingmán Sû lé ap pyâm é bang eq sat pyâm é bang nghut nyi akô.

<sup>53</sup> Maumang lagyô èq shit kyo byî é tarâ lé nungmoq wó yù kôlhang, haú lé a cháng kó nghut ri." gâ ri.

### *Stehpan Lé Luqgok Èq Dú Sat É Hkyô*

<sup>54</sup> Haú hkyô lé yhangmoq wó gyo kôjáng, yhangmoq é nhiklhûm má lûm htaú záng kô é yanmai, Stehpan lé, zui wang ngat kyáng shoq wú nhik-yô nyi akô. <sup>55</sup> Stehpan kúm gi, Chyoiyúng Woi-nyí byíng mù, mauhkûng shut tu wú kat le, Garai Gasâng é hpungwup shingkang lé le, Garai Gasâng é loqyo hkyam shut Yesuq yap tô é lé le, myang ri.

<sup>56</sup> Haú mù, yhang gi, "Wú keq, mauhkûng hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri." ga taí kat ri.

<sup>✠</sup> 7:50 Esai 66:1-2      \* 7:51 I-myt eq nohkyap má ahyo-kuq a hpyit é bang gâ é gi, Garaî dang lé a lùm a châng é bang lé gâ lhê.

<sup>57</sup> Haú hkûn, yhangmoq gi, htê mó o mó garu uchyang, yhumsing é nohkyap xaú pyám mù, radá dâm yhang lé chôm htim kômù, <sup>58</sup> yhang lé wà mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyî wang má yhangmoq é buhîng pé lé hkyut bum tô akô.

<sup>59</sup> Luqgok èq dú nyi bùm kô é u lé, Stehpan gi, "Yhum-sîng Yesuq ê, ngá é woi-nyí lé hap yù laq." ga kyûdûng ri. <sup>60</sup> Hau htâng, yhang gi, hkyihput htuoq mù, "Yhumsîng ê, yhangmoq kut é mara haú lé hkyut pyám byi laq." ga luí, htê mó èq wut dûng ri; haú ban táí jáng, yhang kâng byit byuq bê nghut ri.

## 8

### *Hpúng Byû Lé Sholuq Zing-rî É Hkyô*

<sup>1</sup> Sholuq gi, haú má nyi to mù, Stehpan lé sat pyâm é muzó má myit bo huí ri.

Haú nyí mai, Yerusalem wà mó mâ é noqkuq hpúng gi, zing-ri mó huí lo é nghut mù luí, lagyô pé mai lai luí, lumjîng bang lhunglháng gi, Yuda mau eq Samariq mau jowò hkangmó má byo myín ló bekô. <sup>2</sup> Nghut kôlhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huí nyi akô nghut ri. <sup>3</sup> Sholuq kúm gi, rayhum htâng rayhúm wàng mù, myiwe yuqgè lé she hkyut htoq yû luí, htóng má lhûng tô é dông mai, noqkuq hpúng haú lé lhoq hpyoq ló nyi ri.

### *Samariq Wà Má, Gabú Danglù Hkô Kyô É Hkyô*

<sup>4</sup> Byo htoq ló é bang kúm gi, jé é jowò hkangmó má mungdang lé hkô kyô ló akô. <sup>5</sup> Haú hkûn, Hpilip gi, Samariq mau mâ é myuq ra-myuq shut e ló mù, Hkrisduq é hkyô lé hkô kyô ri. <sup>6</sup> Byù ajùm ayò gi, Hpilip táí kyô é hkyô lé wó gyô é eq, yhang tân shit é limik kumlhá lé myàng

kôjáng, i-myt rahkat za eq yhâng é dang chôm gyô nyi bum akô. <sup>7</sup> Nat wang júng é byù myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyî htên é bang myo myo le, ge ló byuq bum akô. <sup>8</sup> Haû mù luî, haû myuq má gabú hkyô gyai yhang wó bekô nghut ri.

### *Myoqheq Sará Simun É Hkyô*

<sup>9</sup> Simun gâ é byù rayuq gi, hí lé haú myuq má myoqheq hpaqchyî kut shit mù, Samariq byu pé lé lhoq maú luî, yhâng gùng lé yhang, laklaí sù nghut lhê gâ ri. <sup>10</sup> Byù tiq ko banshoq le, "Byù shí yuq gi, 'haû a-tsam mó' gâ é, Garaí chyáng mai hpungwup a-tsam wó yû sù nghut ri." ga luî, yhâng é dang lé gyô bum akô. <sup>11</sup> Haú yuq gi, myáng myáng yhâng é myoqheq hpaqchyî eq yhangmoq lé lhoq maú lo é yanmai, yhâng dang lé chôm lum bum akô. <sup>12</sup> Nghut kôlhang, Hpilip hko kyô é Garai Gasâng é mingdán hkyô eq, Yesuq Hkrisduq é myìng eq sêng é gabú danglù hkyô lé, lumjìng kôjáng, myiwe yuqgè wui-myhup hkâm yu bum akô. <sup>13</sup> Simun yhang yhang le lumjìng mù luî, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

<sup>14</sup> Garaí Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô. <sup>15</sup> Yhangnhik gi, lé jé jáng, byù haú bang Chyoiyúng Woi-nyí wó yû râ matú kyûdung byî akô. <sup>16</sup> Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsîng Yesuq é myìng mai wui-myhup hkâm yu é za ru nghut bùm ashî. <sup>17</sup> Haû mù luî, lagyô nhik yhangmoq é ahtoq má loq ke byi

jáng, yhangmoq gi, haû Chyoiyúng Woi-nyí lé wó hkâm yù bekô nghut ri.

<sup>18</sup> Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù, <sup>19</sup> "Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yû râ matú, haú su é a-tsam ngo lé le byi kó laq." ga dung ri.

<sup>20</sup> Petruq kúm gi, "Garai Gasâng é chyunghuq lé ngun èq wó wui yù râ nghut lhê ga luî, myit é yanmai, náng é ngùn gi, nàng eq rahá htên byoq byuq sháng gaq. <sup>21</sup> Nàng gi, Garai Gasâng é hí má myit a dítng sù nghut é yanmai, shí hkyô má nàng wó bo lóm râ a nghut. <sup>22</sup> Haú mù luî, shí agè ashop é hkyô mai myit lhîng mù, Yhumsîng Garaí chyáng dúng tôngbán aq. Haú hkûn, náng é unghkaû má myit pyâm é hkyô lé, mara hkyut pyám byi abe. <sup>23</sup> Nàng gi, ladu lai shoq nhikhko zo mù, yubak marâ èq tû zing to huî é lé, ngò myàng ri." ga yhang lé tâ ri.

<sup>24</sup> Haú hkûn, Simun gi, "Nungnhik taî é hkyô haî le ngá chyáng a jé sháng gaq, ngá é matú haû Yhumsîng chyáng kyûdung byi kó laq." ga tû tâ ri.

<sup>25</sup> Yhangnhik kúm gi, haû Yhumsîng é mungdang lé saksé hkám mù ban hko kyo jáng, Samariq byu pê é wà myo myo má, haû gabú danglù lé hko kyo uchyang, Yerusalem wà mó shut dum taû lò bekô nghut ri.

### *Hpilip Eq U-nuk Nhik É Hkyô*

<sup>26</sup> Ahkuî, Yhumsîng é maumang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyî shut nyâng za e ló aq. Hkyô haû gi, yoso hkyô nghut lhê." ga tâ ri. <sup>27</sup> Haú hkûn, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà

mó má ê mù, <sup>28</sup> dum taû lo é hkûn, yhâng é myanglhêng má zùng luí, myiqhtoi Esai-aq laiká lé nghap nyi ri. <sup>29</sup> Woi-nyí gi, Hpilip lé, "Myanglhêng shut chyâng e ló aq." ga taí ri.

<sup>30</sup> Haû mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lhú?" ga luí, yhang lé myí ri.

<sup>31</sup> Haú yuq gi, "Mhoqshit sù yuq a nyi le, ngò hkâsu kut sê gyo râ lhú?" ga tû taí mù, yhang eq rahá lo doq zùng aq ga Hpilip lé lung ri.

<sup>32</sup> Yhang nghap é Chyúmdang gi,  
"Sat râ sau lé su, Yhang lé she e ló bê nghut ri;  
sau zo gi, sau maú nyhám su é hí má zim za nyi tô é su,  
Yhang le nhut a hpông é za nyi tô ri.

<sup>33</sup> Yhânggùng lé lhoq shôm pyâm to huí é hkûn, Yhang lé a tara é dông doqdân pyám bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lhú?"☆

gâ ri.

<sup>34</sup> Haú hkûn, haû u-nuk wa gi, Hpilip lé, "Haû nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lhê lhú? Yhânggùng lé taí é nghut lhê lhú? Haû a nghut jáng, góyuq é hkyô lé taí é nghut lhê lhú?" ga myí ri. <sup>35</sup> Haú hkûn, Hpilip gi, Chyúmdang haû lé yù mù, Yesuq eq sêng é gabú danglù lé taí kyô ri.

<sup>36</sup> Haû su e ló kô le, wuì joq é má jé jáng, haû u-nuk hpó gi, "Wú aq, shí má wuì joq tô ri, wui-myhup hkâm yù râ matú ngo lé hkúm râ jang haí joq ashí lhú?" ga taí ri. <sup>37</sup> Hpilip gi, "Náng i-myit banshoq èq, nàng lumjúng bê nghut le gi, hkâm yu le ge lhê." ga taí ri; yhang le, "Yesuq Hkrisduq gi, Garai Gasâng é Yhangzo nghut é lé,

☆ 8:33 Esai 53:7-8

ngò lumjìng bê." ga tû taí ri.\* <sup>38</sup> Haú hkûn, yhâng é myanglhêng hkying nhâng mù, yhangnhik wuì má gyó wâng luí, Hpilip gi, u-nuk hpó lé wui-myhup hkám byí ri. <sup>39</sup> Wuì hkaú mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôlhang, yhang gi, e ló é hkyô shut gabú myit èq xoq sô e ló bê nghut ri. <sup>40</sup> Hpilip kúm gi, Azutu wà má lo htoq jé kat mù luí, Kesare wà mó jé shoq haú mau mâ é myuq pé wà pé hkgangmó má gabú danglù hkô kyô wún ri.

## 9

### *Sholuq Lhik Wang Lo É Hkyô*

<sup>1</sup> Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luí, hkyangjong mó chyáng ê mù, <sup>2</sup> Yhumsing é Hkyô lé lumjìng é myiwe yuqgè myàng mi-myàng lé chyup yû luí, Yerusalem wà mó shut wó she ló râ matú, Damaskuq myuq mâ é tarajong pé má byi râ laiká pé lé dúng chûng ri. <sup>3</sup> Yhang e ló le, Damaskuq myuq eq chyáng ló nyi é hkûn, yhâng é lhîngkyuq má mauhkûng mai dàn loq tung duqbó htoq ló ri. <sup>4</sup> Yhang myigùng má lêng ngop tô é u lé, "Sholuq, Sholuq, nàng ngo lé haí mù zing-rí nyi lhê lú?" ga luí, yhang lé taí é htê wó gyô ri.

<sup>5</sup> Haú hkûn, yhang gi, "Yhumsîng ê, nàng gi, ó yuq nghut lhê lú?" ga myi jáng, haú Yhumsîng gi, "Nàng zing-rí nyi é Yesuq nghut lhê, <sup>6</sup> toq aq, myuq shut wang ló aq. Nàng zui saí râ hkyô lé lhom taí kyo râ nghut lhê." ga tû taí ri.

<sup>7</sup> Yhang eq rahá e ló é luzúm wuì gi, htê haú wó gyo kôlhang, ó yuq lé le a myàng kô é yanmai, maú hong yap tô

\* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.



bum akô. <sup>8</sup> Sholuq toq mù, myoq hpông kat wú le, haí lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí wang ló akô. <sup>9</sup> Sholuq gi, sum nyí tup myoqjit byuq mù luí, a zo a shuq é nyi byuq ri.

<sup>10</sup> Damaskuq myuq má Anani gâ é chángzo rayuq nyi ri. Yhumsîng gi, yhang lé, "Anani ê." ga shing-rán đông wut ri.

Yhang gi, "Yhumsîng ê, shí má nyi lhê." ga tû taí ri.

<sup>11</sup> Haú Yhumsing dum taí é gi, "Toq aq, Hkyô-Nyàng gâ é wà hkyô shut ê mù, Yudaq é yhûm má, Tarshu byù Sholuq lé ê hô aq, yhang gi, kyûdûng nyi ri. <sup>12</sup> Yhang gi, Anani ga sù wang lé lô mù, yhâng é myoq dum myàng sháng gaq ga, yhâng é ahtoq má loq ke byî é lé, shing-rán đông myàng bê nghut ri." gâ ri.

<sup>13</sup> Anani kúm gi, "Yhumsîng ê, shí yuq gi, Yerusalem wà mó má, náng é sân-yúng bang lé a ge é đông hkâ-myhó kut lai lo é hkyanglù lé ngò myo myo wó gyô wú bê; <sup>14</sup> Shí pé má le, náng é myìng lé lêng é bang banshoq lé chyup râ ga, hkyangjong agyi pê chyáng mâ é ahko ahkáng wó yu to sù nghut ri." ga tû taí ri.

<sup>15</sup> Nghut kôlhang, Yhumsîng gi, "Ru ê aq, shí yuq gi, tûngbàu pé eq yhangmoq é hkohkam pê é hí má le, Israelaq byu pê é hí má le, ngá é myìng lé wùn waq râ matú, ngò chûng râ nghû luí hkyin to sù nghut lhê; <sup>16</sup> Ngá mying é yanmai hkâ-í hpuzo ra hkyô lé, Ngò, yhang lé tûn shit râ nghut lhê." ga taí ri.

<sup>17</sup> Hau htâng, Anani gi, jé ê mù, yhûm haú má wàng luí, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsing Yesuq èq ngo lé nhang kat é nghut lhê." ga taí ri. <sup>18</sup> Haú hkûn jáng, Sholuq é myoq mai akyap sù é wuí

gyó byuq mù, yhang myoq dum wó myâng bê. Haú hkûn, yhang gi, toq mù wui-myhup hkâm yù luí, <sup>19</sup> zoshuq lé zo mù, wum-o dum lhoq pyîng yù bê nghut ri.

*Sholuq, Damaskuq Myuq Má Mungdang Hko É Hkyô*

Hau htâng, yhang gi, Damaskuq myuq mâ é chángzô pé eq rahá rayoq zo zùm yap nyì uchyang, <sup>20</sup> Yesuq gi, Garai Gasâng é Yhangzo nghut é hkyô, haú hkûn jáng tarajong pé má hko kyô nyì bê nghut ri. <sup>21</sup> Sholuq é dang lé wó gyô é lhunglhâng bang gi, maú byuq bùm kômù, "Shí yuq gi, Yerusalem wà mó má myìng haú lîng é bang lé lhoq hten lhoq hpyoq sù nghut lhê, a nghut kó lhú? Ahkuí, shí má le, haú su é bang lé chyup yù mù, hkyangjong agyi pè chyáng ló ap râ da luí jé lé é sù a nghut kó lhú?" ga myi bum akô. <sup>22</sup> Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tân shit ri.

<sup>23</sup> Buinyí tsómra myáng é htâng má, Yudaq byu pé gi, yhang lé sat pyám râ matú haq dá akô. <sup>24</sup> Nghut kôlhang, yhangmoq dá é hkyô lé Sholuq sê pyâm ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. <sup>25</sup> Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

*Sholuq, Yerusalem Wà Mó Má Taú Jé Lo É Hkyô*

<sup>26</sup> Hau htâng, yhang gi, Yerusalem wà mó má jé lo é hkûn, chángzô pé eq zùm yap râ matú shikut wú kôlhang, yhang gi, chángzo dut bê hkyô lé a jíng kô é yanmai, lhunglhâng bang gi, yhang lé gyuq bum akô. <sup>27</sup> Barnaba kúm gi, Sholuq lé lagyô pè chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq èq yhang lé taí é dang wó gyô é hkyô lé le, Damaskuq myuq má Yesuq é myìng mai gyuq myit a bo é za hkâsu kut

hko kyô é hkyô lé le, yhangmoq lé taî kyô ri. <sup>28</sup> Haû mù, Sholuq gi, yhangmoq eq rahá Yerusalem wà mó má htoq htoq wàng wàng kut nyî uchyang, Yhumsîng é myîng mai a gyuq a kyum é za hko kyô nyi ri. <sup>29</sup> Grik dang nyo é Yudaq byu pé eq le, taî he lhûm nyi akô; nghut kôlhang, yhangmoq gi, yhang lé sat pyám râ dâ akô. <sup>30</sup> Haû hkyô lé, gumang wuî sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

<sup>31</sup> Yuda mau, Galile mau eq Samariq mau jowò hkgámó mâ é noqkuq hpúng gi, haû yoq pé má, lhoq ging lhoq tîng é hkyô wó yû mù, ngingón nyi akô; haû Yhumsîng lé gyuq hkunggâ é hkyô má le, Chyoiyúng Woi-nyí èq lhoq pun lhoq kyîng é hkyô pé má le châng nyi mù, myô jat lo bùm bekô nghut ri.

#### *Ainea Ge Byuq É Hkyô*

<sup>32</sup> Haû hkûn, Petruq gi, haû mau pé má hkat kûm wún uchyang, Ludaq wà mó má nyi é sân-yúng bâng chyáng ê jé ri. <sup>33</sup> Haû wà má, gùngjum shî luî shit zân tup yhupjang mai a wó toq é Ainea gâ é byù rayuq lé é myang ri. <sup>34</sup> Haû mù, Petruq gi, "Ainea ê, Yesuq Hkrisduq, nang lé lhoq gê byi bê nghut ri, toq mù, náng é yhuphpú hen yù aq." ga luî, yhang lé taî ri. Haû hkûn jáng, Ainea wó toq yap bê nghut ri. <sup>35</sup> Ludaq eq Sharon pá má nyi é lhunglhang bang gi, haû yuq lé myàng mù luî, Yhumsîng Yesuq chyáng lhing wang lo bum akô.

#### *Dorka Ga Sû Dum Dui Lo É Hkyô*

<sup>36</sup> Ahkuî, Yopa myuq má Tabihita gâ é chángzo myiwe rayuq nyi ri; myîng haû lé Grik dang dông gi, Dorka\* gâ é nghut lhê. Myiwe haû gi, ge é muzó kut nyi é sù eq, asho awuî bang lé alu byî nyi é sù nghut ri. <sup>37</sup> Haû u lé, yhang

\* <sup>9:36</sup> Dorka gâ é lichyúm gi, "chochî" gâ é nghut lhê.

gi, nòhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô. <sup>38</sup> Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

<sup>39</sup> Haú hkûn, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuî hâng yu akô. Chuimó myhî pé lhunglhâng bang gi, yhâng nàm má yap mù ngàu uchyang, yhangmoq eq rahá nyi tô ashî hkûn Dorka hkyup é buhîng eq gotû mebu pé lé tân shit nyi akô.

<sup>40</sup> Petruq kúm gi, lhunglhâng bang lé htoq ló nhâng mù, hkyihput htuoq luí, kyûdung mù, mâng shut lhing wú luí, "Tabihta ê, toq aq!" ga taí ri, haú hkûn myiwe haú myoq hpóng lô mù, Petruq lé myàng jáng, toq zung lo ri. <sup>41</sup> Petruq gi, loq lhâm kat mù yhang lé lǎng toq yù luí, lumjǐng bang eq chuimó myhî pé lé wut yù mù, duì gû ap byî ri. <sup>42</sup> Haú hkyô lé, Yopa myuq mâ é bang banshoq wó gyô ló kômù luí, byù myo myo gi, haú Yhumsîng Yesuq lé lumjǐng bum akô nghut ri. <sup>43</sup> Haú mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

## 10

### *Koneli É Shing-rán*

<sup>1</sup> Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê. <sup>2</sup> Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhám le kyûdûng nyi ri.

<sup>3</sup> Ra-nyí lé, myinhtâng sum hkyíng kô má, Garai Gasâng

é maumang lagyo rayuq gi, yhâng chyáng jé mù, "Koneli ê." ga luî, yhang lé wut é lé, shing-rán mai de de myang ri.

<sup>4</sup> Haû mù, haú yuq lé wú tsuq to mù, "Yhumsîng ê, hai hkyô nghut lhê lú?" ga gyuq myit eq myî ri.

Maumang kúm gi, "Náng é kyûdung dang eq alu byî é hkyô gi, Garai Gasâng é hí má, hkungga masat dông hkyâng bê nghut ri. <sup>5</sup> Ahkuî, Yopa myuq shut byù nhang kat mù, Petruq gâ é sù Simun lé ê shuî lò nhâng aq. <sup>6</sup> Yhang gi, wuimau yàm mâ é, shokuq hkyup zô é Simun yhûm má bíng nyi ri." ga taî ri.

<sup>7</sup> Koneli gi, yhang eq dang taî é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù, <sup>8</sup> dut laî lo é hkyô banshoq, yhangmoq lé taî kyo luî, Yopa myuq shut nhang kat ri.

### *Petruq É Shing-rán*

<sup>9</sup> Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung râ ga, yhumhkûng shut doq ló ri. <sup>10</sup> Haú hkûn, yhang gi, zòmut luî rajung jung zô nau nyi ri; nghut kôlhang, zoshuq ru gaí nyi ashî le, yhang moq byuq ló mù myoqwup shing-rán myang é gi, <sup>11</sup> mauhkûng bóng lô mù, hpajóng mó sù é lé, myi chyûn má zui luî myigùng shut lhoq hkyô kat é azíng lé myang ri. <sup>12</sup> Haú hkaû má, myigùng htoq mâ é hkyî myi hkyî dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri. <sup>13</sup> "Petruq ê, toq mù, sat zo aq." gâ é danghtê le mying htoq lo ri.

<sup>14</sup> Petruq kúm gi, "Yhumsîng ê, haû gi, a wó dut, achauq achyut é eq a sansêng é zè lé, ngò hkâ-nhám le a zô wú." ga tû taî ri. ☆

---

☆ 10:14 Nhong 11 lé wú aq.

<sup>15</sup> Haú hkûn, "Garai Gasang lhoq san lhoq séng bê zè lé, a sanséng hkâ-nghû." ga luí, yhang lé dum taí kat ri.

<sup>16</sup> Haú su ga sum dâm taí é htâng má, zè haú lé radá dâm mauhkûng shut wup yu ló bê nghut ri.

<sup>17</sup> Ahkuí, Petruq gi, yhang myang é shing-rán lé haí wá nghut lhê lhú ga luí, myit maú nyi é hkûn, haú Koneli nhang kat é bang gi, Simun é yhûm lé myang hô kômù, hkumtot má yap to luí, <sup>18</sup> Petruq gâ é sù Simun, yhûm haú má nyi a nyi é lé, wut myí wú akô.

<sup>19</sup> Petruq gi, shing-rán haú lé ru myit wú nyi ashî le, Woi-nyí gi, "Wú aq, byù sum yuq nang lé ho nyi akô, toq mù gyó ló aq; <sup>20</sup> yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo ló aq." ga taí ri.

<sup>21</sup> Haú mù, Petruq gi, haú bâng chyáng gyó ló luí, "Nungmoq hô nyi é sù gi, ngò nghut lhê, haí ra luí lé kô é lhú?" ga myí ri.

<sup>22</sup> Yhangmoq taí é gi, "Dingmán é, Garai Gasang lé gyuq hkunggâ é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taí é dang gyo yù râ matú, yhang lé chyoyúng maumang lagyô èq taí shit kyô é hkyô lé wó yû luí, ngamoq lé nhang kat é nghut lhê." ga akô. <sup>23</sup> Haú mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq mâ é gumang wui ra-am le châng akô nghut ri.

### *Koneli Lé Petruq Huí É Hkyô*

<sup>24</sup> Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wui eq buinùm ji-myi wui lé ji tsíng to mù, yhangmoq lé lánng nyi ri.

<sup>25</sup> Petruq wang ló jánng, Koneli gi, te yù mù, yhâng é hkyí

wang má paî gop noqkuq ri. <sup>26</sup> Petruq kúm gi, "Toq aq, ngò le byù ru nghut lhê." ga luî, taí uchyang yhang lé tu toq ri.

<sup>27</sup> Haû mù, Petruq gi, yhang eq dang nyô uchyang wang ló wú le, byù myo myo zup zîng tô bum é lé myang ri.

<sup>28</sup> Haú hkûn, yhang gi, yhangmoq lé, "Yudaq byù rayuq gi, noqkuq htûng dông tûngbàu rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhang, ó yuq lé le achaaq achyut dut ri, a sanséng dut ri nghû a ge taí é hkyô lé gi, Garai Gasang, ngo lé tûn shit bê. <sup>29</sup> Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haû mù luî, haî ra kô é yanmai, ngo lé ji akô nghû ngò myí nau ri." ga taî ri.

<sup>30</sup> Haú hkûn, Koneli gi, "Laî lò bê myi nyí nyí, myinhtâng sum hkyíng má, ngá é yhûm má, ngò kyûdûng nyi le, danso loq, duqbó é mebu wut é byù rayuq ngá é hí má yap htoq shit mù, <sup>31</sup> 'Koneli ê, Garai Gasang gi, náng é kyûdung danghtê lé le gyo byi bê; nàng alu byí é hkyô lé le, bun byi bê nghut ri. <sup>32</sup> Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yàm mâ é shokuq hkyup zô é Simun yhûm má bíng nyi ri.' ga taî ri. <sup>33</sup> Haû mù luî, haú hkûn jáng ngò náng chyáng byù nhang kat bê nghut lhê. Ahkuî, nàng jé é gi, gyai gê bê nghut ri. Yhumsîng yhang nang lé taí nhang é gû banshoq gyô yù râ matú, ahkuî ngamoq lhunglhang bang Garai Gasâng é hí má nghut nyi lhê." ga taî ri.

### *Petruq Hko Kyô É Mungdang*

<sup>34</sup> Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuî ngò gè gè yhang sé bê. <sup>35</sup> Byù myû chângjup má, Yhang lé gyuq hkunggâ é eq tengmán é muzó jizó saî é sù gi, Yhang é hí má myoqdong

wó nyi ri. <sup>36</sup> Nyì mi-nyì, joq mijoq é Yhumsîng, Yesuq Hkrisduq é yanmai, ngingón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung za, <sup>37</sup> baptisma hkyô lé, Yohan hko é htâng, Galile mau mai Yuda mau banshoq má taì pyo ló é hkyô lé, nungmoq sé gû nghut nyi lhê. <sup>38</sup> Haù gi, Garai Gasâng èq Chyoiyúng Woi-nyí eq wum-o a-tsam byì to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat èq zing-ri huì é bang banshoq lé lhoq gê byì wún ri.

<sup>39</sup> Haù mù, Yudaq byu pê é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haù yuq lé yhang, yhangmoq sik zîng má jén sat pyám bekô nghut ri. <sup>40</sup> Garai Gasang kúm gi, sum nyí nghû râ buinyì má, haù yuq lé lhoq dui toq kat é nghut mù luì, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri. <sup>41</sup> Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê. <sup>42</sup> Yhang gi, asak dui é bang eq shì bê bâng é tarâ agyì kut râ matú, Garai Gasâng èq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri. <sup>43</sup> 'Yhang lé lumjîng é bang yuq hkangmó gi, Yhâng é mying é yanmai, yubak hkyut pyám byì é hui kó râ nghut lhê.' ga luì, taì é myiqhtoi banshoq gi, Yhâng é hkyô lé saksé hkam byì é bang nghut nyi akô." ga taì ri.

*Chyoiyúng Woi-nyí Lé, Tungbaù Pé Wó Hap Yu É Hkyô*

<sup>44</sup> Petruq gi, haù hkyô lé ru taì nyi ashî le, dang haù wó gyô é banshoq bâng ahtoq má Chyoiyúng Woi-nyí gyó jé



lo ri. <sup>45</sup> Tûngbaù pê é htoq má lhang Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjínq bang Yudaq byu pé gi, maú bum akô. <sup>46</sup> Hkâsu mù gâ le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

<sup>47</sup> Haù mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó yuq wó hkûm to râ lú?" ga taí ri. <sup>48</sup> Hau htâng, yhang gi, yhangmoq lé Yesuq Hkrisduq é myìng lang luí wui-myhup hkâm yù râ matú pyìng tô ri. Haú hkûn, yhangmoq gi, Petruq lé buinyì ra-í nyí, nyi gyó shi aq ga chôm hkûm akô.

## 11

### *Petruq, Yhang Kut É Muzó Lé Shit Kyô É Hkyô*

<sup>1</sup> Tûngbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô. <sup>2</sup> Haù mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjínq bang gi, <sup>3</sup> "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

<sup>4</sup> Haú hkûn, Petruq gi, haù dut lò bê hkyô lé awang mai ahpyo hpyot, yhangmoq lé taí sân kyô hi kat é má, <sup>5</sup> "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri. <sup>6</sup> Haù lé rago za saí wú le, myigùng htoq má hkyî myi hkyî dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luí, myit wú nyi é hkûn, <sup>7</sup> 'Petruq ê, toq mù, sat zo aq.' gâ é danghtê lé, ngò wó gyô ri.

<sup>8</sup> Ngò kúm gi, 'Yhumsîng ê, haú gi, a wó dut, achaq achyut é eq a sansêng é zè, ngá é nhut má hkâ-nhám le a wang wú.' nghû taí kat é nghut lhê.

<sup>9</sup> Haú hkûn, 'Garai Gasang lhoq san lhoq yúng bê zè lé, a sanséng hkâ-nghû.' ga luí, mauhkûng mai dum taí kat ri. <sup>10</sup> Haú su ga sum dâm taí é htâng má, haú pé banshoq lé mauhkûng shut dum wup yu ló bê nghut ri.

<sup>11</sup> Haú hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô. <sup>12</sup> Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taí ri; shî gumang hkyuq yuq le ngò eq rahá ê mù, Koneli é yhûm má ngamoq wang é. <sup>13</sup> Haú hkûn, haú yuq gi, yhâng é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyô èq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq; <sup>14</sup> nàng eq náng yhumbyù lhunglhâng bang hkyi yù hui râ danglù, yhang, náng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

<sup>15</sup> Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. <sup>16</sup> Haú hkûn sheq, ngò gi, 'Yohan gi, wui èq wui-myhup hkám byí ri; nungmoq kúm gi, Chyoiyúng Woi-nyí èq wui-myhup hkám byí é hui kó râ nghut lhê.' ga luí, Yhumsîng taí é dang lé bûn kat ri. <sup>17</sup> Haú mù luí, Yhumsîng Yesuq Hkrisduq lé lumjîng é hkûn, ngamoq lé Garai Gasâng jeju chyunghuq byí é su, Yhang, yhangmoq lé le byí é nghut le gi, ngò gi, hkâsú é byù nghut luí, Garai Gasang lé wó lhom hkûm pyám râ lhú?" ga taí ri.

<sup>18</sup> Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tûngbaù pé

lé le, asak duì râ matú myit lêng hkyô byi bu-nhung!" ga luí, Garai Gasang lé chôm hkyá-ôn akô nghut ri.

*Antioku Wà Mâ É Noqkuq Hpúng*

<sup>19</sup> Ahkuí, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu pé lé baú za, mungdang haú hko kyô akô nghut ri. <sup>20</sup> Nghut kôlhang, yhangmoq mâ é Kupru byù eq Kuruni byù ram gi, Antioku wà mó má châng jé ló kômù, Yhumsíng Yesuq é gabú danglù lé, Grik pé lé le taí kyô bum akô. <sup>21</sup> Haú Yhumsing é loq gi, yhangmoq eq rahá nghut nyí mù luí, byù myo myo gi, lumjíng mù, Yhumsing chyáng lhing wang lo bùm bekô nghut ri.

<sup>22</sup> Haú bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akô. <sup>23</sup> Yhang jé é hkûn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhiklhum banshoq eq haú Yhumsíng má lhumzuí nyi râ matú, lhunglhang bang lé myit wum byí ri. <sup>24</sup> Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjíng myit le byíng tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekô nghut ri.

<sup>25</sup> Hau htâng, Barnaba gi, Sholuq lé ê hô râ ga Tarshu myuq shut ê mù, yhang lé myàng jáng, Antioku wà mó má shuí lo ri. <sup>26</sup> Haú mù, yhangnhik gi, razàn gón noqkuq hpúng haú eq rahá zum nyi kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myèng lé, Antioku wà mó má sâng-hi wó yù bekô nghut ri.

<sup>27</sup> Haú u lé, myiqhtôí pé ra-am gi, Yerusalem wà mó mai, Antioku wà mó má lé jé bum akô. <sup>28</sup> Haú bang mâ é Agabu gâ é sù gi, toq yap mù, Romaq mingkan tîng má mutmó

gyó lô râ nghut é hkyô lé, Woi-nyí èq tân shit é đông tái kyô ri; (Haû gi, hkohkâm Klodi é pyat má dut bê nghut lhê.) <sup>29</sup> Haû mù luí, chángzô pé gi, Yuda mau mâ é gumang wui lé, ó le ó wó dut é myhó garum kat râ ga, myit hpyit yu bum akô. <sup>30</sup> Haû eq rajung za kut kômù, yhangmoq gi, chyunghuq haû pé lé Barnaba eq Sholuq nhik é loq mai suwún wui pê chyáng hun kat bekô nghut ri.

## 12

### *Petruq, Htóng Mai Wó Lut Htoq Lo É Hkyô*

<sup>1</sup> Haû u lé, Herut hkohkâm gi, hpúng byû ra-am lé chyup yû mù, zing-ri râ ga ngantsâ nyi ri. <sup>2</sup> Haû mù, Yohan é yhangmang Yakuq lé sham èq sat pyám nhang ri. <sup>3</sup> Haû hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haû dut é gi, mún a kat é muk zo poî u lé nghut ri. <sup>4</sup> Herut gi, Lhoqlhai Poî lai jáng sheq, mingbyû wui hí má jéyáng râ ga myit tô é yanmai, yhang lé chyup yu é htâng má, htóng má lhùng to mù, yhang lé zúng râ matú, gyè myi yuq yuq kut myi hpúng lé ap tô ri.

<sup>5</sup> Haû mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chòm dung byi nyi akô nghut ri.

<sup>6</sup> Petruq gi, Herut èq yhang lé jéyáng râ matú she htoq yû râ hí myin lé, shamtoq-tui í hkat èq tuí é hui luí, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô. <sup>7</sup> Haû hkûn, Yhumsing é maumang lagyo rayuq lé htoq shit mù, gok haû má duqbó lo ri. Maumang lagyo haû gi, Petruq é namcham má ê hpuk kat mù, "Myap toq wú aq." ga nhaû ri; haû hkûn, Petruq é loq mâ é toqjâng tui pé le gyut gyó lô bê nghut ri.

<sup>8</sup> Maumang dum taí é gi, "Hpyihit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri. <sup>9</sup> Haú hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri. <sup>10</sup> Ahkuî, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik htoq luî, wà hkyô rahkat má sô ló le, maumang lagyo gi, haú hkûn jáng, yhâng chyáng mai gâng ló byuq bê nghut ri.

<sup>11</sup> Ahkuî, Petruq gi, dum bûn gyíng lò jáng, "Yhumsíng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuî ngò gè gè sé bê." ga taí ri.

<sup>12</sup> Haú hkyô lé myit sê kat jáng, yhang gi, byù myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé ló ri. <sup>13</sup> Haú mù, yhang gi, yhûm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri. <sup>14</sup> Yhang gi, Petruq é htê nghut é lé sê gyô kat jáng, lûm gabú luî hkum a hpóng byi shî é za, yhúmhaú shut din wang ló mù, "Petruq gi, hkum mhó lut má lo yap tô ri." ga ló taí kyô ri.

<sup>15</sup> Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut âng ri." ga taí akô.

<sup>16</sup> Nghut kôlhang, Petruq gi, hkum ru bat nyî mù, yhangmoq hpông kat é hkûn, yhang lé myàng kôjáng, chôm maú byuq bum akô. <sup>17</sup> Yhang gi, yhangmoq lé zim za nyi keq ga loq lik shit mù, yhang lé Yhumsíng èq htóng

mai hkâsu kut shuî htoq yu é hkyô lé taî kyo luî, "Shí hkyô lé Yakuq eq gumang wuî lé taî kyô kat keq." ga taî ri. Hau htâng, yhang htoq ló luî, jowò gó shut e ló bê nghut ri.

<sup>18</sup> Ahkuî, maubó jáng, gyezô pé gi, Petruq haî dut byuq é hkyô lé a sé kô é yanmai, gyai maú gabyông bum akô.

<sup>19</sup> Herut kúm gi, Petruq lé ho wú le a myàng jáng, zúng é bang lé myî gôn wú mù, yhangmoq lé sat pyám râ matú hkunmó hkyô ri.

### *Herut Hkohkâm Shi Byuq É Hkyô*

Hau htâng, yhang gi, Yuda mau mai Kesare wà mó má gyó ló mù ló nyi nyi ri. <sup>20</sup> Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luî, yhangmoq gi, myit rahkat zâ èq yhâng chyáng ê mù, Blastu gâ é, hkohkâm wa lum tô é suwún hpó lé ê lúm hkaú mù, simsaq hkyô ê dúng akô. Hkâsu mù gâ le, yhangmoq é zoshuq wó râ matú gi, Herut é ming lé lùm hkaú nyi kô é yanmai nghut ri.

<sup>21</sup> Haú hkûn, ding lhûm tô é buinyi má, Herut gi, hkohkâm hking wut chûng mù, hkohkâm tanghkuq má zùng luî, yhangmoq lé hkohkâm mungdang byî ri. <sup>22</sup> Haú jáng, mingbyû wuî gi, "Htê shî gi, waxâng byu é htê a nghut, garai wá é htê sheq nghut ri." ga garû bum akô. <sup>23</sup> Radá dâm, Herut gi, Garai Gasâng é hpungwup shingkang lé a tê byî é yanmai, Yhumsing é maumang lagyo gi, yhang lé dâm byi luî, yhang gi, luq èq hkê é hui mù, shi byuq bê nghut ri.

<sup>24</sup> Haú Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

<sup>25</sup> Barnaba eq Sholuq nhik gi, Yerusalem wà mó má yhangnhik saî tûm nyi é muzó ban saí jáng, Markuq gâ é Yohan lé shuî chûng mù, Antioku wà mó shut taû ló bekô nghut ri.

## 13

*Barnaba Eq Sholuq, Hkyin Nhang Kat Huî É Hkyô*

<sup>1</sup> Ahkuî, Antioku wà mó mâ é noqkuq hpúng má, myiqhtoî pé eq sará pé le lom nyi akô. Haú bang gi, Barnaba, Niger\* gâ é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akô. <sup>2</sup> Yhangmoq gi, zoshuq gám luî Yhumsíng lé noqkuq dojaú nyi é hkûn, Chyoiyúng Woi-nyí gi, "Ngá é mú wùn waq rá matú ji tô é Barnaba eq Sholuq nhik lé, hkyin to keq." ga taî ri. <sup>3</sup> Haú mù luî, yhangmoq gi, zoshuq gám luî kyúdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

*Kupru Zinlóng Má Dut É Hkyô*

<sup>4</sup> Haú mù, yhangnhik gi, Chyoiyúng Woi-nyí eq nhang kat é eq rajung za, Seluki wà shut gyó ló mù, haú mâ é lhai ji luî, Kupru zinlóng má jé ló luî, <sup>5</sup> Salami wà mó má nyi nyi é hkûn, Yudaq byu pé é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

<sup>6</sup> Yhangmoq gi, haú zinlóng mai laî byit e ló mù Pahpu wà mó jé ló kô é hkûn, myiqhtoî pyoq nghut sù Bara-Yesuq gâ é Yudaq byù myoqheq sará rayuq eq htûng hui akô. <sup>7</sup> Haú yuq gi, Sergi Poluq gâ é, myit hpaqchyî kûng é ginwáng zau hpó é byù rayuq nghut lhê. Minggyì hpó haú gi, Garai Gasâng é mungdang gyô yù naù mù, Barnaba eq Sholuq nhik lé ji yu ri. <sup>8</sup> Haú hkûn, myoqheq sará gâ é lichyúm dông myhîng é Eluma le gâ é Bara-Yesuq kúm gi, ginwáng zau hpó lé haú lumjîng hkyô má a jau ló nhâng nau é nghut mù luî, yhangnhik lé lhom he tang pyâm ri. <sup>9</sup> Haú hkûn, Poluq le gâ é Sholuq gi, Chyoiyúng Woi-nyí

\* 13:1 Grik dong Niger gâ é gi, byù noq gâ é nghut lhê.

byíng mù, yhang lé wú tsuq to luî, <sup>10</sup> "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkangmó é gyè hpó ê, Yhumsing é tengmán hkyô lé a lhoq hpyoq é a wó nyî lhú? <sup>11</sup> Ahkuî, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga taí ri.

Haú hkûn jáng, yhâng é myoq gi, myhì-myhà ga luí mauchut tuq dut lò byuq ri; haú mù, yhang lé shê râ byù ho sop lêng wún ri. <sup>12</sup> Haú hkyô lé ginwáng zau hpó myàng jáng, Yhumsing eq sêng é mhoqshit é hkyô lé wú maú luí lumjítng bê nghut ri.

#### *Antioku Wà Mó Má Dut É Hkyô*

<sup>13</sup> Hau htâng, Poluq eq yhâng luzúm wuî gi, Pahpu wà mó mai lhai ji mù, Pamhpuli mau mâ é Perga wà má jé ló akô. Markuq gâ é Yohan kúm gi, yhangmoq eq gang luî, Yerusalem wà mó shut taú lú byuq bê nghut ri. <sup>14</sup> Dum, yhangmoq gi, Perga mai toq e ló le, Pesidi ginwáng mâ é Antioku wà mó má jé ló akô. Bánno buinyì má, yhangmoq gi, tarajong má wang zung tô akô. <sup>15</sup> Haú hkûn, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, "Gumang wuî ê, mingbyû wuî lé myit wum byi dang joq kô é nghut le gi, ahkuî taí lo keq." ga luî, yhangmoq chyáng taí nhang kat ri.

<sup>16</sup> Haú hkûn, Poluq gi, toq yap mù, zîm byuq kó sháng gaq ga loq tû luî, "Israellaq byu pé eq Garai Gasang lé gyuq hkunggâ é byu pé ê, chôm gyô yù keq. <sup>17</sup> Israellaq byu pé é Garai Gasang gi, ngamoq é îchyí îkê pé lé hkyin yù bê nghut mù luî, Egutuq ming má byùbítng dut nyi to ashî hkûn, yhangmoq lé kô myhâng nhâng mù, hpungwup a-tsam bo é loq èq haú mau mai shuí htoq ló ri. <sup>18</sup> Dum, myi xê zàn kô, yoso pé má yhangmoq é a-kyang lé jân pyám



byi mù, <sup>19</sup> Hknan ming mâ é byuhú nyhit hú lé lhoq htên pyám luí, haú bâng é mingdán mâ é silí wunlí yhangmoq lé gàm byí ri. Haú gi, myi shô ngo xê zàn kô myáng ri.

<sup>20</sup> Hau htâng má, Garai Gasang gi, myiqhtoí Samuelaq é pyat jé shoq tarâ agyí pé lé to byí ri. <sup>21</sup> Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyû mâ é, Kisha é yhangzo Sholuq lé byi luí, yhang gi, myi xê zàn up bê nghut ri. <sup>22</sup> Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

<sup>23</sup> Garai Gasang gi, Yhâng é danggidiq joq é eq rajung za, Israelaq byu pê é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri. <sup>24</sup> Yesuq a jé lé shimá, Yohan gi, Israelaq byu pé banshoq lé myit lhíng hkyô eq sêng é baptisma hkyô lé hko kyo bê nghut ri. <sup>25</sup> Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lhú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyî râ lháng ngò a gíng.' ga tâi ri.

<sup>26</sup> Abraham é yhangzo yhangshú pé eq Garai Gasang lé gyuq hkunggâ é tûngbaù, gumang wui ê, shí hkyi yù hkyô mungdang lé, nga-nhûng chyáng byi kat bê nghut ri. <sup>27</sup> Yerusalem wà mó mâ é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyì hkangmó nghap é myiqhtoí pê é dang lé le, a sê gyo kô é yanmai, Yesuq lé sat râ doqdân é hkûn, myiqhtoí pê é dang lé lhoq dik pyám bekô nghut ri. <sup>28</sup> Yhâng chyáng shí gíng é mara a myàng kôlháng, Yhang lé sat pyám nhâng râ matú, Pilat chyáng dúng akô. <sup>29</sup> Yhangmoq gi, yhang eq séng luí, kê to má kê to ban lhoq dik kôjáng, Yhang

lé tapzîng mai yu hkyó mù, lup má kat tô akô nghut ri.  
<sup>30</sup> Garai Gasang kúm gi, Yhang lé shi é mai lhoq dui toq yû  
 bê nghut lhê. <sup>31</sup> Yhang gi, Galile mau mai Yerusalem wà  
 mó jé shoq, hí lé Yhâng htâng châng é bâng chyáng buinyì  
 tsómra myáng shoq htoq shit shit kut ri. Haú bang gi,  
 ahkuî, nga-nhúng Israelaq byu pê é hí má, Yhâng é saksé  
 dut bekô nghut ri.

<sup>32</sup> Haú mù, í dam lhê é Hkya-on Kungtôn Laiká má,  
 'Nàng gi, Ngá Zo nghut ri. Hkû-nyí, Ngò gi, Náng Wa dut  
 bê nghut lhê.'☆

ga luî, kê tô é eq rajung za, <sup>33</sup> Garai Gasang gi, îchyí îwâ pé  
 lé byi tô é danggidiq lé, Yesuq lé lhoq dui toq byî é dông,  
 yhangmoq é yhangzo yhangshu ngamoq é matú, lhoq dik  
 byî é gabú danglù lé, nungmoq chyáng ngamoq wun lé byi  
 bê. <sup>34</sup> Hau htoq agó, Yhang htên byoq é hkâ-nhám a hui  
 shoq, shi é mai lhoq dui toq yû râ hkyô eq séng luî, Garai  
 Gasang taí é gi,

'Dawiq lé byî tô é danggidiq eq rajung za, chyoyúng é eq  
 lungíng é jeju lé, ngò nungmoq lé byi râ nghut  
 lhê.'☆

gâ ri. <sup>35</sup> Hkya-on Kungtôn Laiká gó wô má le,  
 'Náng é Chyoyúng Sû lé, Nàng htên byoq nhâng naù râ a  
 nghut.'☆

ga taí tô ri.

<sup>36</sup> Ahkuî, Dawiq gi, yhâng é pyat banshoq má Garai  
 Gasang ô nau é dông ban wùn waq jáng, shi byuq luî, îchyí  
 îwâ pé eq rahá myhup pyám hui mù, htên byoq byuq é hui  
 bê nghut ri. <sup>37</sup> Garai Gasang lhoq dui toq yu é sù kúm gi,  
 htên byoq huí é a nghut.

<sup>38</sup> Haú nghut é yanmai, gumang wuê ê, haú yuq mai  
 yubak wó hkyut pyám byî é hkyô lé, nungmoq lé hko kyô

☆ 13:32 Hkya-on 2:7 ☆ 13:34 Esai 55:3 ☆ 13:35 Hkya-on 16:10

nyi é nghut é le, sê nyi keq. <sup>39</sup> Hau htoq agó, Mosheq é tarâ éq mara hkyut san byî é a hui kôlhang, haú yuq lé lumjîng é bang gi, hkyô lhumjup má mara hkyut san byî é hui râ nghut lhê. <sup>40</sup> Hau é yanmai,

'Wú keq, jihpoî é bang ê, maú mù luî htum byuq keq; nungmoq é buinyi pé má ngò rajung jung kut htoq râ nghut lhê;

<sup>41</sup> haú hkyô lé, rayuq yuq, nungmoq lé hkaî kyo kôlhang, jîng kó râ a nghut. <sup>✠</sup>

ga luî, myiqhtoî pé taî é dang, nungmoq má a ang sháng gaq, sidiq nyi keq." ga hko kyô nyi ri.

<sup>42</sup> Ahkuî, Poluq eq Barnaba nhik tarajong mai htoq ló le, htâng lhê é Bánno buinyi má le, haú pé lé dum hkaî kyo râ matú yhangmoq chôm dúng akô. <sup>43</sup> Chôm byo htoq ló kô é hkûn, Yudaq byu pé eq Yudaq noquq htúng má lhing wang lo é tarâ hkunggâ é byù myo myo gi, yhangnhik é htâng má châng bùm kô é nghut mù luî, Garai Gasâng jeju má gîng nyi râ matú, yhangnhik gi, yhangmoq lé lhoq pun lhoq kyîng akô nghut ri.

*Tûngbaù Pê Chyáng Lhing Lo É Hkyô*

<sup>44</sup> Hau htang lhê é Bánno buinyi má, Garai Gasâng é mungdang gyô yù râ matú, rawa bang aluq shoî banshoq, lé zup zîng to bum akô. <sup>45</sup> Yudaq byu pé kúm gi, byù moq mó haú lé myàng jáng, manon myit baú byíng bùm kômù luî, Poluq taî é dang lé taî htîng é eq nhîng pyâm akô.

<sup>46</sup> Poluq eq Barnaba le gyuq myit a bo é đông taî é gi, "Garai Gasâng é mungdang lé, nungmoq lé hí taî kyo râ dut é yanmai, ngá-nhik taî bê nghut lhê. Nghut kôlhang, nungmoq gi, haú lé lhom he-ngik pyám kômù, ahtum abyuq é asak eq gîngdán é đông yhumsing gùng lé a myit yù kô é yanmai, wú keq, ahkuî, ngá-nhik gi, tûngbaù pé

✠ 13:41 Hbk 1:5

shut lhing ló berâ nghut lhê. <sup>47</sup> Hkâsu mù gâ le, haû Yhumsîng gi,

'Hkyi yù hkyô lé maumyî htum shoq wó chûng jé râ matú,  
Ngò, nàng lé tûngbaù pé é maubó dut nhâng bê.<sup>☆</sup>  
ga luî, ngamoq lé hkunmó hkyó kat bê." gâ ri.

<sup>48</sup> Tûngbaù pé gi, dang haû lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to huî é lhunglhâng bang le, lumjîng bum akô nghut ri.

<sup>49</sup> Yhumsîng é mungdang gi, haú ming gón jam lò bê nghut ri. <sup>50</sup> Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wuî mâ é tarâ hkungga bang eq, haú wà mâ é suwún wuî lé, nhik lhoq yo kôluî, yhangnhik lé maukyo mai chôm hkat htoq pyâm akô. <sup>51</sup> Yhangnhik gi, yhangmoq lé a nau é hkyô tân shit é dông, yhumsing é hkyî mâ é hpuilhaû lé yhangmoq chyáng ko hkyô pyâm to kômù, Ikoni wà mó shut ló byuq bekô nghut ri. <sup>52</sup> Chángzô pé kúm gi, gabú é htoq agó, Choyoyúng Woi-nyí byíng nyi bum akô nghut ri.

## 14

*Poluq Eq Barnaba Nhk, Ikoni Wà Mó Má Ló Jé É Hkûn Lhê Hkyô*

<sup>1</sup> Ahkuî, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tûngbaù pé ajùm ayò lumjîng bùm kó shoq, wum kat hko kyô akô. <sup>2</sup> Nghut kôlhâng, a lumjîng é Yudaq byu pé gi, lumjîng é gumang wuî lé a ngui râ dông tûngbaù pé lé mhoq hpyoq yù mù, shuí gumlaù akô. <sup>3</sup> Haû mù luî, yhangnhik gi, tsómra myang shoq haú má nyi mù, haû Yhumsing é matú gyuq myit a bo é za hko kyô akô; Yhang Yhumsîng le yhangnhik é loq mai limik kumlhá eq

☆ 13:47 Esai 49:6

mauhpo muzó dut nhang é dông, Yhâng é jeju mungdang lé saksé hkám byî nyi ri. <sup>4</sup> Haú wâ mâ é bang kúm gi, myit byo ló bûm kê é nghut mù luí, Yudaq byu pê chyáng ra-am, lagyô pê chyáng ra-am, lom byuq ló akô. <sup>5</sup> Ahkuí, tûngbaù pé le, Yudaq byù eq yhangmoq é uphkâng bang le, yhangnhik lé rhoí mù luqgok èq dú sat râ ga htîm lo bum akô. <sup>6</sup> Nghut kôlhang, yhangnhik gi, haú hkyô lé bûn sê kat kôjáng, Lukaoni ginwáng mâ é Lustra eq Derbe wà mó eq, hau é awui ayàm wà tiq wà zo pé shut hpang e ló akô. <sup>7</sup> Haú pé má le, gabú danglù xoq hko kyô wún akô nghut ri.

*Lustra Wà Mó Má Ló Jé É Hkûn Lê Hkyô*

<sup>8</sup> Ahkuí, Lustra wà mó má, înu unghkaù mai hkyî hten mù luí, hkâ-nhám le hkyô a wó sô wú é sù rayuq zung tô ri. <sup>9</sup> Yhang le Poluq taí é dang lé gyô nyi ri. Poluq gi, haú yuq lé wú tsuq kat é hkûn, wó lhoq gê byi hui râ nghut lê gâ é lumjîng myit yhâng chyáng bo tô é lé, myàng byî ri. <sup>10</sup> Haú mù, Poluq gi, "Toq yap aq!" ga luí, htê mó èq yhang lé taí kat jáng, yhang gi, byam toq kat mù, wó so bê nghut ri.

<sup>11</sup> Haú mù, Poluq kut é muzó lé shiwa byu pé myàng kôjáng, yhangmoq gi, Lukaoni dang dông, "Nat hparà pé gi, byù gùng dông kut luí ngamoq chyáng gyó lô bekô nghut ri." ga luí, wut garu bum akô. <sup>12</sup> Hau htâng, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhíng byî akô. <sup>13</sup> Haú wà yàm mâ é Zeu hparà noqkuq yhûm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi râ hen akô.

<sup>14</sup> Nghut kôlhang, lagyo nhik Barnaba eq Poluq gi, haú lé wó gyo kôjáng, yhumsing é mebu lêng cheq pyám kôluí, shiwa hpong gung gûng shut din wang ê kômù, garû taí kô é gi, <sup>15</sup> "Hkaù pé é, haí mù haú su kut lo akô lhú? Nga-nhik

le nungmoq eq rajung za, xângzo byù za nghut lhê, akyû a bo é hkyô shí pé lé tô pyâm to mù, mauhkûng eq myigùng, wuìshuq lung-aû eq haú pé má nyì mi-nyì, joq mijoq lé hpan to sù, rû dui nyi é Garai Gasâng chyáng lhing wang lò kó sháng gaq nghû luí sheq, nungmoq lé gabú danglù hko kyô é nghut lhê. <sup>16</sup> Garai Gasang gi, byù myû chângiup lé hí hpyang lhê é pyat bán má ó le ó kâm é đông kut nhâng bê nghut ri. <sup>17</sup> Nghut kôhang, Yhang gi, mauhkûng mai mau wô nhâng luí, kyôshi zuí nhang é ahkyíng yam-yoq byi mù, nungmoq lé zoshuq agùn agó byî é eq, nungmoq lé i-myt ngón nhang nyi é đông, Yhang ge é hkyô lé tân shit mù, Yhang nyi é hkyô lé saksé hkâm nyi ri." ga akô. <sup>18</sup> Haú su ga tái kô le lhang, yhangnhik lé shiwa byu pé mai hkungga nhông byi râ hkyô lé, yhangnhik gi, gyai wuihke luí sheq wó hkûm pyâm akô nghut ri.

<sup>19</sup> Hau htâng, Antioku wà mó eq Ikoni wà mó pé mâ é Yudaq byu pé ra-am lé jé kômù, shiwa byu pé lé shuî-u luí, Poluq lé luqgok èq chôm dú kômù, yhang lé shi byuq bê su ngàm kô é yanmai, wà shinggan shut shê hkyut htoq pyâm akô. <sup>20</sup> Nghut kôhang, Poluq gi, yhâng é lhîngkyuq má chángzô pé yap tô kô é hkûn, toq mù wà shut tau wang ló ri. Hau htang nyí, yhang gi, Barnaba eq rahá Derbe wà mó shut e ló bekô nghut ri.

### *Antioku Wà Mó Má Taû Jé Ló É Hkyô*

<sup>21</sup> Haú wâ má yhangnhik èq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum taû ló kômù, <sup>22</sup> chángzô pé lé myit lhoq ging byi uchyang, haú lumjîng hkyô má ru gîng nyì râ matú myit wum byî akô. "Nga-nhúng gi, Garai Gasâng é mingdán má wàng râ matú, wuìhke jamjau myo myo hui ra râ nghut lhê." ga le, mhoqshit akô. <sup>23</sup> Yhangnhik gi, noqkuq

hpúng hkgámó má, hpúng suwún kut râ bang lé hkyin yù mù, zoshuq gám luí kyúdung mù, yhangmoq lumjínng nyi é Yhumsîng Garaí chyáng ap byi tô akô. <sup>24</sup> Hau htâng, yhangnhik gi, Pesidi ginwáng mai laí byit ló mù, Pamhpuli ginwáng má jé ló akô nghut ri. <sup>25</sup> Haú ginwáng mâ é Perga wà mó má mungdang hko kyo luí, Atali wà mó shut laí gyó ló akô nghut ri.

<sup>26</sup> Haú mai, lhaí ji mù, ahkuí yhangnhik wùn waq laí ló bê muzó é matú, Garai Gasâng jeju má ap luí yhangnhik lé nhang kat é Antioku wà mó má dum jé lò bekô nghut ri. <sup>27</sup> Jé lo é hkûn, yhangnhik gi, hpúng byû wui lé wut tsîng yù mù, yhangnhik dông mai Garai Gasang kut é hkyô banshoq lé le, tûngbaù pé lé haú lumjínng hkyô hkum hpóng byí é hkyô lé le, shit kyô akô. <sup>28</sup> Haú mù, yhangnhik gi, haú wâ má chángzô pé eq tsómra myang shoq nyi nyi akô nghut ri.

## 15

### *Ahpyo-kuq Hpyit Hkyô Eq Sêng É Manghkáng*

<sup>1</sup> Ahkuí, Yuda mau mâ é byù ra-am gi, Antioku wà mó má lé jé mù, gumang wui lé, "Nungmoq gi, Mosheq é htûngtarâ eq rajung za, ahpyo-kuq a hpyit é nghut jáng, hkyi yu é hui râ a nghut." ga luí, mhoqshit bum akô. <sup>2</sup> Hau é yanmai, myit a huí lhûm é hkyô htoq lô mù, Poluq eq Barnaba nhik gi, haú bang eq gyai yhang myíng myô lhûm akô; haú mù luí, gumang wui gi, Yerusalem wà mó má nyi é lagyô pé eq suwún wui chyáng, haú hkyô lé ló hpyê lhum râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga hkyin tô akô. <sup>3</sup> Haú mù, hpúng byû wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô laí ló uchyang, tûngbaù pé lhing wang lò bê hkyô lé taí kyô akô. Haú mâ é gumang wui lé gyai yhang gabú nhang akô nghut ri.

<sup>4</sup> Yhangmoq, Yerusalem wà mó má jé kô é hkûn, hpúng byû wuì, lagyô pé eq suwún wuì gi, yhangmoq lé lhóm hkûlum yù kô é nghut mù luì, yhangmoq gi, yhangmoq dông mai Garai Gasang kut é hkyô lhunglhang lé, haú bang lé shit kyô akô.

<sup>5</sup> Haú hkûn, Hparishe hpúng mâ é lumjúng bang ra-am gi, toq mù luì, "Tûngbaù pé lé, ahpyo-kuq hpyit nhâng râ eq, Mosheq é tarâ dông cháng nhâng râ gi, ra yhang râ lhê." ga taì bum akô nghut ri.

*Yerusalem Wà Mó Má Kut É Byìn Tú Wap Hpong*

<sup>6</sup> Ahkuì, lagyô pé eq hpúng suwún wuì gi, shí hkyô lé chòm myit wú râ ga, zup tô bum akô. <sup>7</sup> Shí hkyô lé gyai yhang dang rhâng lhùm bùm kô é htâng má, Petruq gi, toq mù luì, "Gumang wuì ê, Garai Gasang gi, ngá nhut mai taì é, haù gabú danglù lé, tûngbaù pé gyô yù mù lumjúng kó sháng gaq ga, hí hkûn nungmoq chyáng mai ngo lé hkyin yù bê hkyô lé, nungmoq sé lugù nghut bê. <sup>8</sup> Haù mù, myit nhiklhùm lé sé byi sù Garai Gasang gi, nga-nhúng lé byì é eq rajung za, yhangmoq lé le Chyoiyúng Woi-nyí byì é dông, yhangmoq lé hap yù bê hkyô lé saksé tûn shit bê nghut ri. <sup>9</sup> Garai Gasang gi, yhangmoq lumjúng luì, yhangmoq é myit nhiklhùm lé lhoq san lhoq yúng byì bê nghut é yanmai, nga-nhúng eq yhangmoq é gyoro má gamhkuì é hkyô a joq nhâng lo nghut ri. <sup>10</sup> Haù nghut le gi, íchyí îwâ pê èq le, nga-nhúng èq le a ung é wòlai lé, haù chángzô pê é lingzing má ke byì é dông mai, haì mù, ahkuì Garai Gasang lé chyam wú nyi akô lhú? <sup>11</sup> Nghut kôlhang, ngamoq gi, yhangmoq eq rajung za, Yhumsîng Yesuq é jeju mai za hkyi yu é huì é hkyô lé lumjúng é bang nghut lhê." ga luì, yhangmoq lé taì ri.

<sup>12</sup> Haù hkûn, zup míng tô é bang lhunglhang gi, zim za kut luì, Barnaba eq Poluq nhik mai, tûngbaù pê chyáng,



Garai Gasâng eq yhangnhik é loq dông limik kumlhá pé eq mauhpo muzó pé kut shit é hkyô, taí kyô nyi é lé chôm gyô nyi akô. <sup>13</sup> Yhangnhik dang ban taí kôjáng, Yakuq gi, "Gumang wui ê, ngá dang lé gyô wú keq. <sup>14</sup> Garai Gasang gi, tungbaù pê chyáng mai Yhâng mying é matú byù ramyû hkyin yù râ ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri. <sup>15-16</sup> Shí hkyô gi,

'Hau é htâng má gi, ngò dum taù lò mù luí, lêng gyop byuq bê Dawiq é yhûm\* lé dum saí râ nghut lhê.

Haù byoq htên tô é pé lé saí saí mù, haù lé dum lhoq toq râ nghut lhê.

<sup>17</sup> Haù hkûn sheq, ngá myîng mai ji yu é tungbaù pé eq, myit gyo tô é byù lhunglhâng bang gi, Yhumsîng Garai lé hô kó râ nghut lhê ga,

<sup>18</sup> a-nham mau htoq xâng hkun mai, shí hkyô pé lé sé nhang é Yhumsîng Garai taí ri. <sup>✠</sup>

ga myiqhtoí pé kê tô é dang eq rajung za nghut ri.

<sup>19</sup> Haù mù luí, ngò taí nau é gi, tungbaù pê chyáng mai Garai Gasâng shut lhing lo é bang lé, gotû haí le a lhoq wuí é za, <sup>20</sup> hparà lhô pé lé kyáng byî é a sansêng é zoshuq pé lé le, ashop é dông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lhê. <sup>21</sup> Hkâsu mù gâ le, gó hkûn mai yhang, Mosheq é tarâ lé wà hkangmó má hko kyô ló kômù, Bánno buinyì hkangmó tarajong pé má nghap kyo kyo kut bûm kô é nghut lhê." ga taí ri.

### *Lumjîng É Tungbaù Pê Chyáng Hun Kat É Laiká*

\* 15:15-16 Dawiq é yhûm gâ é gi, Dawiq eq yhâng é awut ashîn pé up é hkyô lé gâ é nghut lhê. ✠ 15:18 Amo 9:11-12

<sup>22</sup> Haú hkûn, lagyô pé, suwún wuî eq, hpúng byû wuî lhunglhâng bang gi, Poluq, Barnaba nhik eq rahá Antioku wà mó shut nhang kat râ byù lé, yhangmoq chyáng mai hkyin yù râ matú chôm myit hpyit akô. Haû eq rajung za, yhangmoq gi, gumang wui chyáng mâ é nhik bô suwún nhik Barsabaq gâ é Yudaq eq Sila lé hkyin yu akô nghut ri.

<sup>23</sup> Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, tûngbaù gumang wuî ê, nungmoq é gumang wuî nghut é, ngamoq lagyô pé eq suwún wuî gi, ngingón dang shit kyô kat lhê.

<sup>24</sup> Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dâng éq lhoq byok pyám luî, nungmoq é myit lé lhoq nhúng byî nyi é hkyô lé, ngamoq wó gyo bê. <sup>25</sup> Haû mù, ngamoq lhunglhâng bang gi, byù ra-am lé hkyin yù mù, <sup>26</sup> nga-nhúng é Yhumsîng Yesuq Hkrisduq é matú, yhumsing asak lé lháng a hâ é nga-nhúng chyitdap é Barnaba, Poluq nhik eq rahá, nungmoq chyáng nhang kat râ matú chôm myit hui bê. <sup>27</sup> Haû mù luî, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taî kyo kó râ nghut lhê. <sup>28</sup> Nungmoq é matú gi, hparà lhó pé lé tîng byî é zoshuq eq sui, lingzing mai myhik sat é dusak sho eq ashop é dông gungsho zùm yap é hkyô pé lé, koi pyám râ hkyô mai lai luî, gotû wòwùn hûn râ hkyô a joq nghû luî, Chyoiyúng Woi-nyí le, ngamoq le, myit huî to bê. <sup>29</sup> Nungmoq haú pé lé koi pyâm nyî kôjáng gi, gè râ nghut lhê.

Ngingón wángzán nyî kó sháng gaq ô!" ga kê tô ri.

<sup>30</sup> Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byû wuî lé ji tsîng to kôluî, haû hûn kat é laiká lé ap byî akô nghut ri.

<sup>31</sup> Hpúng byû wuì gi, laiká haû lé ban nghap kôjáng, wum-o byî é danglù hau é yanmai, gabú nyi bum akô. <sup>32</sup> Yudaq eq Sila gi, myiqhtoî nhik le nghut kômù luí, gumang wuì lé mungdang myo myô èq lhoq pun lhoq kying kômù, wum-o lhoq gîng to byî akô. <sup>33</sup> Rayoq zo haú má nyi nyì kô é htâng má, gumang wuì gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri. <sup>34</sup> (Sila kúm gi, yhang ô nau é dông nyi gyó tô ri.)† <sup>35</sup> Poluq eq Barnaba kúm gi, Antioku wà mó má nyi gyó to kômù, Yhumsîng Yesuq é mungdang lé, góbang myo myo eq, mhoq kyo hko kyô akô nghut ri.

### *Poluq Eq Barnaba Nhik Gâng Lhum É Hkyô*

<sup>36</sup> Hau htâng, buinyì tsómra myáng jáng, Poluq gi, Barnaba lé, "Yhumsîng é mungdang hko kyô laî lo wú bê, wà hkyap hkanmó mâ é gumang wui chyáng taû lò luí, yhangmoq hkâsu dut nyi é hkyô lé, ló dum kûm wú lo goq." ga taî ri. <sup>37</sup> Barnaba gi, Markuq gâ é Yohan lé le shuî chûng nau ri. <sup>38</sup> Nghut kôlhâng, Poluq gi, haú yuq lé a kâm shuî chûng nàu nghut ri; hkâsu mù gâ le, yhang gi, Pamhpuli mau má yhangnhik lé tô pyâm to mù, yhangnhik eq rahá muzó a kâm xoq zui nau é sù nghut é yanmai nghut ri. <sup>39</sup> Hau é yanmai, yhangnhik gi, gyai yhang taî shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuî chûng luí, lhai ji mù Kupru zinlóng shut e ló byuq bê nghut ri. <sup>40</sup> Poluq kúm gi, Sila lé hkyin yù mù, gumang wui èq yhang lé Yhumsîng Garaí é jeju má ap kat kô é htâng má, yhangnhik gi, htoq e ló byuq bekô. <sup>41</sup> Haû mù, Poluq gi, Suriq mau eq Kiliki mau mai sô laî ló uchyang, haú mâ é noqkuq hpûng pé lé wum-o lhoq ging byî wún bê nghut ri.

† 15:34 Bun zo shí lhum gi, Grik Chyúmlaiká myo myo má a bò nghut lhê.

## 16

*Poluq Eq Sila Nhik Chyang Timohti Châng É Hkyô*

<sup>1</sup> Poluq gi, Derbe wà mó má jé é htâng, Lustra wà mó má dum jé ri. Haú wà má, Timohti gâ é chángzo rayuq nyi ri. Yhâng nu gi, Yesuq lé lumjǐng é Yudaq myiwe myhí nghut ri; yhâng wa kúm gi, Grik amyû nghut ri. <sup>2</sup> Timohti gi, Lustra wà mó eq lkoni wà mó má nyi é gumang wui èq hkya-ôn é hui sũ nghut ri. <sup>3</sup> Poluq gi, hkyowuì má yhang lé shuì chũng naù mù luì, ahpyo-kuq hpyit byî ri. Hkâsu mù gâ le, yhâng wa gi, Grik nghut é hkyô lé haù mâ é Yudaq byu pé lhunglhâng bang sé kômù, haù bang lé myit tê byî é yanmai nghut ri. <sup>4</sup> Haù mù, yhangmoq gi, rawa htâng rawà mai laì ló uchyang, Yerusalem wà mó mâ é lagyô pé eq hpúng suwún wuì, chôm myit hpyit tô é hkyô lé, cháng kó sháng gaq ga, yhangmoq lé taì kyô akô. <sup>5</sup> Haù mù luì, hpúng byû wuì gi, lumjǐng hkyô má wum-o bo lò kômù, ra-nyí èq ra-nyí byù du myô jat lo nyi ri.

*Makedoni Byù Rayuq Lé, Poluq Shing-rán Myang É Hkyô*

<sup>6</sup> Ahkuì, yhangmoq gi, Asia mau má mungdang ê hko kyo râ hkyô lé Chyoiyúng Woi-nyí èq yhangmoq lé hkũm pyâm é yanmai, Hprugi mau eq Galatiq mau dõng sô laì ló mù, <sup>7</sup> Musi mau kyo má jé ló kôjáng, Bihtuni mau shut wang ló râ dâ akô; nghut kôlhâng, Yesuq é Woi-nyí gi, yhangmoq lé ahkáng a byi nghut ri. <sup>8</sup> Haù mù, yhangmoq gi, Musi mau mai sô laì ló luì, Troa myuq má gyô jé ló akô. <sup>9</sup> Haù má, myín lé, Poluq gi, Makedoni byù rayuq lé yap to mù, "Makedoni mau shut dap lé luì, ngamoq lé le garúm yû laq." ga luì, yhang lé dung wut nyi é shing-rán myang ri. <sup>10</sup> Shing-rán haù lé Poluq myang é eq, Makedoni byu pé lé gabú danglù hko kyo râ matú, ngamoq lé Garai Gasang wut yù bê nghut ri nghû myit yù luì, haù hkũn yhang,

ngamoq gi, Makedoni mau shut dap ê râ matú rì rì kut ló bê nghut lhê.

*Ludia Gâ É Myiwe Myhí Hpúng Byû Dut Lo É Hkyô*

<sup>11</sup> Haû mù luî, ngamoq gi, Troa myuq mai Samohtake zinlóng ang ang shut lhai ji ê mù luî, htang nyí gi, Neapoli wà má jé bê nghut lhê. <sup>12</sup> Haû mai lai jáng, Makedoni mau má, Romaq byu pé xuq tô é, haú ginwáng mâ é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

<sup>13</sup> Bánno buinyi jé jáng, ngamoq gi, kyûdung jowò joq nhô ngam mù, wà hkum shinggan mâ é, wuilàng yàm shut htoq ê luî, haú má zîng to lánng é myiwe wuì lé, zung gyó mù nyo hi é nghut lhê. <sup>14</sup> Haû dang gyo nyi é bang má, Garai Gasang lé noqkuq é, Htuatira myuq byû, pán nê ung zo sù Ludia gâ é myiwe myhí rayuq bo ri; Yhumsîng Garai gi, Poluq taí kyô é hkyô lé rago gyô yù sháng gaq ga, yhang lé myit hkum hpóng byî ri. <sup>15</sup> Yhang gi, yhang eq yhâng yhumbyù wuì wui-myhup ban hkâm yù kôjáng, "Nungmoq gi, ngo lé haû Yhumsîng Yesuq má lumjîng bê sù nghut é dông, myit yù byi kô é nghut jáng, ngá yhûm má lé bíng keq." ga luî, ngamoq lé zuq zuq ji yu ri.

*Poluq Eq Sila Nhik Htóng Lúng É Hkyô*

<sup>16</sup> Ra-nyí lé, ngamoq gi, haû kyûdung é jowò shut e ló nyi le, nat wang júng luî gumhpân hpan é jùnmyhí rayuq ngamoq lé lhom huî ri. Haú yuq gi, gumhpân hpan é dông yhâng yhumsîng wuì lé ngunzè gyai yhang hô byî é sù nghut lhê. <sup>17</sup> Myiwe haû gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô taí kyô wún é, Myhang Htâng é Garai Gasang é dui-nhâng zoshâng wuì nghut bum akô ô!" ga wut garû ri. <sup>18</sup> Buinyi myo myo haû su chyat châng garû wún é yanmai, Poluq gi, gyai yhang myit hpêbu byuq mù, lhing wú kat luî, nat haû

lé, "Yesuq Hkrisduq é myìng lang luì ngò nang lé hkunmó hkyô kat lhê, yhâng chyáng mai htoq ló byuq aq." ga luì, nat haù lé, nhik-yô kat ri. Haù hkùn jáng, nat haù gi, yhâng chyáng mai htoq ló byuq bê nghut ri.

<sup>19</sup> Ahkuì, myiwe hau é yhumsîng wuì gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gai mâ é suwún wui chyáng she hkyut e akô. <sup>20</sup> Dum, yhangmoq gi, yhangnhik lé tarâ agyì pè chyáng shuì ê mù, "Shí nhik gi, Yudaq byù nghut mù luì, ngamoq Romaq byu pé mai a ge châng é htunghking lé mhoqshit byì nyi é dông, <sup>21</sup> nga-nhông é myuq lé gunjâng nyi akô nghut ri." ga tái akô.

<sup>22</sup> Haù mù luì, shiwa byu pé gi, yhangnhik lé chôm htîm akô. Tarâ agyì pé gi, yhangnhik é mebu lé lâng hkyut pyám luì, wumchûm hkat èq bat râ matú, hkunmó hkyô kat akô. <sup>23</sup> Yhangmoq gi, yhangnhik lé gyai yhang nhuq bat yu é htâng, htong má lhông kat mù, rago za wú zúng râ matú htóng suwún lé hkunmó hkyô tô akô. <sup>24</sup> Htóng suwún hpó gi, haù sù é hkunmó lé wó jáng, yhangnhik lé hkyì kyum hut luì, htóng mâ é, je ahtê gok má lhông tô ri.

### *Htóng Suwún Hpó Hkyi Yù Huì É Hkyô*

<sup>25</sup> Nghut kôlhang, gunggàm yoq lé, Poluq eq Sila nhik gi, kyûdung luì, Garai Gasang lé mahkôn hkya-ôn nyì kô é hkùn, htóng byù góbang gi, yhangnhik é htê lé chôm gyô nyi bum akô. <sup>26</sup> Haù hkùn, byodàn ratung layàng mó nún lô mù htóng yhûm gón le nún lô luì, hkum pé banshoq le radá dâm bóng hà lo bum ri; dum nghut jáng, yuq hkangmó mâ é toqjâng tui pé le gyut gyó byuq bê nghut ri. <sup>27</sup> Htóng suwún hpó gi, yhup bûn lò mù, htóng hkum pé bóng hà tô bum é lé myang kat jáng, htóng byu pé ban hpang byuq bùm bekô râ nghut lhê ga myit yù luì, shâm shê mù, yhânggùng yhang sat shì rà dâ ri.

<sup>28</sup> Nghut kôlhang, Poluq gi, "Ê, náng gûng yhang nàng haû su hkâkut, ngamoq banshoq shî má nyi tô lhê." ga luî, htê mó èq wut garu taí kat ri.

<sup>29</sup> Haû hkûn, yhang gi, duq é myibung lé dúng yù mù, ahkaû shut din wang ló luî, Poluq eq Sila nhik é hí má gyuq nán é eq ngóm gop tô ri. <sup>30</sup> Hau htâng, yhang gi, yhangnhik lé shuí htoq yû luî, "Sarâ nhik ê, ngò hkyi yu é hui râ matú, haî kut ra râ lú?" ga myi kat ri.

<sup>31</sup> Haû hkûn, yhangnhik gi, "Yhumsîng Yesuq lé lumjîng jáng, nàng eq náng yhumbyù lunglhang bang hkyi yu é hui râ nghut lhê." ga taí akô. <sup>32</sup> Hau htâng, yhangnhik gi, haû htóng suwún hpó eq yhâng yhumbyù lunglhang lé, Yhumsîng é mungdang hko kyô akô. <sup>33</sup> Haû myîn haû u lé yhang, htóng suwún hpó gi, yhangnhik lé shuí ê mù, yhangnhik é dàm pé lé tsing chî pyám byi luî, haû htâng, yhang eq yhâng yhumbyù banshoq bang wui-myhup hkâm yù bekô nghut ri. <sup>34</sup> Hau htâng, yhang gi, yhangnhik lé, yhâng é yúmhaû má shuí wang ló mù, zoshuq hkang byî ri. Yhang eq yhâng yhumbyù banshoq bang gi, Garai Gasang lé wó lumjîng bekô nghut é yanmai, gyai gabú nyi bum akô nghut ri.

### *Haq Nhang Pyám Râ Lé A Đông É Hkyô*

<sup>35</sup> Ahkuî, maubó jáng, tarâ agyì wuì gi, "Haû nhik lé nhang pyám aq." ga, htóng suwún hpô chyáng pyata pé lé taí nhang kat akô. <sup>36</sup> Haû hkûn, htóng suwún hpó gi, "Nungnhik lé nhang pyám aq ga, tarâ agyì wuì mai byù nhang kat ri; haû mù, ahkuî, nungnhik gi, ngón za htoq ló lo keq." ga luî, Poluq lé taí ri.

<sup>37</sup> Poluq kúm gi, "Nga-nhik gi, Romaq mingdán byû sheq ru nghut le wa, myî gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluî nhîng, ahkuî tsik za haq nhang pyám râ dâ akô nhung lhi?"

A wó dut, yhangmoq yhang sheq lé shuí htoq yû kó sháng gaq." ga luí, yhangmoq lé tû taí kat ri.

<sup>38</sup> Pyata pé gi, tarâ agyì wuì lé dang haú pé ló taí kyo kôjáng, tarâ agyì wuì gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluí, <sup>39</sup> yhangmoq yhang, yhangnhik chyáng lé mù, tôngbán luí, shuí htoq yû mù, wà haú mai htoq ló byuq râ matú chôm dúng akô. <sup>40</sup> Haú mù, Poluq eq Sila nhik gi, htóng mai htoq ló é htâng, Ludia é yhûm má wang ló akô; haú má, gumang wuì eq le hui kômù, yhangmoq lé wum-o byi luí, htoq ló bekô nghut ri.

## 17

### *Htesaloni Wà Mó Má Mungdang Hko Kyô É Hkyô*

<sup>1</sup> Hau htâng, yhangmoq gi, Amhpipoli wà mó eq Apolon wà mó mai sô lai ló mù, Htesaloni wà mó má jé akô. Haú wâ má gi, Yudaq byu pé é tarajong ralhum joq ri. <sup>2</sup> Poluq gi, yhang lhaq kut nyi é eq rajung za, tarajong má wàng luí, Bánno buinyì sum nyí yhang, Chyúmdang má bo é eq séng mù, yhangmoq eq chôm ming lhum uchyang, <sup>3</sup> Hkrisduq wúhke jamjau hui mù, shî bê mai dum dui toq lô râ hkyô lé taí hkoq san kyo luí, "Nungmoq lé, ngò hko kyô nyi é haú Yesuq gi, Hkrisduq nghut lhê." ga taí ri. <sup>4</sup> Yudaq byu pé mâ é ra-am gi, gyô jing kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wuì tsómra myo shoq le, gyô jing kômù, lé xoq yu akô.

<sup>5</sup> Nghut kôlhang, a gyô jing é Yudaq byu pé gi, manôn kôluí, gai mâ é byùgang jùm ra-am lé lung yù mù, byù moq mó tsing yù luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhûm má htîm e ló akô. <sup>6</sup> Nghut kôlhang, yhangnhik lé a myàng kôjáng, yhangmoq gi, Yason eq



gumang wuì ra-am lé, yhangmoq é wà suwún wui chyáng lãng she ê kômù, "Mingkan gón lé atau ahû kut é byù shí nhik, ahkuì shí má jé jáng, Yason gi, yhâng é yhùm má lhom hkûlum yu ri. <sup>7</sup> Yhangmoq lhunglhâng bang gi, Yesuq gâ é hkohkâm góyuq nyi lhê ga kôluì, hkoséng Kehtaq é tarâ lé lhoq shai é dông kut é bang nghut akô." ga taì garû bum akô. <sup>8</sup> Shiwa byu pé eq wà suwún wuì gi, dang haû lé wó gyo kôjáng, myit wui myit hke dut nyi bum akô. <sup>9</sup> Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

*Beria Wà Mó Bang, Mungdang Lé Lhom Yu É Hkyô*

<sup>10</sup> Haú myîn jáng yhang, gumang wuì gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri. <sup>11</sup> Haú Beria wà mó byu pé gi, Htesaloni wà mó byu pé htoq má je riyhang nhik bo bum akô; haû mù, danglù haû lé gyai ô nau é myit eq hap yù mù, danglù shí teng a têng é hkyô lé wó sé shoq ga, nyí wuì Chyúmdang lé chôm nghap wú nyi akô nghut ri. <sup>12</sup> Haû mù luì, Yudaq byu pé myo myo gi, lumjíng bum akô, haû eq rajung za, aróng wó é Grik myiwe wuì eq yuqgè wuì myo myo le, lumjíng bùm bekô nghut ri.

<sup>13</sup> Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó mâ é Yudaq byu pé sé kôjáng, yhangmoq gi, haú má lé kômù, wà byù wuì lé mhoq hpyoq luì, gabyông lò nhang akô. <sup>14</sup> Haú hkûn, gumang wuì gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri. <sup>15</sup> Poluq lé châng dé é bang gi, Ahten myuq jé shoq lé dé to kômù, Sila eq

Timohti nhik lé hân hân châng ló râ matú pying kat é dang lé wun chûng mù, dum taû lò bekô nghut ri.

*Poluq, Ahten Myuq Má Nyi É U Lhê Hkyô*

<sup>16</sup> Ahkuî, Poluq gi, Ahten myuq má haú nhik lé lánq nyi tô é u lé, haú wâ má rawa é hparà lhô baú dut tô é lé myàng mù luî, yhâng i-myt gyai yhang a ngón dut byuq ri. <sup>17</sup> Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuî taî sân kyô lhûm nyi akô nghut ri. <sup>18</sup> Haú mù luî, Epikuri hpaqchyî eq Sto-i hpaqchyî\* lé sê é, myit wú hpaqchyî bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haî wá taî nyi lhê lhuí?" ga; ra-am gi, "Góming hparà pé é hkyô lé taî kyo sù nghut sam ri." ga, taî bum akô nghut ri. <sup>19</sup> Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé sé nhang le a gè lhuí? <sup>20</sup> Nang eq taî é maú nhô za gâ é hkyô lé ngamoq wó gyô ri; haú é dang kyîng lé ngamoq sé nau ri." ga taî bum akô. <sup>21</sup> (Ahten byu pé eq haú má nyi é góming byu pé lhunglhâng bang gi, dang sik lù sik haú lé taî kún gyô kún mù, yhangmoq é ahkyíng lé lhoq pán nyi bum akô nghut ri.)

*Poluq, Aripagu Zuphpong Má Mungdang Hko É Hkyô*

<sup>22</sup> Haú u lé, Poluq gi, Aripagu zuphpong má toq yap mù, "Ahten byu pé ê, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé,

---

\* 17:18 Epikuri hpaqchyî gi, htang pyat a joq, ahkuî ngón yû râ za ahkyak gâ é nghut lhê. Sto-i hpaqchyî gi, haî wá dut kôlhâng i-myt zim za kut mù, htang pyat matú chiq a ra gâ é nghut lhê.

ngò myang ri. <sup>23</sup> Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaî matú.', ga luî, kê tô é hkungga gyap ralhum lé myang záng ri; haú nungmoq a sê é za jaú nyi é Garaî hkyô lé, ngò, nungmoq lé hkaî kyo kôlé.

<sup>24</sup> Myidàm htoq eq haú má joq mijoq lé hpan tô é Garaî Gasang gi, mauhkûng eq myigùng é Yhumsíng le nghut lhê mù luî, byu loq èq saî é noqkuq yhúm má nyi râ a nghut. <sup>25</sup> Yhang gi, byù lhunglhâng bang lé asak, soq, ra mira gumjup shoq byî to sù nghut nyi é yanmai, rajung jung râ é sù lé su, byu loq èq dojaú râ sù a nghut. <sup>26</sup> Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luî, yhangmoq é matú hí hí mai ahkyíng yam-yoq eq nyi râ jowò masat to byi bê nghut ri. <sup>27</sup> Yhang gi, nga-nhúng yuq hkangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. <sup>28</sup> Hkâsu mù gâ le, nungmoq é jihkyang kat bang, 'Nga-nhúng le yhâng é awut ashîn pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyî, wó dui é eq îsu wó dut é nghut lhê.

<sup>29</sup> Haú mù, nga-nhúng gi, Garaî Gasâng é yhangzô pé nghut nyi é yanmai, Garaî gùng gi, byu é hpaqchyî loq èq kyûng kê tô é hîng, ngùn, luqgok pé eq pûng lhê nghu luî hkâ-myit yù kó. <sup>30</sup> Láì lò bê haú myoq a bóng shi é pyat lé, Garaî Gasang gi, haî le a ga lhaî pyâm to kôlhâng, ahkuî gi, jowò hkangmó mâ é byù lhunglhâng bang lé, myit lhîng keq ga hkunmó hkyô to bê nghut ri. <sup>31</sup> Hkâsu mù gâ le, Yhang hkyin to sù mai mingkan gón lé tara é đông jéyáng râ buinyi ra-nyí masat to bê nghut ri. Shí hkyô lé, byù lhunglhâng bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yû bê nghut ri." ga taí ri.

<sup>32</sup> Shî é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashî." ga taí akô. <sup>33</sup> Hau htâng, Poluq gi, haú zuphpong mai htoq ló byuq bê nghut ri. <sup>34</sup> Nghut kôlhang, byù ra-am gi, Poluq é htâng cháng kômù, lumjíng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotû byu pé le, bo bum akô nghut ri.

## 18

### *Poluq, Korinhtuq Myuq Má Nyi É U Lhê Hkyô*

<sup>1</sup> Hau htâng má, Poluq gi, Ahten myuq mai htoq luí, Korinhtuq myuq má jé lo ri. <sup>2</sup> Haú má, yhang gi, Romaq myuq mai Yudaq byù lhunglhâng bang htoq ló byuq râ dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luí, yhangnhik chyáng ê ri. <sup>3</sup> Yhangmoq gi, jonghpang saí zo bang chyat nghut kô é yanmai, muzó pûng kôluí, Poluq gi, yhangnhik eq rahá nyi nyi mù, muzó chôm saí akô. <sup>4</sup> Bánno buinyi hkangmó, Poluq gi, tarajong má Yudaq byù eq, Grik pé lé, taí sân kyo luí, lhoq pun lhoq kyîng yu ri.

<sup>5</sup> Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. <sup>6</sup> Nghut kôlhang, Yudaq byu pé gi, lhom he-ngik pyám kômù, yhang lé rhoí dang taí pyâm akô; haú mù, Poluq gi, yhâng mebu ko shit é đông yhangmoq lé a nau é hkyô tân shit uchyang, "Nungmoq é sui mara gi, nungmoq é ulhum má jé sháng gaq, ngò eq

haí a séng lo; ahkuí mai, ngò gi, tûngbaù pê chyáng e ló berâ nghut lhê." ga luí, yhangmoq lé taí ri.

<sup>7</sup> Hau htâng, yhang gi, tarajong mai htoq luí, jong haú eq yhep nghut é, Garai Gasang lé noqkuq é Titu Yustu ga su é yhûm má wang ló ri. <sup>8</sup> Krispu gâ é tarajong má up sù gi, yhâng yhumbyù lhunglhâng bang eq rahá, Yhumsing lé lumjínq akô. Korinhtuq myuq byu pé myo myo le, Poluq é dang lé gyô yù mù, lumjínq luí, wui-myhup hkâm yu bum akô nghut ri.

<sup>9</sup> Ra-myìn lé, shing-rán ralhûm má Yhumsîng mai Poluq lé taí é gi, "Hkâgyuq, taí aq, zim za hkâ-nyí. <sup>10</sup> Ngò nàng eq rahá nghut nyi lhê, nàng lé ó yuq èq le haí wó kut râ a nghut, hkâsu mù gâ le, myuq shí má, ngá é byù myo myo nyi bum lhê." gâ ri. <sup>11</sup> Haú mù luí, Poluq gi, Garai Gasang é mungdang mhoqshit uchyang, razàn eq lhamó hkyuq hkyap yhang, haú myuq má nyi nyi ri.

<sup>12</sup> Galio ga sù, Ahkaia mau mâ é ginwáng zau kut nyi é u lé, Yudaq byu pé gi, myit rahkat zâ èq Poluq lé chôm chyup yù kôluí, tarâ hpyit wap má she háng kômù, <sup>13</sup> "Byù shí yuq gi, jep é tarâ eq shai lhûm é dông, Garai Gasang lé noqkuq râ matú, byu pé lé mhoq hpyoq wún ri." ga mara hûn akô.

<sup>14</sup> Haú hkûn, Poluq tû taí râ dâ lò jáng, Galio gi, Yudaq byu pé lé, "Yudaq byu pé ê, muzó shí gi, tarâ lu laí é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê. <sup>15</sup> Nghut kôlhang, muzó shí gi, nungmoq é tarâ eq séng luí, dang eq séng luí, myìng eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyì kut byi râ a nghut." ga taí mù, <sup>16</sup> tarâ hpyit wap mai yhangmoq lé hkat htoq pyám nhang ri. <sup>17</sup> Haú hkûn, yhangmoq lhunglhâng bang gi, tarajong má up sù Sositeni lé chyup yù mù, tarâ hpyit wap hí má

chôm bat akô. Galio kúm gi, haû hkyô lé hai gùn a kut byi nghut ri.

*Poluq, Antioku Wà Mó Má Dum Taû Jé É hkyô*

<sup>18</sup> Poluq gi, Korinhtuq myuq má buinyi tsómra myáng shoq lumjínq bang eq nyi nyi ri. Hau htâng, yhang gi, haú bang lé shi-kyâm to luî, Priskila eq Akula nhik lé byinzùm kut mù, lhai ji luî Suriq mau shut e ló akô. Hau hí má, yhang gi, danggidiq tô é yanmai, Kenhkrea wà má xâm nyhâm pyâm ri.\* <sup>19</sup> Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luî, yhang baú tarajong má wàng mù, Yudaq byu pé lé taî sân kyo byî ri. <sup>20</sup> Haû mâ é bang gi, yhangmoq eq rahá rayoq zo nyi shi râ dông yhang lé dung kô é nghut kôlhang, yhang gi, a nhô lo nghut ri. <sup>21</sup> Haû mù, yhang gi, Ehpesu myuq mai lhai ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidiq byî tô ri. <sup>22</sup> Ahkuî, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huî tô é htâng, Antioku wà mó má dum gyó ló ri.

<sup>23</sup> Yhang gi, haû wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawà mâ é chángzô pé lé wum-o lhoq ging byî ri.

*Apolo Zui Saí É Muzó*

<sup>24</sup> Ahkuî, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyî bò sù nghut é htoq agó, Chyúmdang le gyai kúng é sù nghut ri. <sup>25</sup> Yhang gi, Yohan é baptisma hkyô lé za sé sù nghut kôlhang, Yhumsing é hkyô lé mhoq yû bê nghut

---

\* 18:18 Xâm nyhâm pyâm é gi, Yudaq htûng dông rajung jung kut râ matú danggidiq to luî, haû lé ban kut jáng, yhumsing xâm lé nyhâm pyâm é nghut lhê.

luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byî ri. <sup>26</sup> Ahkuí, yhang gi, gyuq kyûm myit a bo é za tarajong má taí hi ló ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasâng é mungdang hkyô lé azó tung taí sân kyo byî akô nghut ri.

<sup>27</sup> Apolo gi, Ahkaia mau shut dap e ló nau é hkûn, gumang wui gi, yhang lé wum saí byi mù, yhang lé lhom hkûlum yù râ matú, chángzô pè chyáng laiká ká byî kat akô; yhang gi, jé jáng, Garai Gasâng jeju mai lumjínng bê bang lé, gyai yhang wó garúm sù dut bê nghut ri. <sup>28</sup> Hkâsu mù gâ le, yhang mai, Yesuq gi, Hkrisduq yhang nghut nyi ri ga luí Chyúmdang má tún shit uchyang, byu pè hí má Yudaq byu pé lé, wum kat wó taí ung pyâm é yanmai nghut ri.

## 19

### *Poluq, Ehpesu Myuq Má Nyi U Lhê Hkyô*

<sup>1</sup> Ahkuí, Apolo gi, Korinhtuq myuq má nyi tô é hkûn, Poluq gi, mau káng mai sô laí ló mù, Ehpesu myuq má jé ri. Haú má, yhang gi, chángzô pé ra-am eq hui luí, <sup>2</sup> yhangmoq lé, "Nungmoq gi, lumjínng é hkûn, Chyoiyúng Woi-nyí lé, wó yû bekô lhú?" ga myî ri.

Haú hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tû taí akô.

<sup>3</sup> Haú mù, Poluq gi, "Haú nghut jáng, nungmoq gi, haí jung baptisma hkam yù kô é lhú?" ga luí, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tû taí akô.

<sup>4</sup> Haú hkûn, Poluq gi, "Yohan é baptisma nghu é gi, myit lhîng mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haú Yesuq lé sheq lumjínng râ lhê ga shiwa byu pé lé taí ri." ga taí ri. <sup>5</sup> Yhangmoq gi, dang

haû lé wó gyo kôjáng, Yesuq é myìng lang luí baptisma byí é lé, hkam yu bum akô. <sup>6</sup> Poluq gi, yhangmoq é htoq má loq ke byi jáng, haû Chyoiyúng Woi-nyí gi, yhangmoq htoq má jé lé mù, yhangmoq gi, laklaí dang nyo lo é htoq agó myiqhtoi le htoí lo bum akô. <sup>7</sup> Haú bang lhunglháng gi, yuqgè raxe í yuq kó nghut ri.

<sup>8</sup> Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé taí sân kyo mù, lhoq pun lhoq kyîng yu ri. <sup>9</sup> Nghut kôlhang, ra-am gi, myit htan lo bùm kôluí a kâm lumjîng kô é htoq agó, haû Yhumsing é Hkyô lé byu pê hí má lhoq hpoí pyám byi kôjáng, Poluq gi, yhangmoq chyáng mai htoq luí, chángzô pé lé shuí chûng mù, Turanu gá su é hpaqchyî mhoq jong má, nyí wuí taí sân kyô lhûm nyi akô. <sup>10</sup> Haû su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunglhâng bang gi, Yhumsing é mungdang lé wó gyô yu bum akô nghut ri.

### *Skewa É Yhangzo Nyhit Yuq É Hkyô*

<sup>11</sup> Garai Gasang gi, Poluq é loq dông laklaí kumlhá kut ri. <sup>12</sup> Haû mù, Poluq chyáng mâ é hpajet eq hpyihit rajung jung lé, nò bâng chyáng yu ló mù, ló záng byi jáng lháng, yhangmoq é nõhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

<sup>13</sup> Haû u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myìng mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhumsing Yesuq é myìng lé lang luí, hkat chyam wú akô. <sup>14</sup> Skewa gâ é, Yudaq hkyangjong agyì rayuq é yuqzo nyhit yuq le haû su kut wun akô. <sup>15</sup> Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tû taí mù, <sup>16</sup> agè



ashop é nat haû wang júng é byù gi, yhangmoq htoq má byam doq jí to luí, nhuq bat yû mù yhangmoq lé ung pyâm ri. Yhangmoq gi, yhûm haû mai gùngchîn sui nê yang yang hfang htoq ló bekô nghut ri.

<sup>17</sup> Haû hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhâng bang gi, chôm gyô gyuq bum akô. Yhumsîng Yesuq é myîng gi, hkya-on lhoq toq é hui bê nghut ri. <sup>18</sup> Lumjîng bê bang myo myo gi, lé mù, yhumsîng kut shut é agè ashop hkyô lé, myo myô hí má yín yu akô. <sup>19</sup> Myoqheq hpaqchyî kut zô é bang le, yhangmoq é laiká lé yu lé kôluí, shiwa byu pê hí má nyhê hkyô pyâm akô. Mausau haú pê é ahpau lé sôn wú le, ngùn chap ngo mun záng ri. <sup>20</sup> Haú dông mai, haû Yhumsîng é mungdang gi, ko lam lò mù, wum-o a-tsam je bo lò bê nghut ri.

### *Ehpesu Myuq Má Gabyông É Hkyô*

<sup>21</sup> Shí pé ban dut laí htâng má, Poluq gi, Makedoni mau eq Ahkaia mau dông sô laí ló mù, Yerusalem wà mó má ló jé râ ga myit hpyit yû luí, "Haû má ló jé tô é htâng má, ngò, Romaq myuq má le, jé wú râ dut ashî." ga taí ri. <sup>22</sup> Haû mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyó tô ri.

<sup>23</sup> Haú yoq lé, haû Yhumsîng é Hkyô yanmai gyai yhang gabyông lo bum akô. <sup>24</sup> Demetri gâ é ngùn bat zo sù rayuq gi, Artemi hpara é ngùn yhûm zông zo saí luí, mù saí luzúm wuî lé wó sùt nhang nyi ri. <sup>25</sup> Yhang gi, yhâng é ngùn bat zo luzúm wuî eq haú jung amû kut é góbang lé le ji tsîng to mù, taí é gi, "Luzúm wuî ê, muzó shí lhûm é yanmai, nga-nhúng nyì ngón yuqyo nyi é hkyô lé, nungmoq sê lhê. <sup>26</sup> Nghut kôle, ahkuí gi, Ehpesu myuq má za le a nghut lo, Asia mau lháng aluq jàm shoq, byu loq

èq saî é zè lé, garaî pé a nghut ga, shî Poluq ga sù mai byù myo myo lé mhoq hpoyq yù mù, hkyô shuî lhoq nghoq nyi é hkyô lé, nungmoq wó myâng, wó gyô nyi akô. <sup>27</sup> Haù mù luî, nga-nhông é muzó shî gi, hpoî byuq râ lé chiq râ é za a nghut, hparà myhí mó Artemi é noqkuq yhôm gi, haî a dut byuq luî, Asia mau gón eq mingkan gón mai noq é hparà myhí é shingkan hpoî byuq râ lé le myit chiq râ dut bê." gâ ri.

<sup>28</sup> Yhangmoq gi, dang haù lé wó gyô bùm kôjáng, nhik mó gyô yo kôluî, "Ehpesu myuq byu pé é Artemi gi, kô nyi sháng gaq ô!" ga chôm garû bum akô. <sup>29</sup> Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poî wàng mó shut radá dâm chyîn chyap wang ló bum akô. <sup>30</sup> Poluq gi, moq hpúng hau hí má htoq shit naù kôlhang, chángzô pé gi, yhang lé a wàng nhâng kó nghut ri. <sup>31</sup> Poluq é luzúm wuî nghut é, haù mau mâ é suwún wuî ra-am lhang, yhang lé poî wàng hkaù má a ê râ matú, hkûm pyám nhang akô nghut ri.

<sup>32</sup> Zîng tô é bang gi, hai hù háng le a sé lo dut byuq kômù luî, ra-am rajung ga garû bum akô. Myo mi-myo gi, haî mù luî yhangmoq haù má nyi tô é lé lhang a sê bùm kó nghut ri. <sup>33</sup> Yudaq byu pé gi, Alesander lé hí má chôm chyûn htoq kat kôluî, shiwa hpong mai ra-am gi, yhang hká dông taî râ hkyô lé mhoq byi kat akô. Alesander le shiwa hpong lé taî san kyo naù luî, zim byuq râ matú loq tu ri. <sup>34</sup> Nghut kôlhang, Alesander, Yudaq byù nghut é lé sé kôjáng, yhangmoq lhunglhang bang gi, rahtê za kut kôluî, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garû bum akô.

<sup>35</sup> Haù, myuq chyare hpó gi, shiwa moq mó lé lhoq zim luî taî é gi, "Ehpesu myuq byu pé ê, Ehpesu myuq shî gi, Artemi myhí mó é noqkuq yhôm eq mauhkûng mai byit

gyó lo é yhang é alhô lé, wú zúng nyi é wà nghut é hkyô lé, mingkan má a sê é ó yuq wa nyi lhê lú? <sup>36</sup> Haú mù luí, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko. <sup>37</sup> Shí nhik gi, noqkuq yhûm lé hpyoq zo su nhik le a nghut, nga-nhûng é hparà myhí lé lhoq hpoi su nhik le a nghut kô é le nhîng, nungmoq shuí lé bekô nghut ri. <sup>38</sup> Demetri eq yhang é ngùn bat zo luzúm wuí gi, rayuq yuq é ahtoq má mara hûn râ hkyô joq kô é nghut jáng, tarâ rûng pé hpông tô lhê. Tarâ agyì pé nyi lhê. Haú má yhangmoq ê kó sháng gaq. <sup>39</sup> Nungmoq táí nau é gó hkyô rajung jung joq é nghut le kúm gi, tarâ wang zuphpong mó má chôm táí pyâm râ nghut lhê. <sup>40</sup> Hkû-nyí gabyông é mù shí má, mù htoq wang a bo é yanmai, nga-nhûng lé mara hûn râ chiq râ ri. Shí su kut chôm míng é hkyô lé, hai é yanmai nghut lhê nghû, nga-nhûng a wó táí kyo nghut ri." gâ ri. <sup>41</sup> Shí pé ban táí é htâng má, yhang gi, shiwa moq mó lé lhoq pyo kat bê nghut ri.

## 20

### *Makedoni Mau Éq Grik Mau Đông Lai Lô É U Lhê Hkyô*

<sup>1</sup> Haú gabyông é hkyô zîm byuq é htâng má, Poluq gi, chángzô pé lé ji yù luí, yhangmoq lé wum byi dang táí to mù, shi-kyâm to luí, Makedoni mau shut htoq e lô bê nghut ri. <sup>2</sup> Yhang gi, haú mau mai sô lai lô uchyang, byu pé lé wum byi é dang myo myo táí luí, Grik mau má lô jé bê. <sup>3</sup> Yhang haú má lhamó sum hkyap nyi yù mù, lhai ji luí Suriq mau shut ê râ hen nyi é hkûn, Yudaq byu pé gi, yhang lé gyám nyi kô é yanmai, yhang gi, Makedoni mau đông tau lò râ lé myit hpyit bê nghut ri. <sup>4</sup> Yhang eq rabyìn za châng é bang gi, Beria wà mó mâ é Purû yhangzo Sopata, Htesaloni wà mó mâ é Aristakuq eq Sekundu nhik, Derbe wà mó mâ é Ge-u, Timohti, Asia mau mâ é Tuhkiku

eq Trohpinu nhik pé nghut akô. <sup>5</sup>Yhangmoq gi, hí so lánq luí, ngá-nhik lé Troa myuq má ló lánq nyi akô. <sup>6</sup>Nghut kôlhang, ngá-nhik gi, Azuma Poi\* laí é htàng má, Hpilipi wà mó mai lhaí ji ló le, ngo nyí nghû jánq, Troa myuq má yhangmoq lé hui luí, haú má nyhit nyí chôm nyi é nghut lhê.

*Troa Wà Má, Utuhku Ga Sû Lhoq Tui Toq Huí É Hkyô*

<sup>7</sup>Rabat é sâng-hi nyí lé, ngamoq gi, muk hpê gàm râ matú lé chôm zup zîng tô é hkûn, Poluq gi, htang nyí ló byuq râ ga hen tô é yanmai, chángzô pé lé gunggàm jé shoq hko kyô nyi ri. <sup>8</sup>Ngamoq zup zîng nyi é haú ahtoq pyâm wap má, myibung myo myo le duq tô ri. <sup>9</sup>Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luí, yhûm sum tsáng mai byit gyó mù, yhang lé bún toq wú le shi byuq bê nghut ri. <sup>10</sup>Haú hkûn, Poluq gi, gyó ló mù, po ngop to luí, "Hkâdân ko, yhang soq bo ashî." ga taí ri. <sup>11</sup>Haú mù, yhang gi, dum tau doq ló luí, muk lé hpé mù, zo luí, maubó shoq yhangmoq eq dang nyo kún mù htoq ló bê nghut ri. <sup>12</sup>Zorâm zo haú lé duì gù shuí ló kômù, nhik tîng é gyai yhang hui bekô nghut ri.

*Troa Wà Eq Melitu Wà Gyoro Mâ É Hkyowui*

<sup>13</sup>Poluq gi, myì hkyô ló râ matú hen tô é yanmai, yhang lajang byí é eq rajung za, yhang lé Asu wà má lhaí lhom shuí ji râ matú, ngamoq gi, lhaí ji mù hí ló lánq bê nghut lhê. <sup>14</sup>Haú mù, yhang gi, Asu wà má ngamoq eq hui luí, ngamoq gi, yhang lé lhaí má shuí jî chûng mù, Mitulene myuq shut e ló bê. <sup>15</sup>Htang nyi, ngamoq gi, haú mai lhaí ji mù, Kiu zinlóng yâm mai laí ló luí, hau htang nyí gi, Samu zinlóng má laí dap ló luí, htang nyí gi, Melitu wà mó má jé

\* 20:6 Múnchi a bo é Muk zo Poi lé, Azuma Poi le gâ lhê.

lò bê nghut lhê. <sup>16</sup> Poluq gi, wó dut é nghut jáng, Pentekoti buinyì lé Yerusalem wà mó má wó jé shoq gà é yanmai, Asia mau má buinyì a kâm lhoq htum naù mù luí, Ehpesu myuq lé lhaí pyâm to râ matú, myit hpyit to bê nghut ri.

*Ehpesu Hpúng Suwún Wuí Lé, Poluq Shi-kyâm Tô É Dang*

<sup>17</sup> Poluq gi, Melitu wà mó mai Ehpesu shut byù nhang kat luí, hpúng suwún wuí lé ê jî nhang ri. <sup>18</sup> Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyì mai, nungmoq eq hkâsu kut nyi nyi é ahkyíng banshoq lé le; <sup>19</sup> Yudaq byu pé jeq hô luí, ngò wúhke jamjau hui zo kôlhang, haú Yhumsing é muzó lé, ngò myit gyai lhoq nyhûm é eq ngaubyi ngaù nhap é èq wùn waq é hkyô lé le; <sup>20</sup> nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pé hí eq rayhûm htâng rayhûm má ngò nungmoq lé mhoqshit é hkyô lé le; <sup>21</sup> ngò gi, Yudaq byu pé eq Grik pé lé, myit lhing mù Garai Gasâng chyáng lhing lò ra eq, nga-nhûng é Yhumsîng Yesuq lé lumjîng ra hkyô lé, saksé hkâm kyo lugù nghut bê lé le, nungmoq sê nyi akô.

<sup>22</sup> Ahkuí, ngò gi, Woi-nyí má tuí tô é hui bê yanmai, Yerusalem wà mó má e lò lhê; haú má, ngò haí lò dut râ lé kúm gi, a sé nghut ri. <sup>23</sup> Ngò gi, htóng eq wúhke jamjau hkyô ngo lé láng tô ri ga, wà hkangmó má Chyoiyúng Woi-nyí èq lhoq pûn é hkyô lé za sê nyi lhê. <sup>24</sup> Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsîng Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

<sup>25</sup> Garai Gasâng é mingdán hkyô lé hko kyô wún é hkûn, ngò eq huí é nungmoq lunglhang bang gi, htâng nùng má ngo lé a myàng lo kó râ nghut é lé, ahkuí ngò sê to bê. <sup>26</sup> Haú mù luí, ó yuq nghut kôlhang, yubak mara má

shi byuq ló é nghut le, haú yuq é sui chyên gi, ngò má a dap lô é hkyô lé, hkû-nyí, ngò saksé hkám tô lhê. <sup>27</sup> Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê. <sup>28</sup> Nungmoq gi, yhumsing gùng lé le, nungmoq lé Chyoiyúng Woi-nyí eq up zúng nhang é sau hpúng† lhunglhâng lé le, zúng nyí keq. Garai Gasang Yhâng súi eq wui tô é noqkuq hpúng lé le, rém zúng nyí keq. <sup>29</sup> Ngò ló byuq é htâng má, sau hpúng lé a shogyô é, ashop é wamhkui gi, nungmoq chyáng jé râ nghut é hkyô lé, ngò sê lhê. <sup>30</sup> Hau htoq agó, chángzô pé lé wó mhoq hpyoq yú shoq ga, shut é đông taí é byu pé lhâng nungmoq chyáng mai htoq lô râ nghut lhê. <sup>31</sup> Haú mù luí, nungmoq yuq hkangmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyí keq.

<sup>32</sup> Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq títng mù, lhoq chyoiyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. <sup>33</sup> Ngò gi, ó yuq é hîng, ngùn, mebu pé lé le a myoqnoq wú. <sup>34</sup> Ngá é loq shí í loq gi, ngò eq ngá htâng châng é bang ra châ é lé kut byi bê hkyô lé, nungmoq yhang sé gû nghut lhê. <sup>35</sup> Ngò kut é muzó banshoq gi, nungmoq é alik dut bê nghut luí, shí su kut shikut é đông mai, nga-nhúng gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsîng Yesuq taí é dang lé bûn nyí sháng." gâ ri.

<sup>36</sup> Poluq gi, haú su ga ban taí jáng, hkyihput htuq mù, yhangmoq lhunglhâng bang eq rahá za kyûdûng ri. <sup>37</sup> Yhangmoq lhunglhâng bang gi, yhang lé po to luí,

† 20:28 Sau hpúng gâ é gi, lumjîng é bang lé gâ lhê.

bopuq puq mù, chòm ngaù akô. <sup>38</sup> Htâng nùng má, yhang lé dum myàng rã a nghut lo gã é dang yanmai, yhangmoq gi, je riyhang yón kuq bum akô. Yhang lé, lhaí má jé shoq lé châng dé kat akô nghut ri.

## 21

### *Yerusalem Wà Mó Shut Doq Ló Nyi É U Lhê Hkyô*

<sup>1</sup> Ngamoq gi, yhangmoq lé kang pyâm to luí, lhaí jî chùng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê. <sup>2</sup> Haú wã má Hpinisi mau shut dap ló é lhaí lé, ngamoq myàng luí, haú mai chòm jî chùng bê. <sup>3</sup> Haú hkûn, ngamoq gi, Kupru zinlóng lé myàng jáng, hau é loqyo hkyam đông lái ló luí, Suriq mau shut e ló le, hpugá zê lé hkyó rã matú, Turuq myuq má nô é nghut lhê. <sup>4</sup> Haú wã má, chángzô pé lé myang hô luí, yhangmoq chyáng nyhit nyí bíng yu é. Chángzo haú bang gi, Chyoiyúng Woi-nyí èq lhoq pûn é đông Poluq lé Yerusalem wà mó shut a ló rã matú, chòm hkûm akô. <sup>5</sup> Nghut kôlhang, nyhit nyí haú lai jáng, ngamoq gi, ngamoq é hkyowuì shut dum xoq sô htoq ló bê. Chángzô pé lhunglhâng bang gi, yhangmoq é myi zo wuì eq rahá, ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyàm má hkyihput htuq mù, kyû chòm dung bê nghut lhê. <sup>6</sup> Hau htâng, rayuq eq rayuq ban shi-kyâm lhum jáng, ngamoq gi, lhaí má wàng bê; yhangmoq gi, yhûm shut dum tau ló byuq bekô nghut ri.

<sup>7</sup> Ngamoq gi, Turuq myuq mai lhaí jî chùng mù, Toleme wà má jé ló bê. Ngamoq gi, haú wã mã é gumang wuì lé shichyên yù mù, yhangmoq eq rahá ra-nyí chòm nyi kûn é nghut lhê. <sup>8</sup> Htang nyí gi, ngamoq haú wã mai htoq ló mù, Kesare wà mó má dum jé bê. Haú wã má, haú htuqluq

htuqbang nyhit yuq\* má bò sù, gabú danglù hko taí é Hpilip gá su é yhúm má, ngamoq wang bíng bê nghut lhê. <sup>9</sup> Yhang gi, yhang hku tô é byizo zomyi myiqhtoi myi yuq wó ri.

<sup>10</sup> Ngamoq gi, haú yhúm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri.

<sup>11</sup> Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyî pé má tui mù luí, taí é gi, "Shí hpyihit yhumsíng lé, Yerusalem wà mó mâ é Yudaq byu pé mai shí su kut lhom tui luí, tûngbaù pé é loq má ap pyám kó râ nghut lhê;" ga luí, Chyoiyúng Woi-nyí taí ri." gâ ri.

<sup>12</sup> Dang haú lé wó gyo jáng, haú mâ é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkúm bê nghut lhê. <sup>13</sup> Nghut kôlhang, Poluq gi, "Nungmoq gi, haí mù luí ngaubyi ngau-nhap kut é eq, ngo lé myit wum gyui râ dông kut nyi akô lhú? Ngò gi, Yhumsíng Yesuq é yanmai, Yerusalem wà mó má, tuí é hui râ za a nghut, shí hkâm râ matú le rì rì nghut lhê." ga tû taí pyâm ri. <sup>14</sup> Yhang lé wó taí hkúm râ su a dut lo jáng, ngamoq gi, "Garai Gasang ô nau é dông nghut sháng gaq." nghu luí, zim za chôm nyi bùm bê.

<sup>15</sup> Hau htâng má, ngamoq gi, zè món chùng mù Yerusalem wà mó shut doq ló bê nghut lhê. <sup>16</sup> Kesare wà mó mâ é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhúm má shuí ló mù, yhâng chyáng bíng nhang akô.

*Yerusalem Wà Mó Má, Yakuq Lé Ê Huí Ê Hkyô*

<sup>17</sup> Yerusalem wà mó má ngamoq jé é hkûn, gumang wuì gi, ngamoq lé gabú tung lhom hkûlum yu akô. <sup>18</sup> Htang

---

\* 21:8 Lagyo 6:1-6



nyí, Poluq eq ngamoq gi, Yakuq lé ê huí le, hpúng suwún wuí le zîng nyi to lánq akô. <sup>19</sup> Poluq gi, yhangmoq eq ban shichyen jáng, yhang wùn waq láí lo é hpúng mú đông mai, Garai Gasâng eq tûngbaù pè chyáng kut byi bê hkyô pé lé, jìhkúm nuqguq shit kyô ri.

<sup>20</sup> Yhangmoq gi, haù lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjínq é bang hkâ-myhó hkyíng mun nghut bê lé, nàng sê lhê. Haù bang lhunglhang gi, jep é tarâ má myit zuq to bê bang chyat nghut bum akô. <sup>21</sup> Nghut kôlhang, yhangmoq lhunglhang bang gi, tûngbaù pè chyáng nyó lúnq tô é Yudaq byù banshoq bang lé, nàng, yhumsing yhangzo yhangshù pè é matú ahpyo-kuq hpyit a ra nghu é eq nga-nhûng é htûng tarâ lé châng nyi a ra nghu luí, Mosheq é tarâ lé tô pyám râ đông mhoqshit ri gâ é dang lé, wó gyô yu bùm bekô nghut ri.

<sup>22</sup> Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu kut lo râ lhu? <sup>23</sup> Haù mù, ngamoq taí é đông kut aq, ngamoq chyáng danggidiq mó byi bê byù myi yuq nyi lhê. <sup>24</sup> Nàng gi, haù bang lé ji yù mù, yhangmoq eq rahá lhoq san lhoq yúnq yù aq, yhangmoq lé u wó wuq yù râ matú, ahpau le htoq byi aq. Haù hkûn sheq, byù lhunglhang bang gi, yhangmoq wó gyô tô é hkyô a têng byuq é eq, nàng yhang lhang, jep é tarâ lé, châng kut nyi sù nghut é hkyô lé, sé kó râ nghut lhê. <sup>25</sup> Lumjínq é tûngbaù pè é matú kúm gi, hparà lhô pé lé tîng byí é zoshuq, sui, lingzing mai myhik sat é dusak sho eq ashop é đông gungsho zùm yap é hkyô pé lé, yhangmoq koi pyám râ matú, ngamoq chôm doqdan luí, kâ hùn kat bê nghut lhê." ga akô.

<sup>26</sup> Haù mù luí, Poluq gi, hau htang nyí haù bang lé ji yù luí, yhangmoq eq rahá, lhoq san lhoq yúnq yù mù, noqkuq yhûm má wàng luí, yhangmoq yuq hkangmó é

matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

*Poluq Chyup Yû Huí É Hkyô*

<sup>27</sup> Buinyi nyhit nyí haû ngap râ yàm má, Asia mau mâ é Yudaq byu pé ra-am gi, noqkuq yhûm má Poluq lé myàng kômù, shiwa byu pé lé shuí gabyong luî, yhang lé chyup yû mù, garû taí kô é dang gi, <sup>28</sup> "Israelaq byu pé ê, garúm yû keq, shí yuq gi, nga-nhûng byuhú lé le, jep é tarâ lé le, jowò shî lé le, shut shai é dông jowò hkangmó mâ é byù banshoq lé mhoqshit sù nghut ri. Hau htoq agó, noqkuq yhûm má Grik pé lé shuí háng é eq, chyoyúng jowò shî lé achau achyut kut é sù nghut ri." gâ akô. <sup>29</sup> (Hkâsu mù gâ le, yhangmoq gi, Ehpesu myuq byû Trohpimu ga sù eq Poluq wà hkaû má rahá nghut kô é lé, myàng kômù, haú yuq lé noqkuq yhûm shut shuí háng nhô ngam pyám kô é yanmai nghut ri.)

<sup>30</sup> Rawà gón gabyông lo mù, shiwa byu pé lhîngkhyuq mai din lé lô kôluî, Poluq lé chyup zing to uchyang, noqkuq yhûm shinggan shut she hkyut htoq ló akô. Haú hkûn jáng, hkum pé lé myhî pyâm akô nghut ri. <sup>31</sup> Poluq lé yhangmoq sat râ dâ nyi kô é hkûn, Yerusalem wà gón gabyông nyi akô gâ é hkyô lé, Romaq dap up zaû é no má, lò jé ri. <sup>32</sup> Haû mù, yhang gi, radá dâm shô up gyezau ram eq gyezô pé lé shuí chûng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

<sup>33</sup> Haú hkûn, dap up zau hpó gi, Poluq chyáng ê jé mù, yhang lé chyup yû luî, toqjâng tui í hkat eq tuí to nhang ri; hau htâng, yhang ó yuq nghut é hkyô lé le, haí kut shut é hkyô lé le myî wú ri. <sup>34</sup> Shiwa byu pé kúm gi, rayuq rajung ga garû bum akô. Haû mù, gyezau hpó gi, lûm garu kô

é yanmai, têng é hkyô lé rago a wó sê yù jáng, Poluq lé gyewap má shuí ló nhang ri. <sup>35</sup> Poluq gi, zumhtâng wang má jé lo é hkûn, byù moq mó lûm htim chyîn chyap lô kô é yanmai, gyezô pé gi, yhang lé waq doq ló akô. <sup>36</sup> Shiwa byu pé gi, "Yhang lé sat pyám keq." ga châng garû nyi akô nghut ri.

*Poluq, Yhumsing Gùng Mara A Bo É Lé Taî Sân Kyô É Hkyô*

<sup>37</sup> Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ lú?" ga myi jáng, dap up zau hpó gi, "Nàng, Grik myíng dat mu lhê lú?" <sup>38</sup> Nàng gi, hí hkûn gumlau kut mù, byù sat wún bang myi hkyîng lé, yoso shut shuí htoq ló é sù, Egutuy byû a nghut lú?" ga tau myî ri.

<sup>39</sup> Haú hkûn, Poluq gi, "Ngò gi, Kiliki mau Tarshu myuq mâ é Yudaq byû nghut lhê; ngò nyi é wà gi, wà chyap wà zo za a nghut, jeju mai, byù shí bang lé ngò dang taí râ ahkáng byi laq." ga dûng ri.

<sup>40</sup> Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haú hkûn, yhangmoq lhunglhâng bang zim byuq kômù, Poluq, yhangmoq lé Hebre myíng dông taí é gi,

## 22

<sup>1</sup> "Gumang wuì eq îwa pé ê, ahkuî, ngò mara a bò nghu taí é dang lé gyô wú shi keq." gâ ri.

<sup>2</sup> Yhangmoq gi, yhang Hebre myíng dông taí é dang lé wó gyô bùm kôjáng, gyai yhang zím byuq bekô. Haú mù, Poluq xoq taí é gi, <sup>3</sup> "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhâng, wà mó shí má nyi kô lò sù nghut lhê. Ngò gi, nga-nhûng îchyí îwa pé é jep é tarâ lé, Gamalelaq é loq má jihkúm nuqguq mhoq yû luî, hkû-nyí lhê é nungmoq lhunglhâng bang su, Garai Gasang lé gyai myit zìng zuq é sù nghut lhê. <sup>4</sup> Ngò

gi, shí Hkyô cháng bang lé shi é jé shoq, zing-rî wú é sù eq, myiwe yuqgè ó yuq lé nghut kôlhang, chyup yû mù htóng má lhung pyâm wú bê sù nghut lhê. <sup>5</sup> Hkyangjong mó eq byìn tú wap suwún wuí lhunglhâng bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wui lé byi râ laiká yhangmoq chyáng mai wó yu chûng luí, haú mâ é bang lé le Yerusalem wà mó má dam byi râ matú, chyup tuí ló râ nghû, Damaskuq myuq shut e é nghut lhê.

<sup>6</sup> Nyigûng tû zó lé, ngò Damaskuq myuq shut sô chyâng ló nyi é hkûn, maubó gi, ngá é lhinghkyuq má mauhkûng mai byodàn tung duqbó to bê nghut ri. <sup>7</sup> Haú mù, ngò myigûng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rî nyi lhê lú?' gâ ri.

<sup>8</sup> Ngò le, 'Yhumsîng ê, nàng ó nghut lhê lú?' nghu myí kat jáng, 'Ngò gi, nàng zing-rî wún é sù, Nazaret wà byù Yesuq nghut lhê.' ga luí, Yhang tû taí kat ri. <sup>9</sup> Ngò eq rahá e ló é bang kúm gi, maubó lé myàng kôlhang, ngo lé taí é danghtê lé a sê gyo kó nghut ri.

<sup>10</sup> Dum, ngò gi, 'Yhumsîng ê, ngò haí kut ra râ lú?' nghu myi jáng, haú Yhumsîng gi, 'Toq mù, Damaskuq myuq má wang ló aq, nàng kut râ matú wò byî tô é hkyô pé lhunglháng, nang lé haú má lhom taí kyo berâ nghut lhê.' ga ngo lé dum taí ri. <sup>11</sup> Haú maubó é shingkâng é yanmai, ngò myoqjit byuq mù, ngá é byinzùm wui gi, Damaskuq myuq shut ngo lé loq mai she wang ló akô.

<sup>12</sup> Haú hkûn, Anani gâ é yuqgè rayuq ngá chyáng lé huí ri. Yhang gi, jep é tarâ lé gyuq hkunggâ é eq, haú má nyi é Yudaq byû lhunglhâng bâng é hí má myoqdong gyai wó é sù nghut ri. <sup>13</sup> Yhang gi, ngá nâm má yap to luí, 'Gumang Sholuq ê, náng myoq myàng aq hkoii!' ga taí ri. Haú hkûn jáng yhang, yhang lé ngò wó myang kat bê nghut lhê.

<sup>14</sup> Yhang dum xoq taí é gi, 'Nga-nhông îchýí îwa pê é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sû lé wó myâng luí, Yhâng é nhut má é mungdang lé wó gyo sháng gaq ga luí le, hkyin to bê nghut ri. <sup>15</sup> Haú mù, nàng gi, nàng myang é eq wó gyô yu é hkyô pé lé, byù lhunglhâng bâng é hí má, Yhâng é matú saksé hkám byi râ su dut râ nghut lhê. <sup>16</sup> Ahkuí, nàng haí lé lánng nyi ashî lúh? Toq aq, Yhâng é myìng lé lang luí wui-myhup hkâm yu é eq, náng é yubak mara pé lé chí sân pyám aq.' gâ ri.

<sup>17</sup> Hau htâng, ngò gi, Yerusalem wà mó má dum taú jé ló mù, noqkuq yhûm má kyû ê dúng nyi le, moq byuq ló mù, <sup>18</sup> 'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsîng ngo lé taí nyi é lé, myoqwup shing-rán dông myang ri.

<sup>19</sup> Haú mù, ngò gi, 'Yhumsîng ê, tarajong ralhûm htâng ralhûm má nang lé lumjîng bang lé, htóng má chyup lhûng pyâm é eq, hkat bat lhing wún é hkyô lé, yhangmoq sê bum akô. <sup>20</sup> Náng é saksé Stehpan sat hui luí suí shun u lé, ngò nàm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byî é nghut lhê.' nghû tû taí bê.

<sup>21</sup> Haú hkûn, Yhumsîng gi, 'Ê aq, ngò, nang lé, wê gâng é tûngbaù pê chyáng nhang kat râ.' ga, ngo lé taí ri." gâ ri.

*Poluq, Romaq Mingdán Byû Nghut É Hkyô*

<sup>22</sup> Shiwa byu pé gi, dang haú hkun jé za gyô yù kômù, "Shî sù é byù gi, myigùng htoq má nyi a gíng, sat pyám keq." ga, htê mó èq garû bum akô.

<sup>23</sup> Yhangmoq gi, haú su garu uchyang, yhumsîng buhîng lé hkyut dú pyâm lhê, hpuilhup lé mauhkûng shut kyaq tâng lhê, kut nyî kôjáng, <sup>24</sup> dap up zau hpó gi, Poluq

lé gyewap má shuí hâng yù nhâng mù, yhang lé shiwa byu pé haî mù shî su ga garû bùm kô é hkyô lé wó sé shoq ga, nhuq bat nhâng luí, myî choq nhang ri. <sup>25</sup> Nhuq bat râ matú shokuq tuí eq tui kôjáng, Poluq gi, nàm má yap tô é shô up gyezau lé, "Romaq mingdán byû ru nghut sù lé nhîng, lháng a jéyáng shimá, nungmoq nhuq bat le gi, tarâ wang akô lú?" ga tâ ri.

<sup>26</sup> Rashô up gyezau gi, dang haû lé wó gyo jáng, dap up zaû chyáng ló mù, "Nàng haî kut râ dâ nyi lhê lú? Shí yuq gi, Romaq mingdán byû sheq ru nghut ri." ga luí, yhang lé ló tâ kyô ri.

<sup>27</sup> Haû mù, dap up zau gi, Poluq chyáng ê mù, "Nàng gi, Romaq mingdán byû nghut lhê lú? Tâ kyô wú laq." ga myî ri.

Poluq gi, "Ngò, Romaq mingdán byû nghut lhê." ga tû tâ ri.

<sup>28</sup> Haú hkûn, dap up zau hpó gi, "Ngò lháng ahpau myo myo byî pyám luí sheq, Romaq mingdán byû ru wó dut é nghut lhê." ga tû tá jáng, Poluq gi, "Ngò kúm gi, Romaq mingdán byû dut gû hku lé lo é sù nghut lhê." ga tâ ri.

<sup>29</sup> Yhang lé myî choq wú râ gâ é bang gi, haú hkûn jáng, yhâng chyáng mai huí zut ló bûm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

*Yudaq Byìn Tú Wapdoq Suwún Wuî Gam Hkoq Byuq É Hkyô*

<sup>30</sup> Htang nyí, dap up zau hpó gi, Yudaq byu pé mai Poluq lé hun é mara haî nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuî lhunglháng lé ji tsîng to luí, yhangmoq é gung gûng má Poluq lé shuí wàng mù, shap to bê nghut ri.

## 23

<sup>1</sup> Haú hkûn, Poluq gi, Yudaq byìn tú wapdoq suwún wuî lé wú tsuq to mù, "Ngá gumang wuî ê, ngò gi, hkû-nyí jé shoq Garai Gasâng é hí má sansêng é i-myit èq asak dui nyì bê nghut lhê." ga taî ri. <sup>2</sup> Haú mù luî, hkyangjong mó Anani gi, Poluq nâm má yap to bang lé, yhâng nhut má bat byi keq gâ ri. <sup>3</sup> Haú hkûn, Poluq gi, yhang lé, "But hpyu tô é xewâm\* nàng ê, nàng lé sheq Garai Gasâng èq bat râ nghut lhê. Nàng gi, tarâ eq rajung za ngo lé jéyáng râ matú shí má zung to luî nhîng, haî mù tarâ eq shut shai é dông ngo lé bat nhang lhê lú?" ga taî ri.

<sup>4</sup> Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lú?" ga luî, chôm taî akô.

<sup>5</sup> Poluq gi, "Gumang wuî ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyû lé up é sù lé wó rhoi râ a nghut.'<sup>☆</sup> ga le kê tô é nghut lhê." ga tû taî ri.

<sup>6</sup> Hau htâng, haú zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wuî lé, "Gumang wuî ê, ngò gi, Hparishe awut ashín mâ é, Hparishe rayuq nghut lhê. Shí bê bang dum dui toq lô râ hkyô lé myit myoqbyù é yanmai, ngò jéyáng é huî nyi ri." ga luî, garû taî kat ri.

<sup>7</sup> Yhang haú su ga taî kat jáng, Hparishe pé eq Saduke pé gi, dang jet jet lhûm lò kômù, Yudaq byìn tú wapdoq hpong gi, gam hkoq ló byuq bekô nghut ri. <sup>8</sup> (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taî bum akô. Hparishe pé kúm gi, haú pé joq lhê ga, lumjîng bang nghut akô.)

\* 23:3 But hpyu tô é xewâm gâ é gi, gegùn labyoq kut bang lé gâ lhê.

☆ 23:5 Htoq Ló 22:28

<sup>9</sup> Haû mù luî, gyai yhang taî garû bum akô. Haû hkûn, Hparishe hpúng mâ é tará sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu nghû kó râ lhu?" ga luî, zuq zuq taî htîng lhûm akô nghut ri. <sup>10</sup> Haû su kut gyai yhang taî htîng lhûm lò kôjáng, dap up zau hpó gi, Poluq lé lêng myha pyám kó râ lé chiq é yanmai, yhangmoq chyáng gyó ê mù, Poluq lé haú bâng é gung gûng mai ê lú shuí lò luî, gyewap má shuí wang ló râ matú, gyezô pé lé nhang kat ri.

<sup>11</sup> Haú myîn, Yhumsîng gi, Poluq é nàm má yap to luî, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taî ri.

### *Poluq Lé Sat Râ Haq Dâ É Hkyô*

<sup>12</sup> Htâng napkyó, Yudaq byu pé gi, Poluq lé sat râ hpaqchyî chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri. <sup>13</sup> Hpaqchyî shî lé chôm dâ é bang gi, myi xê yuq chyân nghut bum akô. <sup>14</sup> Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat gi, ngamoq haî le a zo nghû, chôm dakam yu to bê nghut lhê. <sup>15</sup> Hau é yanmai, ahkuî nungmoq gi, Yudaq byîn tú wapdoq suwún wuî eq rahá kut luî, Poluq é hkyô lé rago za myî gon wú râ nghu mhaû é dông, yhang lé nungmoq chyáng wut yù râ matú, dap up zaû chyáng dúng kat keq. Haû hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga taî akô.

<sup>16</sup> Nghut kôlhang, haû lhom haq sat kó râ gâ é hkyô lé, Poluq é yhâng nhammó é yhangzo yuqgè zo wó gyô yù luî, yhang gi, gyewap má wang ê mù, Poluq lé ê taî kyô ri.



<sup>17</sup> Haú hkûn, Poluq gi, shô up gyezau rayuq lé ji yù mù, "Zorâm shî lé dap up zaú chyáng shuî ê aq, yhang, yhang lé shit kyo râ hkyô rajung joq lhê ga." ga tái ri. <sup>18</sup> Haú mù luî, shô up gyezau hpó gi, zorâm haú lé dap up zaú chyáng shuî ê mù, "Zorâm shî nang lé shit kyo râ hkyô rajung joq lhê gâ ri ga, yhang lé náng chyáng shuî lé râ matú, htóng byû Poluq gi, ngo lé ji yù mù tái ri." ga, yhang lé tái ri.

<sup>19</sup> Haú jáng, dap up zau hpó gi, jauwò má zorâm haú lé yhâng loq mai she ê mù, "Nàng ngo lé hái jung shit kyó nau ri lhú?" ga, yhang lé baú tsik za myí ri.

<sup>20</sup> Haú hkûn, zorâm haú gi, "Yudaq byu pé gi, Poluq lé rago za saí myí wú râ su kut mhaú mù, napmá, Yudaq byin tú wapdoq má shuî yù râ matú, náng chyáng dung kó râ ga, myit chôm huî to bekô nghut ri. <sup>21</sup> Haú mù luî, yhangmoq ô nau é đông hkâgyo byi, hkâsu mù gâ le, Poluq lé a wó sat sat gi, hái le a zo a shuq râ nghut lhê ga, byù myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yû râ matú haq lhom to lánng kó râ nghut lhê. Ahkuî lhang, yhangmoq gi, mù haú kut râ matú rì rì nghut bûm bekô; náng é ahkáng lé za lánng nyi bum akô nghut ri." ga shit kyô ri.

<sup>22</sup> Haú hkûn, dap up zau hpó gi, zorâm haú lé, "Nàng, ngo lé shí hkyô shit kyo bê hkyô lé, ó yuq lé le hkâtaí kyo." ga, sidiq byi mù, taú nhang kat bê nghut ri.

### *Mingzau Hpilik Chyáng Poluq Lé Dé Kat É Hkyô*

<sup>23</sup> Hau htâng, yhang gi, shô up gyezau í yuq lé ji yù mù, "Hkû-myîn sum hkyíng<sup>†</sup> má Kesare wà mó shut ê râ matú, gyezô pé í shô, myang ji bang nyhit xê, lhâm chûng bang í shô kut mù, rì rì hen to keq. <sup>24</sup> Hau htoq agó, Poluq lé mingzau Hpilik chyáng ngón za wó dé kat râ matú, yhang

<sup>†</sup> 23:23 Myín sum hkyíng gi, nga-nhûng é myín gau hkyíng nghut lhê.

ji rã myang pé le lajang byi keq." ga, yhangnhik lé pying kat ri.

<sup>25</sup> Laiká hun kat é le:

<sup>26</sup> "Aróng wó dik é mauzau Hpilik ê, ngò Klodi Lusi gi, ngingón danglù shit kyô kat lhê.

<sup>27</sup> Shí yuq lé gi, Yudaq byu pê eq chyup yû mù sat pyám rã dâ nyi bekô za nghut lhê. Nghut kôlhang, ngò gi, gyezô pé eq rahá ê wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê. <sup>28</sup> Haû su mù, haû mù yhang lé mara hûn kô é hkyô lé sé nau é yanmai, yhangmoq é Yudaq byìn tú wapdoq má yhang lé shuí jé byî wú bê nghut lhê. <sup>29</sup> Haú hkûn, yhangmoq é tarâ hkyô eq séng luí za mara hun bùm kô é lé ngò myang ri. Nghut kôlhang, shí gíng é eq htóng lhúng gíng é mara haû le a bò nghut ri. <sup>30</sup> Shí yuq lé sat pyám rã hpaqchyî da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hûn nau é bang lé gi, nang hí má yhang hun lhum keq nghû pying kat bê nghut lhê." gâ ri.

<sup>31</sup> Haû mù luí, gyezô pé gi, haû pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. <sup>32</sup> Htang nyí, myang ji bang lé ê châng dé nhâng kômù, yhangmoq gi, gyewap shut dum taû lò bekô nghut ri. <sup>33</sup> Myang jî é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byî akô nghut ri. <sup>34</sup> Haú hkûn, mauzau hpó gi, laiká haû lé ban nghap jáng, Poluq hká mau mâ é byû nghut é hkyô lé myî wú luí, Kiliki mau mâ é byû nghut é lé sé jáng, <sup>35</sup> "Nang lé mara hûn bang jé jáng sheq, náng mù lé ngò gôn wú rã." ga taî ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

## 24

*Poluq, Mara Hùn Huí É Hkyô*

<sup>1</sup> Hau htâng, ngo nyí lai jáng, hkyangjong mó Anani gi, suwún wuî ra-am eq tarâ sé sù Tertulu lé shuí gyó ló mù, mauzau hpô hí má Poluq lé mara lé taí hun bum akô. <sup>2</sup> Haú hkûn, Poluq lé hí má ji hâng tô é nghut mù, Tertulu, yhang lé mara hùn dang taí hi é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nàng sê up sê hkang é jeju lé, byù myû shî wó hkâm zô nyi é yanmai, <sup>3</sup> ngamoq gi, haú lé hkyô hkat hkangmó eq jowò hkangmó má jeju bûn é myit eq hkam yu nyi bê nghut lhê. <sup>4</sup> Nghut kôlhang, ngò nang lé lhoq hkyik é đông a dut sháng gaq, taí râ dang ratot zo lé, myit hîng hîng to mù gyo byi laq ngû dúng tôngbán lhê ô!

<sup>5</sup> Shí yuq gi, byù lé gunjang sù, mingkan gón mâ é Yudaq byu pé lhunglhang lé shuí gabyong sù eq, haú Nazaret hpúng mâ é hkyô-u shê sù nghut é lé, ngamoq myang ri. <sup>6</sup> Hau htoq agó, yhang gi, noqkuq yhûm lé achayut kut râ dâ nyi luî, yhang lé ngamoq chyup yû mù, (ngamoq é tarâ đông jéyáng râ hen nyi é hkûn, <sup>7</sup> dap up zau Lusi gi, lé lô mù, ngamoq é loq mai yhang lé lé lú shuí yù luî, yhang lé mara hùn bang lé, náng chyángjé keq ga hkunmó hkyô tô é nghut lhê.) <sup>8</sup> Haú mù, nàng, yhang lé myí wú jáng, ngamoq yhang lé hun é mara banshoq têng é hkyô lé, nàng wó sé râ nghut lhê." gâ ri.

<sup>9</sup> Yudaq byu pé le, haú pé gi, têng lhê ga bo chôm taí akô nghut ri.

*Poluq, Mara A Bò É Lé Taí Hung É Hkyô*

<sup>10</sup> Mingzau hpó gi, Poluq lé dang taí râ đông loq lik kat jáng, Poluq taí é gi, "Zau ê, shí mau bâng é ahtôq má, nàng zanwut myo myo jéyáng byî nyi é hkyô lé, ngò sê é yanmai,

ngò gabú myit èq yhumsing matú, mara a bo é hkyô tái bá. <sup>11</sup> Ngò, Yerusalem wà mó má noqkuq râ matú doq e é buinyì raxe í nyí lhang a chyân shi é gi, nàng luì za wó sé râ nghut lhê. <sup>12</sup> Noqkuq yhûm má ngò ó yuq eq tái htîng lhûm é lé lhang, tarajong, a nghut jáng, wà hkaû hká jowò má le byu pé lé shuí gabyông é lé lhang, ngo lé mara hun é bang gi, a myàng kó. <sup>13</sup> Ahkuî, ngo lé yhangmoq hun é mara pé lé, náng hí má yhangmoq saksé lhang a wó tûn shit kó nghut ri. <sup>14</sup> Nghut kôlhang, náng hí má ngò yín yû râ hkyô rahkat gi, yhangmoq èq shut shaî hkyô ga myhîng tô é Hkyô lé cháng luî, ngamoq é îchyí îwâ pê é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjîng lhê. <sup>15</sup> Ngò gi, dingmán é bang eq a dingmán bâng é dum dui toq lô râ hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. <sup>16</sup> Haû mù luî, Garai Gasang eq byu é hí má, ngò gi, râ é hkyô a bo é za, myit é hkyô san za wó dut nyi shoq, shikut nyi lhê.

<sup>17</sup> Zanwut tsómra lai é htâng má, ngò gi, ngá é byù myû mâ é myùng bang lé chyunghuq byi râ eq alu kat râ matú, Yerusalem wà mó shut ló jé bê nghut lhê. <sup>18</sup> Haû su kut nyi é hkûn, ngò eq rahá hai byù moq mó le a nyi, hai jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô. <sup>19</sup> Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hûn râ hkyô joq kê é nghut le gi, shî náng é hí má yhangmoq lé jé kó ra nghut lhê. <sup>20-21</sup> Haû a nghut jáng, shî má nyi tô é bang gi, ngò Yudaq byìn tú wapdoq hí má yap tò mù, 'Shi byuq bâng é dum dui toq râ hkyo é yanmai, hkû-nyí nungmoq ngo lé jéyáng nyi akô.' nghû luî, garû é dang hkûn mai lai luî, ngò má gotû mara myàng shi kê é nghut le gi, yhangmoq yhang tái kyo kó sháng gaq." gâ ri.

<sup>22</sup> Hpilik gi, Hkyô haû lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luî, yhangmoq lé ahkýng htot kat byî ri.

<sup>23</sup> Poluq lé le, zúng za zúng to mù, yhâng é buinùm ji-myi wuì mai yhang ra châ é hkyô lajang byi naû kô é bang nyi le gi, ahkáng byi keq ga luî, shô up gyezau lé hkunmó hkyô kat ri.

<sup>24</sup> Buinyì rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luî, yhang, Hkrisduq Yesuq lé lumjǎng hkyô taî kyô é le gyô yu ri. <sup>25</sup> Poluq gi, dingmán hkyô, yhumsing gùng lé hkang é hkyô eq, jé lô râ tarâ dara hkyô lé mhoqshit jáng, Hpilik gi, gyô gyuq mù, "Nàng ahkuî wó ló bê, ngò jìn jáng sheq nang lé dum ji yù râ nghut lhê." ga taî ri. <sup>26</sup> Hpilik kúm gi, Poluq èq ngùn haq byi râ lé myit myoqbyù mù, yhang lé anum num ji yù luî, yhang eq nyo lhum lhum kut ri.

<sup>27</sup> Zanwut í zân lai jáng, Hpilik é mauzau ayá má Porku Hpestu lé htaî kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhùng pyâm to bê nghut ri.

## 25

### *Poluq, Kehtaq Chyáng Jé Râ Matú Dùng È Hkyô*

<sup>1</sup> Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri. <sup>2</sup> Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù,

<sup>3</sup> yhangmoq gi, Poluq lé hkyolat má lhom haq sat pyám râ dâ to kômù luî, jeju ralhum kut byî é dōng Poluq lé Yerusalem wà mó shut dé kat byi râ matú, Hpestu lé lhom dùng akô. <sup>4</sup> Nghut kôlhang, Hpestu gi, "Poluq lé Kesare wà mó má sheq ru lhùng tô lhê, hkâ-myháng a myáng má,

ngò yhang le haú má dum taú ló râ nghut lhê. <sup>5</sup> Haú mù, nungmoq má é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hûn kó sháng gaq." ga tû taí ri.

<sup>6</sup> Hau htâng, yhang gi, shit nyi, raxê nyí kô yhangmoq chyáng nyi yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhâng hí má shuí wang lò râ matú hkunmó hkyô kat ri. <sup>7</sup> Poluq jé jáng, Yerusalem wà mó mai gyó lo é Yudaq byu pé gi, yhâng é lêngkhuyuq má yap to kôluí, saksé a wó tûn shit é mara mó myo myo lé, yhâng é ahtoq má chôm taí hun akô nghut ri.

<sup>8</sup> Haú hkûn, Poluq gi, "Yudaq byu pê é jep é tarâ eq shai é dông le, noqkuq yhûm lé shut é dông le, Kehtaq\* lé shut é dông le, ngò a kut wú." ga luí, mara a bo é hkyô taí ri.

<sup>9</sup> Nghut kôlhang, Hpestu gi, Yudaq byu pê é hí má myoqdong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi râ matú, nàng dóng lhê lú?" ga myí ri.

<sup>10</sup> Poluq kúm gi, "Ngò gi, doqdan hui râ nghut jáng, shí doqdan é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lhang a shut wú sô nghut lhê. <sup>11</sup> Laq má mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyám; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi râ ahkáng wó râ a nghut, ngò gi, Kehtaq chyáng wang taí râ nghut lhê." ga tû taí ri.

<sup>12</sup> Haú hkûn, Hpestu gi, yhâng é byìn tú wap bang eq ban hpyê lhum jáng, "Nàng Kehtaq chyáng wang taí râ ga

---

\* 25:8 Kehtaq gâ é gi, "hkoséng" gâ é nghut lhê.

bê nghut lhê, Kehtaq chyáng wang ló aq hkoi!" ga taî kat ri.

*Poluq Lé, Hkohkâm Agripa Hí Má Shuî Hâng Yu É Hkyô*

<sup>13</sup> Hau htâng, buinyì hkâ-myháng a myáng má, Hkohkâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huî nyo akô nghut ri. <sup>14</sup> Haû mù, yhangnhik tâng gi, buinyì tsómra myáng nyi nyi é htâng má sheq, Hpestu gi, haû Poluq é hkyô lé hkohkâm wa eq taî kyô lhûm é gi, "Hpilik, lhûng to lánq é htóng byû rayuq nyi ri. <sup>15</sup> Ngò Yerusalem wà mó má nyi tô é hkûn, hkyangjong agyi pé eq Yudaq byu pê é suwún wuî gi, haú yuq é hkyô lé taî kyo kôluî, haú yuq lé mara byi râ matú ngo lé chôm dúng akô.

<sup>16</sup> Haú hkûn, ngò gi, mara hun é hui sù, mara hun é bang eq chyung chyôq yoq kut luî, yhangmoq hun é mara lé yhumsing matú mara a bo é hkyô a wó taî shi lé, ó yuq lé ap byi pyám râ le, Romaq htûng a joq nghû luî yhangmoq lé taî kyo bê nghut lhê. <sup>17</sup> Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zùng luî, haú yuq lé shuî wang lò râ matú hkunmó hkyô kat é. <sup>18</sup> Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhum le a hun htoq lô kó nghut ri. <sup>19</sup> Yhangmoq é noqkuq htûng hkyô eq, haû dui nyi ri ga Poluq eq taî é, shi byuq bê Yesuq é hkyô lé za dang jet jet lhûm bum akô. <sup>20</sup> Haû mù, ngò gi, haú hkyô lé hká đông gon yù râ le a sé lô é yanmai, haú hkyô lé Yerusalem wà mó má doqdân é ló hkam yù râ matú, yhang dóng a dóng é hkyô lé myî wú le, <sup>21</sup> Poluq yhang sheq, Hkoséng mó chyáng jé râ ga taî é yanmai, Kehtaq chyáng a dé kat shi é u lé, yhang lé zúng nyî shirâ matú, ngò hkunmó hkyô kat é nghut lhê." gâ ri.

<sup>22</sup> Haú hkûn, Agripa gi, "Ngò le haú yuq é dang gyô wú nau ri." ga, Hpestu lé tái jáng, yhang gi, "Napmá, nàng wó myang gyô râ nghut lhê." ga tû tái ri.

<sup>23</sup> Htâng nyí, Agripa eq Bernike nhiktâng gi, shing kang bò bò za lé lô mù, dap up zau wuê eq wà mà é agyì suwún wuê eq rahá, rûng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akô.

<sup>24</sup> Haú hkûn, Hpestu tái é gi, "Hkôhkâm Agripa eq ahkuí shí má zup zîng tô é lhunglhâng bang ê, Yerusalem wà mó eq shí wà mà é Yudaq byu pé banshoq bang, ngá chyáng lé tái kôluí, shí yuq lé asak a wó duì nhang to lo ga garû bùm é gi, ahkuí nungmoq myang é shí yuq yhang nghut bê. <sup>25</sup> Nghut kôlhâng, shí yuq zui saí é má shí gíng é mara haí lé lháng ngò a myàng nghut ri. Yhang gi, Hkosêng chyáng wâng râ ga tái é yanmai, yhang lé Romaq myuq shut dé kat râ matú ngò myit hpyit to bê. <sup>26</sup> Dé kat bá nghú jáng le, ngá é yhumsîng Hkosêng chyáng yhang é hkyô jihkúm nuqguq kê hun kat râ haí le a bò nghut ri. Haú mù luí, yhang lé ban myí gôn wú jáng sheq, ká râ hkyô rajung jung hkâlhâng ngò myàng abe nghú, nungmoq banshoq bâng é hí má le, je riyhâng nàng Hkôhkâm Agripa é hí má le, yhang lé ngò lhoq htoq shit é nghut lhê. <sup>27</sup> Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tûn shit lé gi, a htuk nghú luí, ngò myit lhê." gâ ri.

## 26

### *Poluq É Hí Hpyang Lhê É Nyì Yap Hkyô*

<sup>1</sup> Haú hkûn, Agripa gi, Poluq lé, "Nàng, náng matú dang tái râ ahkáng wó bê." ga tái ri.

Haú mù luí, Poluq loq tû kat mù mara a bo é hkyô tái é gi, <sup>2-3</sup> "Hkôhkâm Agripa ê, nàng gi, Yudaq byu pé é htunghking banshoq eq tái htîng lhùm é hkyô hkat



hkgámó lé, gyai sê to sê nghut é yanmai, Yudaq byu pé ngo lé hun é mara hkat hkgámó lé, ngò hkû-nyí náng é hí má mara a bò é hkyô myang taí é gi, ngá matú gabú hpo yhang nghut ri nghû myit yu nyi lhê; haû mù luí, ngá dang lé myit hing é eq gyô yù byi laq nghû, dúng tôngbán kat lhê.

<sup>4</sup> Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhang bang gi, sé gû nghut akô. <sup>5</sup> Yhangmoq gi, ngo lé hí hkûn mai sé kô é yanmai, ngò, ngamoq é noqkuq htung mâ é tarâ htan dik é hpúng má bo é Hparishe rayuq nghut é hkyô lé, saksé hkám naû kô é nghut jáng, yhangmoq wó hkám lhê. <sup>6</sup> Nghut kôlhang, doqdân é hui zo râ matú, ahkuí ngò shî má yap tô é gi, Garai Gasang eq ngamoq é îchyí îwa pé lé byî tô é danggidiq lé myit myoqbyù nyi é yanmai nghut lhê. <sup>7</sup> Ngamoq é byù myû raxe í hú gi, danggidiq jeju haû lé wó hkam yù shoq ga, Garai Gasang lé nyí myín noqkuq dojaú shikut nyi bum akô; Hkôhkâm wa ê, myit myoqbyù hkyô hau é yanmai, ngo lé Yudaq byu pé mara hun bum akô nghut ri. <sup>8</sup> Garai Gasang gi, shî bê bang lé dum lhoq tui lhê gâ é hkyô lé, a wó lûm nghû, haû mù myit yu akô lú?

<sup>9</sup> Ngò le, Nazaret wà byù Yesuq é mying eq shai lhûm é đông myo myo wó kut râ nghut lhê nghû, gè gè yhang myit yu wú bê nghut lhê. <sup>10</sup> Gè gè haû đông le Yerusalem wà mó má kut wú bê nghut lhê; hkyangjong agyi pê chyáng mâ é ahkáng wó yû luí, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo huí wú bê nghut lhê. <sup>11</sup> Ngò gi, tarajong banshoq má a lhung lhung yhangmoq lé dam byi luí, Yesuq lé rhoi dang taí kó shoq shikut wú bê nghut lhê; nhik mó góng yo luí, gó mau mâ é wà pé lhang jé shoq, yhangmoq lé châng zing-rî wú bê nghut lhê.

*Poluq Hpúng Byû Dut Lo É Hkyô*

<sup>12</sup> Haú hkûn, radàm lé, ngò gi, hkyangjong agyi pê chyáng mai ahko ahkáng eq hkunmó lé yu chûng mù, Damaskuq myuq shut e ló nyi le, <sup>13</sup> Hkohlâm wa ê, nyigûng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lêngghkyuq má, mauhkûng mai duq bó htoq lo é lé myang ri. <sup>14</sup> Haú hkûn, ngamoq banshoq bang myigùng má lêng gop tô bum le, Hebre myíng dông, 'Sholuq, Sholuq, nàng, ngo lé haí mù zing-rî nyi lhê lú? Zuchûn lé pik le gi, náng é matú gyai yhang wú lhê.' ga luí, ngo lé taí é danghtê lé ngò wó gyô kat ri.

<sup>15</sup> Haú mù, ngò gi, 'Yhumsîng ê, nàng gi, ó yuq nghut lhê lú?' nghu luí, myi jáng, haú Yhumsîng tû taí é gi, 'Nàng zing-rî nyi é Yesuq nghut lhê. <sup>16</sup> Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirâ nghut é hkyô pê é matú, ngá é mù wùn râ byù eq saksé dut nhâng râ dông nang lé hkyin to râ nghû, ngò náng chyáng lé htoq shit é nghut lhê. <sup>17</sup> Náng é amyû pê é loq mai le, tûngbau pê é loq mai le, ngò, nang lé hkyi yù nyi râ nghut lhê. <sup>18</sup> Yhangmoq, yubak hkyut pyám byî é jeju wó yû râ eq, ngo lé lumjîng é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaú mai maubó shut, Tsadán é a-tsam hkaú mai Garai Gasâng shut yhangmoq lhing ló râ matú, ngò, nàng lé yhangmoq chyáng nhang kat râ nghut lhê.' gâ ri.

*Poluq Kut É Muzó Hkyô*

<sup>19</sup> Haú mù luí, hkohlâm Agripa ê, ngò gi, mauhkûng mâ é myoqwup shing-rán haú lé a gyô é a wó é nyî nghut lhê. <sup>20</sup> Ngò gi, yhangmoq myit lhing luí, Garai Gasang shut lhing taú lò mù, myit lhing bê hkyô lé, hkyî zó loq zó dông mai tûn shit kó sháng gaq nghû, sângh-hi má Damaskuq

myuq má nyi é bâng chyáng mai hí luí, Yerusalem wà mó má é bâng chyáng má le, Yuda mau gón má é bâng chyáng má le, tûngbaù pè chyáng má le, hkô kyo bê nghut lhê. <sup>21</sup> Hau é yanmai, Yudaq byu pé gi, ngo lé noqkuq yhûm má chyup yû luí, sat pyám râ da kô é nghut lhê. <sup>22</sup> Nghut kôlhâng, ngò gi, hkû-nyí jé shoq Garai Gasâng èq garúm é lé wó yû luí, ahkuí shí má yap to mù, tiq ko banshoq bang lé saksé wó hkâm kyô é nghut lhê. <sup>23</sup> Ngò taí é má, Hkrisduq gi, hpuzo luí, shí bê bang mai sâng-hi dui toq lô mù, Yhâng é amyû eq tûngbaù amyû pé lé maubó é hkyô lé wó taí kyo râ nghut lhê ga luí, dut lò râ hkyô lé, myiqhtoí pé eq Mosheq taí tô é hkyô mai lai luí, ngò gotû haí le a taí é nghut lhê." gâ ri.

<sup>24</sup> Yhang haù su ga mara a bo é hkyô taí é lé, Hpestu gi, "Poluq ê, nàng na bê! Lûm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

<sup>25</sup> Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê. <sup>26</sup> Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò myit lum nyi lhê. <sup>27</sup> Hkohkâm Agripa ê, nàng gi, myiqhtoí pè é dang lé lumjíng lhê lú? Nàng lumjíng é hkyô lé ngò sê lhê." ga tû taí ri.

<sup>28</sup> Haù hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lú?" ga taí ri.

<sup>29</sup> Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkû-nyí ngò taí é dang lé gyô nyi é lhunglhâng bang, ngò su dut râ matú, ngò gi, Garai Gasang lé kyûdûng nyi lhê." ga tû taí ri.

<sup>30</sup> Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri.

<sup>31</sup> Yhangmoq htoq ló kô é hkûn, "Shí yuq gi, sat gíng é mara eq htóng lhúng gíng é mara hái le a kut shut nghut ri." ga, rayuq eq rayuq taí lhum bum akô nghut ri.

<sup>32</sup> Agripa gi, Hpestu lé, "Shí yuq gi, yhang mai Kehtaq chyáng jé râ ga a taí tô é nghut le gi, yhang lé wó nhang pyám berâ nghut lhê." ga taí ri.

## 27

### *Poluq, Romaq Myuq Shut Wuì-sanghpo Mai E Ló É Hkyô*

<sup>1</sup> Ahkuì, ngamoq lé Itali ming shut wuì-sanghpo mai gû dap ló nhâng râ matú myit hpyit to kôluì, yhangmoq gi, Poluq eq htongbyû góbang ra-am lé, Augustuq Hkosêng é gyewap mó mâ é, Yuliu gâ é shô up gyezaù é loq má ap byî kat akô. <sup>2</sup> Haú hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wuì-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

<sup>3</sup> Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng râ é hkyô lé yhâng é buinùm wuì mai lhom lajang byi kó sháng gaq ga, yhangmoq eq ê hui râ matú ahkáng byî kat ri. <sup>4</sup> Haú mai dum toq ló é hkûn, laì tau mut é yanmai, Kupru zinlóng lé lai hkaù uchyang jî laì ló mù, <sup>5</sup> Kiliki eq Pamhpuli mau mâ é wuimau dông laì byit ló le, Laiki mau mâ é Mura myuq má jé bê nghut lhê. <sup>6</sup> Haú má, shô up gyezau hpó gi, Itali ming shut dap e ló é, Alesandru myuq mâ é wuì-sanghpo lé myang hkyup luí, ngamoq lé haú má ji nhâng bê nghut ri. <sup>7</sup> Haú mai buinyì myo myo yhó yhó lé za jî e ló luí, awui ahke yhang Kidu wà mó eq ang má wó jé ló jáng, laì tau mut é yanmai, hí shut a wó laì ló lo

mù, ngamoq gi, lài lé cháng luî, Kreti zinlóng lé lai hkaû mù, Salamone kongzô é tù tap âng é mai lài ló é nghut lhê.  
<sup>8</sup> Haû mâ é wuiyàm mai awui ahke ji ló lé, Lasea wà eq a wê lhûm é Yuqyo é Guhkan gâ é jowò má jé ri.

<sup>9</sup> Ahkuî, buinyì tsómra lhoq lhaî pyám luî, haû Zoshuq gám pôi lai bê nghut é yanmai, wui-sanghpo mai sô wún le gi, gyuq chiq râ nám jé bê nghut ri. Haû mù, yhangmoq lé Poluq taî pun taî kyîng é gi, <sup>10</sup> "Âhkaû pé ê, shí dàm lhê é wui hkyô gi, wuihke mó hui luî, wui-sanghpo eq zè pé sùm pyám râ htoq agó, nga-nhûng é asak lhang sum râ dut é hkyô lé, ngò byu myang ri." gâ ri. <sup>11</sup> Nghut kôlhang, shô up gyezau hpó gi, Poluq é dang lé gyo râ malaî, wui-sanghpo hkâng sù eq wui-sanghpo yhumsing é dang lé, je lum ri. <sup>12</sup> Guhkan haû gi, gyoqmyò\* wó lhoq lhai râ su a dut é yanmai, myo hpyang gi, Hponik guhkan má wó jé le jé mù, haû má gyoqmyò ló nyi lhai râ matú chôm myit huî akô. Guhkan haû gi, Kreti zinlóng má maupyî buiwàng hkyam eq mautsûng buiwàng hkyam shut hu tô é jowò nghut ri.

### *Wuimau Má, Laidun Mó Htûng Huî É Hkyô*

<sup>13</sup> Maupyî shut mâ é lài yhó le hik lô jáng, yhangmoq myit tô é má hkyak nghut bê su ngam pyám kôluî, shamtoq goknghe lé lhoq toq yû kômù, Kreti zinlóng yâm dông jî e ló bê nghut lhê. <sup>14</sup> Nghut kôlhang, hkâ-myháng a myáng má, Buihtoq mautsûng lài gâ é laidun mó gi, haû zinlóng mai mut lò luî, <sup>15</sup> wui-sanghpo lé lo mut htûng é yanmai, hí shut a wó ló lo jáng, ngamoq gi, lài mut ló é shut châng yông ló bê nghut lhê. <sup>16</sup> Ngamoq gi, Koda gâ é zinlóng zo lé lai hkaû uchyang yông ló nyi é hkûn,

---

\* 27:12 Gyoqmyò lé, haû mau má laidun mó lò lò dut mù, yông wún le gyuq chiq nám nghut lhê.

haû sakhkyîlhaî lé gyai shikut é èq wó lâng yù luî, <sup>17</sup> wuì-sanghpo ahtoq má lâng toq to bê. Wuì-sanghpo lé gi, a byoq lo shoq tuî èq tuî kîng to bê nghut lhê. Dum, yhangmoq gi, Surti gâ é semuî bùm má ló kê gyâm to râ lé chiq kô é yanmai, wuì-sanghpo mâ é panlong pé lé lhoq nyhum hkyô yù mù, châng yông ló bekô nghut ri. <sup>18</sup> Laidun mó lûm htan é yanmai, htang nyí yhangmoq gi, hpugá zê pé lé hkyom dú hkyó pyám bekô nghut ri. <sup>19</sup> Sum nyí nghu é nyí má, yhangmoq gi, wuì-sanghpo zè pé lé yhumsing é loq èq yhang hkyô pyám bekô. <sup>20</sup> Buinyì myáng myáng, buì lé le, kyî pé lé le a myàng é eq, laidun mó za ru mut nyi é yanmai, wó lut râ nghû myit myoqbyu tô é hkyô lé, ngamoq tô pyám bê nghut lhê.

<sup>21</sup> Yhangmoq zoshuq a zô é, buinyì tsómra myáng lô bê nghut mù luî, Poluq gi, yhangmoq é gung gûng má yap to mù, "Âhkaú pé ê, nungmoq ngá é dang gyo luî, Kreti zinlóng mai a htoq ló é nghut le gi, shî su htên byoq é marop hui zo râ a nghut. <sup>22</sup> Ahkuî nghut kôlhâng, ngò taî é dang lé gyô yù mù myit wum yù keq; nungmoq mâ é hká yuq lé asak sum râ a nghut, wuì-sanghpo za sheq htên byoq byuq râ nghut lhê. <sup>23</sup> Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taî é gi, <sup>24</sup> 'Poluq ê, hkâgyuq, Kehtaq é hí má nàng wó yap râ nghut lhê. Wuì-sanghpo shî má nàng eq rahá ji tô é lhunglhang bâng é asak lé, Garai Gasang gi, náng é yanmai, laí laí byi râ nghut lhê.' gâ ri. <sup>25</sup> Hau é yanmai, âhkaú pé ê, myit wum yù keq, ngo lé taî kyô é eq rajung za dut lò râ nghut lhê nghû luî, Garai Gasang lé ngò lumjîng nyi lhê. <sup>26</sup> Nghut kôlhâng, nga-nhúng gi, zinlóng ralhum lhum má ló htung chyap to râ nghut lhê." ga luî, yhangmoq lé i-myt taî tîng ri.

<sup>27</sup> Buinyì raxe myi nyí myín má, gunggàm yoq lé,

ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô. <sup>28</sup> Haû su mù, wuì nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri. <sup>29</sup> Haû mù luì, luqmó má ló záng htung râ lé chiq kômù, yhangmoq gi, wuì-sanghpo htâng shut mâ é shamtoq goknghe myî lhum lé lhoq hkyô kat luì, mau hân bó sháng gaq ga kyûdûng nyi bum akô nghut ri. <sup>30</sup> Wuì-sanghpo hkâng bang gi, wuì-sanghpo lé tô pyâm to luì hpâng râ dâ é myit eq, wuì sanghpo-u shut mâ é shamtoq goknghe pé lé lhoq hkyó râ su kut mhaú luì, sakhkyîlhaì lé wuì má lhoq hkyô nyi bum akô. <sup>31</sup> Haû mù, Poluq gi, shô up gyezau eq gyezô pé lé, "Shí bang wuì-sanghpo má a nyi le gi, nungmoq wó lut râ a nghut." ga taì ri. <sup>32</sup> Haú hkûn, gyezô pé gi, sakhkyîlhaì lé tuì tô é tui lé zân hpyit kat kôluì, sakhkyîlhaì gi, byit gyó byuq bê nghut ri.

<sup>33</sup> Maubó lô jáng, Poluq gi, yhangmoq banshoq bang lé zang zo râ matú myit wum byî é gi, "Nungmoq gi, myit chiq luì, zoshuq haì le a zô é, hkû-nyí raxe myi nyí myáng lô bê. <sup>34</sup> Haû mù luì, zoshuq rajung jung zo keq! Haû gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lhang byuq râ a nghut." gâ ri. <sup>35</sup> Haú su ga ban taì é eq, yhang gi, muk lé yù luì, yhangmoq banshoq bâng é hí má Garai Gasâng jeju lé hkya-on mù, muk lé hpé luì, zô hî bê nghut ri. <sup>36</sup> Haú hkûn sheq, banshoq bang gi, myit wum wó yû kômù, zoshuq zô bùm bekô nghut ri. <sup>37</sup> Wuì-sanghpo haú mâ é byù lhunglhang gi, í sho nyhit xe hkyuq yuq nghut lhê. <sup>38</sup> Yuq hkangmó bàn zô gyí é htâng má, wuì-sanghpo sóm râ matú, sungso pé lé wuì má dú kat pyâm akô nghut ri.

*Wuì-Sanghpo Htên Gyop Byuq É Hkyô*

<sup>39</sup> Myoq san za myàng jáng, yhangmoq gi, jowò haù lé a sé kôlhang, semuî-jàng chyûn ralhum lé byu myàng kôluî, wó dut é nghut jáng, haù má sanghpo lé kôn gyam rà matú chôm doqdân yu akô nghut ri. <sup>40</sup> Haù mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yû luî, wui-sanghpo ulhum mâ é panlong lé lhoq toq yû mù, lai hkyô cháng luî wuiyàm shut mut ló bê nghut ri. <sup>41</sup> Nghut kôlhang, semuî lo bum tô é jowò ralhum má, wui-sanghpo ló htûng chyap byuq luî, sanghpo u gi, a wó duî lo mù, sanghpo htâng lé gi, wuìheng èq lò bat hkyop myha pyám bê nghut ri.

<sup>42</sup> Haù hkûn, gyezô pé gi, htongbyû pé wuili lî hpang byuq kó rà lé gyuq kô é yanmai, yhangmoq lé sat pyám rà chôm dâ akô. <sup>43</sup> Nghut kôlhang, shô up gyezau hpó gi, Poluq lé hkyi yû naù luî, yhangmoq dâ é hkyô lé hkûm pyám mù, wuili dat li bang gi, wuì má byam gyó luî wuiyàm shut hí li dap ló kó sháng ga luî le, <sup>44</sup> góbang gi, siklong eq wui-sanghpo mâ é gotû zè pé má zui mù, gu dap ló sháng ga le, hkunmó hkyô kat ri. Haù dông mai lhunglhang bang gi, wuiyàm shut rago wó jé dap ló bekô nghut ri.

## 28

### *Malata Zinlóng Má Jé Nyi Tô É U Lhê Hkyô*

<sup>1</sup> Ngamoq wó lut dap ló jáng sheq, zinlóng haù gi, Malata gâ é lé sê ri. <sup>2</sup> Zinlóng byu pé gi, ngamoq lé shogyo myit gyai lhom tân shit akô. Mau ru jâng wo nyi luî gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô. <sup>3</sup> Haù hkûn, Poluq gi, htang rawaq guq tsîng yû mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù, yhâng é loq má htê zing tô ri. <sup>4</sup> Zinlóng byu pé gi, Poluq é loq má lhangmuì haù htê lhang tô é lé myàng



kôjáng, "Shí yuq gi, gè gè yhang byù sat é sù teng râ dut ri; wui mai wó lut ló kôlhang, yhang asak dui nyí râ matú, Tengmán tarâ gi, a dóng lo nhung!" ga luî, rayuq eq rayuq taî lhum bum akô nghut ri. <sup>5</sup> Poluq kúm gi, lhangmuì haû lé myihkyóm má ko hkyô kat luî, haî le a dut é za nyi tô ri. <sup>6</sup> Yhangmoq gi, yhânggùng wâm lò berâ, haû a nghut jáng, byodàn ratung shi hkyaq lêng ló berâ, ga myit láng nyi bum akô. Nghut kôlhang, myáng myáng láng wú nyi bum le, yhang má haî le a dut lo é lé myàng kôjáng, yhangmoq é i-myt dum htaî pyám kôluî, shí yuq gi, hparà rayuq sheq nghut ri ga dum taî bum akô nghut ri.

<sup>7</sup> Hau é nàm má, zinlóng agyì hpó Popli sing é maumyí pé joq tô ri. Haú yuq gi, ngamoq lé lhom te yù mù, yhâng yhâm má sum nyí yhang lalúm la-nye lhom hkûlum yu ri. <sup>8</sup> Haú u lé, Popli é yhângwa gi, ali nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi luî, yhâng é ahtoq má loq ke byi mù, yhang lé lhoq gê byî ri. <sup>9</sup> Haú su dut é yanmai, zinlóng mâ é nò byù góbang banshoq le, lé luî lhoq gê byî é hui bekô nghut ri. <sup>10</sup> Yhangmoq gi, ngamoq lé a hkyô hkyô dông hkungga kôluî, ngamoq wuì-sanghpo ji mù, dum toq ló râ hkûn, ngamoq râ é gû lé châng byi kat akô nghut ri.

### *Romaq Myuq Má, Poluq Jé É Hkyô*

<sup>11</sup> Lhamó sum hkyap lai jáng, Alesandru myuq mâ é, "Hparà zozûm nhiktâng" gâ é alhô dap é wuì-sanghpo má, ngamoq wang jî htoq ló bê nghut lhê. Wuì-sanghpo haû gi, gyoqmyò lé zinlóng haú má joq lai é nghut ri. <sup>12</sup> Surakusa wà mó má jé jáng, haú má ngamoq sum nyí nô yu é nghut lhê. <sup>13</sup> Haú mai jî xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luî, í nyí nyí má nghut jáng, Potioli wà mó má jé lô bê nghut lhê. <sup>14</sup> Haú mâ é gumang wuì ra-am eq hui luî,

ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê. <sup>15</sup> Haû mâ é gumang wuì gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bínq Yhùm Sùm Lhum gâ é wà jé shoq lé akô. Poluq gi, hau bang lé lhom myàng jáng, Garai Gasang lé hkya-on kungtôn mù, myit wum wó yù bê nghut ri. <sup>16</sup> Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotû san nyi râ matú, ahkáng wó ri.

*Poluq, Romaq Myuq Má, Mungdang Hko Kyô É Hkyô*

<sup>17</sup> Buinyì sum nyí lai é htâng má, Poluq gi, hau mâ é Yudaq suwún wuì lé ji yu ri. Yhangmoq jé lé bûm kôjáng, yhang gi, "Gumang wuì ê, ngò gi, nga-nhûng é amyû lé le, îchyí îwa pê é htunghking lé le, shut shai é dông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pê é loq má ap byî kat é hui bê nghut lhê. <sup>18</sup> Romaq zau wuì kúm gi, ngo lé ban jep gôn wú jáng, ngá chyáng shî gíng é mara lé a myàng kô é yanmai, ngo lé nhang kat nau akô nghut ri. <sup>19</sup> Nghut kôlhang, hau lé Yudaq byu pé a dông kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haû nghut kôle, ngá amyû lé mara hûn râ jowò joq é yanmai gi, a nghut. <sup>20</sup> Haû mù luí, Israelaq amyû é myit myoqbyù hkyô\* é yanmai, shî shamtoq-tuî èq tuî é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji kat é nghut lhê." ga luí, yhangmoq lé tai ri.

<sup>21</sup> Haû hkûn, yhangmoq gi, "Náng é hkyô eq séng luí Yuda mau mâ é laiká ngamoq a wó yù nghut ri. Haû mai lé é gumang wuì ó yuq le, nàng eq séng é a ge é luhkyang lé

\* <sup>28:20</sup> Israelaq amyû é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

shit kyô é a bò kó nghut ri. <sup>22</sup> Nghut kôlhang, shî nàng lom é hpúng gi, jowô hkgangmó má taí he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tû taí akô.

<sup>23</sup> Yhangmoq gi, yhang eq huí kún râ buinyì ding to kôluí, yhang bíng é yhûm má byù myo myo lé zîng bum akô. Haú hkûn, yhang gi, napkyó mai myín htâng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoí pê é dang má cháng mù, yhangmoq lé shikut luí, Yesuq é hkyô taí pun taí kyîng ri. <sup>24</sup> Yhang taí é hkyô lé, ra-am gi, lumjîng bum akô; ra-am kúm gi, a lumjîng kó nghut ri. <sup>25</sup> Yhangmoq rayuq eq rayuq haú su myit a huí lhûm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoí Esai-aq é nhut mai nungmoq é îchýí îwâ pé lé taí é dang gi, gyai yhang têng ri. Dang haú gi,

<sup>26</sup> 'Byù haú hú chyáng ê mù,

"Nungmoq gyô tsuq to kôlhang, sê gyo kó râ a nghut; wú tsuq to kôlhang, wú sé kó râ a nghut.", nghû ê taí aq.

<sup>27</sup> Hkâsu mù gâ le, amyû shi é i-myt gi, htan byuq luí, yhangmoq é nohkyap gi, htu byuq bê nghut ri; yhangmoq é myoq gi, chûm byuq bê nghut ri; haú a nghut le gi, yhangmoq é myoq èq myàng mù, yhangmoq é nohkyap èq wó gyo luí, yhangmoq é i-myt má sê hkyâng kômù, ngá chyáng lhing lò kôluí, ngò yhangmoq lé lhoq gê byi berâ nghut lhê. <sup>☆</sup>

gâ ri.

<sup>28</sup> Haú mù luí, shî Garai Gasâng é hkyi yù hkyô lé, tûngbaù pê chyáng byî kat bê nghut luí, yhangmoq lhom gyô yù berâ hkyô lé, nungmoq yhang sê nyì keq ô!" ga luí,

<sup>☆</sup> 28:27 Esai 6:9,10

danghkun haû taî kat é htâng má, yhangmoq gi, htoq ló byuq bùm bekô nghut ri. <sup>29</sup> (Poluq haû su ga taî é htâng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

<sup>30</sup> Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhom hkûlum yu ri.  
<sup>31</sup> Haû mù, a gyuq a kyum é za, Garai Gasâng é mingdán hkyô lé hko taî kyô é eq, Yhumsîng Yesuq Hkrisduq eq sêng é hkyô lé mhoqshit byî ri; yhang lé, ó le a hkûm zing to kó nghut ri.

## Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates  
eBible.org

---

PDF generated using Haiola and XeLaTeX on 23 Oct 2018 from source files dated 23 Oct 2018

23f9fc55-a8a4-59ef-9513-707ec336b0ee